

庫文有萬

種百七集二第

編主五雲王

話叢隱漁溪茗

集後前

(四)

集幕仔胡

行發館書印務商

話叢隱漁溪苕  
集後前  
(四)  
集纂仔胡

書叢本基學國

中華民國二十六年三月初版

七二九上

張

纂集者

胡

仔

發行人

王 上海河南路五

印刷所

商務印書館 上海河南路五

發行所

商務印書館 上海及各埠

(本書校對者楊瑞文)

張

編主五雲王  
庫文有萬  
種百七集二第  
話叢隱漁溪茗  
集後前  
冊四

# 苕溪漁隱叢話後集卷第二十三

## 六一居士

東坡云大川雖有神淫祀亦其俗石馬繫祠門山鶴噪叢木潭潭村鼓隔溪聞楚巫歌舞送迎神畫船百丈山前路上灘下峽長來去江水東流不暫停黃牛千古長如故峽上侵天起青嶂崖崩路絕無由上黃牛不下江頭飲行人惟向舟中望朝朝暮暮見黃牛徒使行人過此愁山高更遠望猶見不見黃牛滯客舟右文忠公爲峽州夷陵令日所作黃牛廟詩也軾嘗聞之于公云昔以西京留守推官爲館閣校勘時同年丁寶臣元珍適來京師夢與予同舟泝江干入一廟中拜謁堂下予班元珍下元珍固辭予不可方拜時神像爲起鞠躬堂上且使人邀予上耳語久之元珍私念神亦如世俗待館閣乃爾異禮邪旣出門見一馬隻耳覺而語予固莫識也不數日元珍除峽州判官已而余亦貶夷陵令日與元珍處不復記前夢矣一日與元珍泝峽謁黃牛廟入門惘然皆夢中所見予爲縣令固班元珍下而門外鐫石爲馬缺一耳相視大驚乃留詩廟中有石馬繫祠門之句蓋私識其事也元豐五年軾謫居黃州宜都令朱君嗣先見過因語峽中山水偶及之朱君請書其事與詩當刻石於廟使人知進退出處皆非人力如石馬一耳何與公事而亦前定況其大者公旣爲神所禮而猶謂之淫祀以見其直氣不可回如此感其言有味故爲錄之

六一居士傳云居士初謫滁州自號醉翁旣老而衰且病將退休於潁水之上則又更號六一居士客有

問曰六一何謂也居士曰吾家藏書一萬卷集錄三代以來金石遺文一千卷有琴一張有棋一局而常置酒一壺客曰是爲五一爾奈何居士曰以吾一翁老於此五物之間是豈不爲六一乎客曰子欲逃名者乎而屢易其號此莊生所謂畏影而走乎日中者也余將見子疾走大喘渴死而名不得逃也居士曰吾固知名之不可逃然亦知夫不必逃也吾爲此名聊以志吾之樂耳

苦溪漁隱曰石林詩話云歐公一日被酒語其子斐云吾詩廬山高今人莫能爲惟李太白能之明妃曲後篇太白不能爲惟杜子美能之至於前篇則子美亦不能惟吾能之也近觀本朝名臣傳乃云歐陽修爲詩謂人曰廬山高惟韓愈可及琵琶前引韓愈不可及杜甫可及後引李白可及杜甫不可及其自負如此則與石林所紀全不同琵琶引卽明妃曲也此三詩並錄於此廬山高贈同年劉凝之歸南康其詩云廬山高哉幾千仞兮根盤幾百里截然屹立乎長江長江西來走其下是爲揚瀾左蠡兮洪濤巨浪日夕相春撞雲消風止水鏡淨泊舟登岸而遠望兮上摩雲霄之曉靄下壓后土之鴻龐試往造乎其間兮攀緣石磴窺空砦千岩萬壑響松檜懸崖巨石飛流淙水聲聒聒亂人耳六月飛雪洒石矼仙翁釋子亦往往而逢兮吾常惡其學幻而言唆但見丹霞翠壁遠近映樓閣晨鐘暮鼓杳靄羅旛幢幽花野草不知其名兮風吹露濕香澗谷時有白鶴飛來雙幽尋遠去不可極便欲絕世遺紛厖羨君買田築室老其下插秧盈疇兮釀酒盈缸欲令浮嵐暖翠千萬狀坐臥常對乎軒窗君懷磊砢有至寶世俗不辨珉與玒策名爲吏二十載青衫白首困一邦寵榮聲利不可以苟屈兮自非青雲白石有深趣其氣兀肆何由降丈夫壯節似君少嗟我欲說安得巨筆如長杠明妃曲和王介甫作其一云胡人以鞍馬爲家射獵爲俗泉

甘草美無常處鳥驚獸駭爭馳逐誰將漢女嫁胡兒風沙無情貌如玉身行不遇中國人馬上自作思歸曲推手爲琵卻手琶胡人共聽亦咨嗟玉顏流落死天涯琵琶卻傳來漢家漢宮爭按新聲譜遺恨已深聲更苦纖纖女手生洞房學得琵琶不下堂不識黃雲出塞路豈知此聲能斷腸其二云漢宮有佳人天子初未識一朝隨漢使遠嫁單于國絕色天下無一失難再得雖能殺畫工于事竟何益耳目所及尙如此萬里安能制夷狄漢計誠已拙女色難自誇明妃去時淚洒向枝上花狂風日暮起飄泊落誰家紅顏勝人多薄命莫怨春風當自嗟余觀介甫明妃曲二首辭格超逸誠不下永叔不可遺也因附益之其一云明妃初出漢宮時淚濕春風鬢腳垂低回顧影無顏色尙得君王不自持歸來卻怪丹青手入眼平生未曾有意態由來畫不成當時枉殺毛延壽一去心知更不歸可憐着盡漢宮衣寄聲欲問塞南事只有年年鴻雁飛家人萬里傳消息好在氺城莫相憶君不見咫尺長門閉阿嬌人生失意無南北其二云君妃出嫁與胡兒氺車百輛皆胡姬含情欲語獨無處傳與琵琶心自知黃金捍撥春風手彈看飛鴻勸胡酒漢宮侍女暗垂淚沙上行人卻回首漢恩自淺胡自深人生樂在相知心可憐青塚已蕪沒尙有哀絃留至今

復齋漫錄云文忠詩小雨斑斑作燕泥東坡詩小雨斑斑亦作泥山谷六言詩潤花小雨斑斑

藝苑雌黃云送劉貢父守維揚作長短句云平山欄檻倚晴空山色有無中平山堂望江左諸山甚近或以謂永叔短視故云山色有無中東坡笑之因賦快哉亭道其事云長記平山堂上欹枕江南煙雨杳杳沒孤鴻認取醉翁語山色有無中蓋山色有無中非煙雨不能然也

苕溪漁隱曰歐公云身行南雁不到處山與北人相對愁汪彥章云路行歸雁不到處家在長江欲盡頭彥章雖體歐公詩然終不及歐之自在也

蔡寬夫詩話云文忠與趙康靖公概同在政府相得歡甚康靖先告老歸睢陽文忠相繼謝事歸汝陰康靖一日單車特往過之時年幾八十矣留劇飲踰月日於汝陰縱游而後返前輩挂冠後能從容自適未有若此者文忠嘗賦詩云古來交道愧難終此會今時豈易逢出處三朝俱白首凋零萬木見青松公能不遠來千里我病猶堪唱一鍾已勝山陰空興盡且留歸駕爲從容因榜其游從之地爲會老堂明年文忠欲往睢陽報之未果行而薨兩公名節固師表天下而風流襟義又如此誠可以激薄俗也

苕溪漁隱曰歐公作詩蓋欲自出胸臆不肯蹈襲前人亦其才高故不見牽強之迹耳如六月十四夜飛蓋橋玩月云天形積輕清水德本虛靜雲收風浪止始見天水性澄光與粹容上下相涵映乃于其兩間皎皎挂寒鏡餘輝所照耀萬物皆鮮瑩矧夫人之靈豈不醒視聽而我于此事翛然發孤詠紛昏忻洗滌俯仰恣涵泳人心曠而閑月色高愈迥惟恐清夜闌時時瞻斗柄

塵史云文忠早朝詩云月在蒼龍闕角西甚爲美句然予按漢之四闕南曰朱雀北曰玄武東曰青龍西曰白虎今歐之詩意蓋以當前門闕狀蒼龍故云月在西也不用漢闕也

夷白堂小集云中秋夜待月詩和者數人趙承之一聯云古來此景難經歲今夜誰家不倚樓孫平父一聯云坐待銀盤生海底俄驚金餅上雲頭尤爲佳也苕溪漁隱曰余評前一聯自在語意俱到後一聯用銀盤金餅止是詠月何獨中秋吾無取焉

苕溪漁隱曰。古人賦中秋詩例皆詠月而已。少有著題者。惟王元之云。莫辭終夕看。動是隔年期。蘇子瞻云。暮雲收盡溢清寒。銀漢無聲轉玉盤。此生此夜不長好。明月明年何處看。蓋庶幾焉。如杜子美劉夢得皆有八月十五夜詩。祇是詠月然亦佳句也。子美云。滿目飛明鏡。歸心折大刀。轉蓬行路遠。攀桂仰天高。水路疑霜雪。林棲見羽毛。此時瞻白兔。直欲數秋毫。夢得云。天將今夜月。一遍洗寰宇。暑退九霄淨。秋澄萬里清。星辰讓光彩。風露發晶英。能變人間世。翛然是玉京。

苕溪漁隱曰。永叔喜雪云。常聞老農語。一臘見三白。是爲豐年候。占驗勝著策。三白事古。人不曾用。自永叔始。遂爲故實。如鮑欽止雪霽云。三白歲可期。一飽分已定。呂居仁雪詩云。看取一年三白。喜歡共入新年。皆本此也。

劉貢甫詩話云。永叔與江鄰幾論韓雪詩。以隨車翻縞帶。逐馬散銀盃。爲不工。而謂均中初蓋底。凸處遂成堆爲勝。未知真得韓意否也。永叔云。知聖俞詩者。莫如修。嘗問聖俞平生所得最好句。聖俞所自負者。皆修所不好。聖俞所卑下者。皆修所稱賞。蓋知心賞音之難如是。其評古人詩。得無似此乎。

復齋漫錄云。退之喜雪。獻裴尚書詩。喜深將策試。驚密仰簷窺。又云。氣嚴當酒暖。酒密聽窗知。荆公全用以爲一聯云。借問火城將策試。何如雲屋聽窗知。

法藏碎金云。韓詩外傳云。凡草木花多五出。雪花獨六出。予之所居。有迎春花桃花。因閑觀之。二花多五出。亦有六七出者。百中之一耳。譬如千萬人中。或有一人生六指。物理如此。不足怪。莊子云。枝指是也。萬一有反常之事。固當無執定之理。

藝苑雌黃云：南史張融作海賦成，示顧凱之。凱之曰：此賦實超元虛，但恨不道鹽耳。融因命筆益之云：灑沙成白，熬波出素，積雪中春，飛霜暑路。東坡雪詩押鹽字一聯，漁蓑句好，真堪畫柳絮才高，不道鹽學者徒知柳絮撒鹽用謝安故事，殊不知道鹽三字亦有來處也。

苕溪漁隱曰：魯直雪詩試尋高處，望雙闕佳氣葱葱，寒妥貼洪覺範雪詩一川秀色浩凌亂，萬樹無聲寒妥貼二詩當以覺範爲優，句意俱工。

六一居士云：牡丹花之絕而無甘實，荔枝果之絕而非名花。昔樂天有感于二物矣，是孰尸其賦予邪？然斯二者惟一不兼萬物之美，故各得極其精。此於造化不可知，而推之至理宜如此也。余少遊洛陽，花之盛處也。因爲牡丹作記，君謨閩人也。故能識荔枝而譜之。因念昔人嘗有感於二物，而二人者適各得其一之詳，故聊書其所以然，而附君謨譜之末焉。

藝苑雌黃云：羅隱牡丹詩云：自從韓令功成後，辜負穠華過一春。余考之唐元和中，韓弘罷宣武節制，始至長安私第，有花命斂去，曰：吾豈效兒女輩耶？當時爲牡丹包羞之不暇，故隱有辜負穠華之語。

復齋漫錄云：東坡雨中明慶賞牡丹云：霏霏雨霧作清妍，爍爍明燈照欲燃。明日春陰花未老，故應未忍著酥煎。又云：千花與百草，共盡無妍鄙。未忍汙泥沙，牛酥煎落蕊。孟蜀時，兵部尚書李昊，每將牡丹花數枝分遺朋友，以牛酥同贈。且曰：俟花彫謝，即以酥煎食之，無棄穠豔。其風流貴重如此。

東坡云：揚州芍藥爲天下冠。蔡繁卿爲守，始作萬花會，用花十餘萬株，既殘諸園，又更因緣爲姦。民大病之，余始至問民疾苦，以此爲首，遂罷之。花本洛陽故事，亦必爲民害也。會當有罷之者，錢惟演爲留守，始

置驛貢洛陽花識者鄙之此宮妾愛君之道也故次韻林子中春日見寄詩云爲報年來殺風景連江夢雨不知春以此也

東臯雜錄云韓魏公守維揚王荊公王岐公爲幕客公愛重之方春作芍藥會有四枝正紫重跗累萼中有金蕊遶之號勝金紫每歲不過一二公召二幕賞之尙少一客俄報陳太博入境秀公也卽召之後皆爲宰相故荆公作魏公挽詩云幕府少年今白髮傷心無路送靈輶

復齋漫錄云東坡言古今七言偉麗之句永叔一聯云蒼波萬古流不盡白鳥雙飛意自閑上句取李太白長波瀉萬古之句東坡一聯云令嚴鐘鼓三更月野宿貔貅萬籟煙上句取杜子美中天懸明月令嚴夜寂寥之句也

苕溪漁隱曰永叔有句云黃栗留鳴桑椹美紫櫻桃熟麥風涼先君有句云含桃紅紫鶯聲老宿麥青黃燕子飛皆初夏詩也

本朝名臣傳云初仁宗以唐書淺陋命官刊修在職五年而修至分撰紀表志七年書成宰相韓琦素不悅宋祁以所上列傳文采雕飾太過又一書出兩手詔修看詳改歸一體修受命歎曰宋公於我前輩人所見不同詎能盡如己意遂不易一字又故事修書進御惟書官崇者是時祁守鄭州修位在上修曰宋公於此日久功深吾可掩其長哉遂各列其姓名宋庠聞而喜曰自昔文人相凌掩斯事古未有也

三山老人語錄云舊唐史蔣伸從容言於上曰近日官頗易得人思傲倖上驚曰如此則亂矣對曰亂則未亂但傲倖者多亂亦非難上稱歎再三新史易其語云比爵賞稍易人心且偷帝愕然曰偷則亂矣伸

曰否非違亂但人有覬心亂由是生不若舊史詞暢而理順也。

桐江詩話云永叔作韓忠獻畫錦堂記開石了以碑本寄張安道安道嗟歎久之云惜乎不先寄老夫使此記遂有小類以武康之節來治於相兩句中可去一字不然以武康之節來治相又不然以武康節來治于相

本朝名臣傳云歐陽公知開封府丞包拯政猛之後一切循理不事風采或以拯之政勵修者答曰凡人材性不一各有長短用其所長事無不舉強其所短政必不逮吾亦任吾所長爾聞者服其言

司馬文正公日錄云歐陽公坐擅止青苗錢特放罪上表謝曰敢不戒小人之遂非思君子之改過

許彥周詩話云會老堂口號曰金馬玉堂三學士清風明月兩閑人初謂清風明月古今通用語後讀南史謝諫傳曰入吾室者但有清風對吾飲者惟當明月文忠公文章固優辭亦精緻如此

# 苕溪漁隱叢話後集卷第二十四

梅都官

藝苑雌黃云。河豚新附本草云。味甘溫無毒。日華子云。有毒。予按倦游雜錄云。河豚魚有大毒。肝與卵人食之必死。暮春柳花飛。此魚大肥。江淮人以爲時珍。更相贈遺。鬻其肉雜蕷蒿荻芽。淪而爲羹。或不甚熟。亦能害人。歲有被毒而死者。然南人嗜之不已。故聖俞詩。春洲生荻芽。春岸飛楊花。河豚當此時。貴不數魚蝦。而其後又云。炮煎苟失所。轉喉爲莫邪。則其毒可知。本草以爲無毒。蓋誤矣。及觀張文潛明道雜志。則又云。河豚水族之奇味。世傳以爲有毒。能殺人。余守丹陽。及宣城。見土人戶食之。其烹煮亦無法。但用蕷蒿荻芽菘菜三物。而未嘗見死者。若以爲土人習之。故不傷。蘇子瞻蜀人守揚州。晁無咎濟南人。作倅。每日食之。了無所覺。南人云。魚無頰無鱗。與目能開闔。及作聲者。有大毒。河豚備此四者。故人畏之。而此魚自有二種。色淡黑有文點。謂之斑子。云能毒人。土人亦不甚捕也。子瞻在資善堂。嘗與人談河豚之美者。云也直那一死。其美可知。或云子不可食。其大綫一粟。浸之經宿。如彈丸。人有中其毒者。以水調炒槐花末。及龍腦皆可解。予嘗見漁者說。所以取之之由。曰。河豚盛氣易怒。每伏水底。必設網於上。故以物就而觸之。彼將奮怒而上。遂爲所獲。吳人珍之。目其腹腴爲西施乳。予嘗戲作絕句云。蕷蒿短短荻芽肥。正是河豚欲上時。甘美遠勝西子乳。吳王當日未曾知。雖然甚美必甚惡。河豚味之美也。吳人嗜之。以喪其軀。西施色之美也。吳王嗜之。以亡其國。茲可以爲來者之戒。

詩說雋永云。福州嶺口有蛤屬。號西施舌。極甘脆。其出時。天氣正熱。不可致遠。呂居仁有詩云。海上凡魚不識名。百千生命一杯羹。無端更號西施舌。重與兒曹起妄情。

六一居士詩話云。鄭谷詩名盛於唐末。號雪臺編。而世俗但稱鄭都官詩。其詩多佳句。但格不甚高。予爲兒時誦之。今其集不行於世矣。梅聖俞晚年官亦至都官。一日會飲。劉原父戲之曰。聖俞官必止於此。坐客皆驚。原父曰。昔有鄭都官。今有梅都官也。聖俞頗不樂。未幾聖俞病卒。余爲序其詩爲宛陵集。而今人但謂之梅都官。一言之謔。後遂果然。斯可歎也。

苕溪漁隱曰。歐陽永叔宛陵集序。晁無咎海陵集序。二序皆論詩人之多窮。余嘗愛之。故茲併錄。宛陵集略云。予聞世謂詩人少達而多窮。夫豈然哉。蓋世所傳詩者。多出於古窮人之辭也。凡士之蘊其所有。而不得施於世者。多喜自放于山巔水涯之外。見蟲魚草木。風雲鳥獸之狀類。往往探其奇怪。內有憂思感憤之鬱積。其興於怨刺。以道羈臣寡婦之所歎。而寫人情之難言。蓋愈窮則愈工。然則非詩之能窮人。殆窮者而後工也。海陵集序略云。文學不足以發身。春秋時。士大夫顯名諸侯。人稱之至今者。皆有他事業。舉大而任重。排難而解紛。其用如穀帛藥茗。而文章者。特以緣飾而行之耳。戰國異是。一切趨合抵擣。無春秋時事業矣。而文學尤爲不急。詩又文學之餘事。至唐始盛。然爲之而工。不足以取世資。故世稱少達而多窮。自蘇李而下。枚數之至唐。皆孫樵所論。相望於窮者也。以其不足以發身。而取世資。又多窮如此。而士或千一好焉。惟恐其學之不至。營度彫琢。會其得意。不啻如鍾鼎之獲。顧他好嗜無足以易此者。雖數用以得詬病。猶不悔曰。吾固有得於此也。嗚呼。非誠心好之。孰能困而堅往而忘返如此哉。

苕溪漁隱曰聖俞詩工於平淡自成一家如東溪云野鳧眠岸有閑意老樹著花無醜枝山行云人家在何許雲外一聲雞春陰云鳩鳴桑葉吐村暗杏花殘杜鵑云月樹啼方急山房人未眠似此等句須細味之方見其用意也

許彥周詩話云聖俞詩句句精鍊如焚香露蓮泣開磬清鷗邁之類宜乎爲歐陽文忠公所稱其他古體如朱絃疏越一唱三歎讀者當以意求之

梅聖俞寵嬖曹氏作一日曲爲曹氏也苕溪漁隱曰余閱宛陵集見一日曲味其辭意乃爲南陽一娼語離而作然則謹厚者亦復爲之邪其曲云妾家鄧侯國肯愧邯鄲姝世本富繪綺嬌愛比明珠十五學組紈未嘗開戶樞十六失所適姓名傾里闐十七善歌舞使君邀宴娛當茲著樂府不得同羅敷涼溫忽荏苒屢接朝大夫相歡不及情何異逢路衢昨日一見郎口色曾不渝結愛從此篤暫隔尤恐疎如何遂從宦去涉千里途郎跨青驄馬妾乘白雪駒送郎郎未遠別妾妾仍孤不如水中鱗雙雙依綠蒲不如雲間鵠兩兩下平湖魚鳥尙有託妾今誰與俱去去約春華終朝怨日賒一心思杏子便擬見梅花梅花幾時吐頻揩闌干數東風若見郎重爲歌金縷

苕溪漁隱曰聖俞云南嶺禽過北嶺叫高田水入低田流野水自添田水滿晴鳩卻喚雨鳩歸詩意皆相類然魯直造語有工優於聖俞

蘇子美

苕溪漁隱曰元次山集自釋云帶答箸而畫船注云上郎丁下桑荒切竹器也故唐書音訓云讀作郎桑

見結本集音訓。又音上力丁切。下息拯切。取魚籠也。蓋有平仄兩音。自釋又云。能帶答箸。全獨保生。能學  
聾五交斷。保宗全家聲也。如此漫乎非邪。其語雖協韻。然廣韻集韻于庚清青三韻中。不收此箸字。並于  
上聲迥字韻中收之。蘇子美松江長橋觀漁詩。鳴榔莫觸蛟龍睡。舉網時聞魚蟹腥。我實宦游無況者。擬  
來隨爾帶答箸。黃魯直雨晴過石塘詩。長虹垂地若篆字。晴岫插天如畫屏。耕夫荷鋤解機棟。漁父晒網  
投答箸。秦少游德清道中還寄子瞻詩。叢薄開羅帳。淪漪寫鏡屏。疎籬窺宵寃。支港泛答箸。皆于青字韻  
中押真誤也。

復齋漫錄云。子美詩云。笠澤鱸肥人膾玉。洞庭橘熟客分金。呂吉甫詩。魚出清波庖膾玉。菊含寒露酒浮  
金。呂勝于蘇。蓋人客兩字雖無亦可。

苕溪漁隱曰。吳江長橋詩。世稱三聯子美云。雲頭灔澦開金餅。水面沉沉臥綵虹。楊次公云。八十丈虹晴  
臥影。一千頃碧玉無瑕。鄭毅夫云。插天蟠螭玉腰闊。跨海鯨鯢金背高。永叔謂子美此句雄偉。余謂次公  
毅夫兩聯粗豪。較以子美之句。二公殊少蘊藉也。

山谷云。二蘇送梁子熙聯句云。大榮大辱能生死人。叔才二物不並。以撓厥真。子美之子病悶。腸如車輪。  
叔才勞憂到母飢寒著身子。子美世俗鹵莽。輒置莫親。叔才文彩光艷。伏不得伸。子美悽吟哀號。酸入四鄰。  
叔才夜計破午。若燕作秦。子美腹憤軋軋。智奇陳陳。叔才淮國晚嶺。吳渠春津。子美去謝夙蘊。歸逢故辛。  
子美雌火在丑。刮鑿遜屯。叔才駕風鞭霆。以脫凡鱗。子美景祐元年仲春。子美于蜀紋紙上楷寫字極端  
勁可愛。叔才蓋才翁舊字。此篇不見于家集。略計雄文妙墨。流落人間者。必千數百紙。二蘇文章豪健痛

快如此潘陸不足吞也。

復齋漫錄云田家汨汨水流渾一樹高花明遠村雲意不知殘照好卻將微雨送黃昏鄭毅夫詩也春陰垂野草青青時有幽花一樹明晚泊孤舟古祠下滿川風雨看潮生蘇子美詩也第二句相類然皆清絕可愛

### 石曼卿

六一居士詩話云曼卿自少以詩酒豪放自得其氣貌偉然詩格奇峭又工於草書筆畫遒勁體兼顏柳爲世所好余家嘗得南唐後主澄心堂紙曼卿爲余草書其籌筆驛詩曼卿平生所自愛者至今藏之號爲三絕真余家寶曼卿卒後其故人有見之者云恍惚如夢中言我今爲神仙也所主芙蓉城欲呼故人往遊不得忿然騎一素驃去如飛後又云降于亳州一舉子家欲呼舉子去不得因留詩一篇與之余亦記舉子一聯云鶯聲不逐春光老花影長隨日腳流神仙鬼怪事不可知然其詩頗類曼卿平生語舉子不能道也

括異志云慶歷中有朝士將曉赴朝見美女三十餘人靚粧麗立兩兩並馬而行丁度觀文按轡於其後朝士驚曰丁素儉約何姬之衆邪有一人最後行朝士問曰觀文將宅眷何往曰非也諸女御迎芙蓉館主俄聞丁卒

苕溪漁隱曰東坡言世傳王廻子高與仙人周瑤英游芙蓉城元豐元年三月余始識子高問之信然乃作此詩云芙蓉城中花冥冥誰其主者石與丁珠簾玉案翡翠屏雲舒霞卷千娉婷中有一人長眉青炯

如微雲澹疎星。往來三世空鍊形。竟坐誤讀黃庭經。天門夜開飛爽靈。無復白日乘雲輶。俗緣千劫磨不盡。翠被冷落淒餘馨。因過綠山朝帝廷。夜聞笙簫羽節聽。飄然而來誰使令。皎如明月入窗櫺。忽然而去不可執。寒衾虛幌風泠泠。仙宮洞房本不局。夢中同躡鳳凰翎。徑度萬里如奔霆。玉樓浮空聳亭亭。天書雲篆誰所銘。遙樓飛步高玲珑。仙風鏘然韻流鈴。遽遽雲開如酒醒。芳卿寄謝空丁寧。一朝覆水不返瓶。羅巾別淚空熒熒。春風花開秋葉零。世間羅綺紛羶腥。此生流浪隨滄溟。偶然相值兩浮萍。願君收視觀三庭。勿與嘉穀生蝗螟。從渠一念三千齡。下作人間尹與邢。東坡此詩最爲流麗。故秦太虛與東坡簡云。素紙一軸。敢冀醉後揮掃近文。并芙蓉城詩時得把玩以慰馳情。

許彥周詩話云。詩人寫人物態度。至不可移易。元微之李娃行云。髻鬟峩峩高一尺。門前立地看春風。此定是娼婦。退之華山女詩云。洗粧拭面著冠帔。白咽紅頰長眉青。此定是女道士。東坡作芙蓉城詩亦用長眉青三字。云中有一人長眉青。炯如微雲淡疎星。便是神仙風度。

# 苕溪漁隱叢話後集卷第二十五

半山老人

復齋漫錄云西清詩話荆公賞花釣魚詩披香殿上留珠筆太液池邊送玉杯都下人以公用柳耆卿太液波翻披香簾捲之句余讀唐上官儀初春詩云步軍出披香清歌臨太液乃知荆公取儀詩豈謂柳詞邪庚信暮春詩云宜春苑中春已歸披香殿裏作春衣長安有宜春宮此又以宜春對披香矣

六朝事迹云半山報寧禪寺荆公故宅也其地名白塘舊以地卑積水爲患自荆公卜居乃鑿渠決水以通城河元豐七年公病愈乃請以宅爲寺因賜寺額由城東門至蔣山此半道也故今亦名半山寺陳軒金陵集載荆公半山詩凡十五首苕溪漁隱曰山谷稱荆公爲半山老人故跋胡笳集句云溢城王寅擬半山老人集句胡笳十八拍是也

蔡寬夫詩話云荆公嘗云詩家病使事太多蓋皆取其與題合者類之如此乃是編事雖工何益若能自出己意借事以相發明情態畢出則用事雖多亦何所妨故公詩如董生只爲公羊感豈肯捐書一語真桔槔俯仰何妨事抱甕區區老此身之類皆意與本題不類此真所謂使事也

復齋漫錄云荆公詩靜憩鳩鳴午荒尋犬吠昏學者謂公取唐詩一鳩鳴午寂雙燕語春愁之句余嘗見東坡手寫此詩乃是靜憩雞鳴午讀者疑之蓋不知取唐詩楓林社日鼓茆屋午時雞

陳子高云庚辰三月十日與關聖淵陳明信集太平寺明信誦介甫三品石句以爲介甫善論古今如國

亡今日頑無恥。自謂當年不與謀。後之詩人不復措詞矣。聖淵云。介甫但是融化石筍行舊語。且陳亡江總輩皆北面讎仇。豈如此石之耐久邪。聖淵及余作詩。以反介甫明信終守己說。爭論紛然。日暮罷去。詩竟不就。後十四年。當癸巳寒食。重尋昔游。羣石巉然固在。聖淵明信死已久矣。苦溪漁隱曰。子高三品石詩云。臨春結綺今何在。屹立巉巉終不改。可憐江總負君恩。白頭仍作北朝臣。此反介甫詩意也。

苦溪漁隱曰。謎字自鮑照始。以字體解釋爲之。井字謎云。二形一體。四支八頭。四八二八。飛泉仰流。乾之一九從立。無偶坤之二六。宛然雙宿。故介甫用字謎云。一月又一月。兩月共半邊。上有可耕之田。下有長流之川。一家有六口。兩口不團圓。

藝苑雌黃云。予頃與荆南同官江朝宗論文。江云。前輩爲文。皆有所本。如介甫虎圖詩。語極邁健。其間有神閑意定。始一掃之句。爲此只是平常語。無出處。後讀莊子宋元君畫圖。有一史後至。儼儼然不趨受揖。下立。因之舍解衣盤礴。贏君曰。是真畫者也。郭象注。內足者。神閑而意定。乃知介甫實用此語也。又言杜陵有王十五閣會詩。病身虛俊味。何幸飫兒童。俊味亦有來處。本草葫注中云。此物煮爲羹臚。極俊美。除風破冷。足爲饌中之俊。又言韓退之叉魚詩。駢首類同條。駢首雖是常語。然考之周易。貫魚以宮人寵。王弼注。貫魚謂五陰駢頭。相次似貫魚也。退之蓋取此。又杜詩贈李校書。衆中每一見。使我潛動魄。按文選江淹雜體詩序云。蛾眉詎同貌。而俱動于魄。芳草寧共氣。而皆悅于魂。則動魄之說。杜亦有所本也。

元城先生語錄云。僕嘗問先生曰。神廟必欲變法何也。先生曰。天下之法未有無弊者。祖宗以來。以忠厚仁慈治天下。至嘉祐末年。天下之事似乎舒緩委靡不振。當時士大夫亦自厭之。多有文字論列。至神廟

卽位富於春秋天姿絕人見兩蕃不服及朝廷州縣多舒緩不及漢唐全盛時每與大臣論議有怫然不悅之色當時執政從官有識者不敢承當獨金陵揣知上意以一身當之以激切奮怒之言發動上心遂以前朝爲不治之朝神廟一旦得之以爲千載會遇改法之初以天下公論謂之流俗內則太后外則顧命大臣等尙不能回何況臺諫侍從州縣乎祇增其勢耳雖天下之人羣起而攻之而金陵不可動者蓋有八字吾友宜記之僕因問八字曰虛名實行強辨堅志當時天下之論以金陵不作執政爲屈此虛名也平生行已無少許點涴言者雖欲誣之人主不信此實行也論議人主之前貫穿經史古今不可窮詰故曰強辨前世大臣欲任意行一事或可以生死禍福恐之而回此老實不可動故曰堅志因此八字新法所以必行也故得君之初與主上若朋友一言不合己意則面折之反覆詰難使人主伏辨乃已及元豐之初人主之德已成大臣尊仰將順之不暇天容毅然正君臣之分非熙寧之初比也

司馬文正公日錄云介甫初爲政每贊上以獨斷上專信任之蘇軾爲開封試官策問進士以晉武平吳以獨斷而克苻堅伐晉以獨斷而亡齊桓專任管仲而霸燕增專任子之而敗事同而功異何也介甫見之不悅軾弟轍辭條例司言青苗不便介甫尤怒乃定制策登科者不得與館職皆送審官與合入差遣以軾轍兄弟故也

龜山語錄云或謂荆公晚年詩多有譏謔神廟處若下注腳儘做得謗訕宗廟他日亦拈得出曰君子作事只是循一箇道理不成荆公之徒箋注人詩文陷人以謗訕宗廟之罪吾輩也便學他昔王文正公在中書寇萊公在密院中書偶倒用了印萊公須勾吏人行遣他日密院亦倒用了印中書吏人呈覆亦欲

行遣文正問吏人汝等且道密院當初行遣倒印者是否曰不是文正曰既是不是不可學他不是更不問如今日所罪謗訕宗廟毀謗朝政者自是是不是先王之時惟恐不聞其過故許人規諫至如舜求言乃立謗木是真欲人之謗己也書曰小人怨汝詈汝則皇自敬德蓋聖人之於天下常懼夫在己者有所未至故雖小人怨詈亦使人主自反詩三百篇經聖人刪過皆可以爲後王法今其所言譏諱時君者幾半不知當時遭謗訕之罪者幾人矣禁止謗訕自出於後世無道之君不是美事何足爲法

復齋漫錄云荆公旣排退之後而喜揚雄故著說以明劇秦非雄所作又爲詩以辨之曰豈嘗知符命何苦自投閣長安諸愚儒操行自爲薄謗誚出異己傳載因疎略孟軻勸伐燕伊尹干說毫扣馬觸兵鋒食牛要祿爵史官蔽多聞自古喜穿鑿蓋以投閣劇秦等事比伊尹干湯伯夷扣馬百里奚飯牛爲不足信也人之嗜好一有所惑如此然其後又作絕句以詠雄云他年未免投天閣虛爲新都著劇秦又古詩云歲晚天祿閣強顏爲劇秦者何邪

藝苑雌黃云僧惠洪冷齋夜話載介甫詩云春殘葉密花枝少睡起茶多酒盡疎多字當作親世俗傳寫之誤洪之意蓋欲以少對密以疎對親予作荆南教官與江朝宗匯者同僚偶論及此江云惠洪多妄誕殊不曉古人詩格此一聯以密字對疎字以多字對少字正交股用之所謂蹉對法也

復齋漫錄云荆公詩日高青女尙橫陳橫陳事見相如賦及楞嚴經云青女者主霜雪之神也故淮南子云至秋三月青女乃出降霜雪高誘注云青女乃天神青腰玉女主天霜雪荆公以青女爲霜於理未當杜子美秋野詩云飛霜任青女乃爲盡理梁昭明博山香爐賦云青女司寒紅光翳景亦皆爲霜雪神矣

許彥周詩話云.荆公愛看水中影.此亦性所好.如秋水瀉明河.迢迢藕花底.又桃花詩云.晴溝春漲綠周遭.俯視紅影移漁船.皆觀其影也.其後云.繁條弄芳畏腕脫.已見黍雪盤中毛.事見家語.

復齋漫錄云.前輩以荆公詩功謝蕭規慚漢第.恩同隗始詫燕臺.以臺爲失.史記云.爲隗改築宮而師事之.然太白詩云.何人爲築黃金臺.然則承襲之誤.其來久矣.藝苑雌黃云.予與鄉人翁行可同舟泝汎.因談及詩.行可云.介甫善下字.如荒埭暗雞催月曉.空場老雉挾春驕.下得挾字最好.如孟子挾貴挾長之挾.予謂介甫又有紫莧凌風怯.蒼苔挾雨嬌.陳無已有寒氣挾霜侵敗絮.賓鴻將子度微明.其用挾字亦與前一聯意同.

苕溪漁隱曰.王駕晴景云.雨前初見花間蕊.雨後兼無葉底花.蝶蝶飛來過牆去.應疑春色在鄰家.此唐百家詩選中詩也.余因閱荆公臨川集.亦有此詩云.雨來未見花間蕊.雨後全無葉底花.蜂蝶紛紛過牆去.卻疑春色在鄰家.百家詩選是荆公所選.想愛此詩.因爲改七字.使一篇語工而意足.了無鐫斧之迹.眞削鏹手也.

四六談麈云.荆公在金陵.有中使傳宣撫問.并賜銀盒茶藥.令中外各作一表.旣具藁.無可于公意.公乃自作.今見集中.其詞云.信使恩言.有華原隰寶奩珍劑.增貢邱園.蓋五事.見四句中.言約而意盡.衆以爲不及也.

司馬文正公日錄云.介甫在朝.每有中使宣召.及賜予所贈之物.常倍舊例.陰結內侍.都知張若水.押班藍元振.因能固上之寵.上使中使二人.潛察府界青苗.還皆言民便之.故上堅行不疑.

復齋漫錄云烏石崗距臨川三十里荆公外家吳氏居其間故詩云不知烏石崗邊路到老相尋得幾回鹽步門在荆公舊居之前故詩云曲池邱墓心空折鹽步庭闈眼欲穿臨川郡學在州治之東城隅之上其門庭之間有池不廣而旱嘆不竭世傳以爲王右軍墨池每當貢士之歲或見墨汁點滴如潑出於水面則次春郡人必有登科者荆公送和甫奉使江南詩爲我聊尋逸少池皆紀實也

復齋漫錄云陳無己詩話謂平甫以楊蟠金山詩爲莊宅牙人語解量四至詩云天末樓臺橫北固夜深燈火見揚州然余觀荆公金山詩前四句亦類此天末海門橫北固煙中沙岸似西興已無船舫猶聞笛遠有樓臺祇見燈苔溪漁隱曰平甫遊金山詩云北固山連三楚盡中濡水入九江深平甫譏楊蟠詩反自作此等語何也

復齋漫錄云平甫年十三登滕王閣賦詩云滕王平日好追遊高閣依然枕碧流勝地幾經興廢事夕陽偏照古今愁城中樹密千家市天際人歸一葉舟極目煙波吟不盡西山重疊亂雲浮時郡守張侯見而異之爲啓宴張樂于其上其後建中靖國元年其女識之於石云平甫元豐初以交鄭俠遂廢於家作詩云三見齊王不一言須知自古致君難紛紛齊虜誇迂闊口舌從來易得官

復齋漫錄云劉禹錫嘉話謂唐延英殿卽靈芝殿也謂之小延英余見雲齋廣錄載平甫熙寧六年冬直宿崇文院夢有人邀至海上見海中宮殿甚盛其中樂作題其宮曰靈芝平甫有詩紀之略云萬頃波濤木葉飛笙簫宮殿號靈芝則靈芝之號不特世間也余又觀平甫女名茂者石刻云曾子固舊有夢紀以述其事然子固之文世竟無蓄之者

東臯雜錄云，荆公在鍾山興國寺見一尼入寺，使蔡天啓集句嘲之云，不住薰爐換好香，爲他人作嫁衣裳。因過竹院逢僧話，始覺空門氣味長。又集句啄百行池魚云，門前流水清粼粼，赤鯉騰出如有神。君欲釣魚須遠去，慎勿近前丞相嗔。

許彥周詩話云，鍾山有一詩云，當年睥睨此山阿，欲戀紅樓貯綺羅。今日重來無一字，卻騎羸馬下坡陀。此王雱詩，雱訏直不爲荆公所喜，然此詩實可傳也。

賀方回

復齋漫錄云，方回辭有雁後歸云，巧剪合歡羅勝子，釵頭春意翩翩，艷歌淺笑拜嫣然，願郎宜此酒，行樂駐華年。未至文園多病客，幽襟悽斷堪憐，舊游夢掛碧雲邊，人歸落雁後，思發在花前。山谷守當塗，方過焉人日席上作也。腔本臨江仙，山谷以方回用薛道衡詩，故易以雁後歸云。唐劉餗傳記云，隋薛道衡聘陳，作人日詩曰，入春纔七日，離家已二年。南人嗤之，及云人歸落雁後，思發在花前，乃曰名下無虛士。



# 苕溪漁隱叢話後集卷第二十六

東坡一

東坡云余在潁州夢至一官居人物與俗無異而山川清遠有足樂者顧視堂上榜曰仇池覺而念之仇池武都氏故地楊難當所保余何爲居之明日以問客客有趙令疇德麟者曰何爲問此此乃福地小有洞天之附庸也杜子美詩云萬古仇池穴潛通小有天神魚人不見福地語真傳近接西南境長懷十九泉何時一茆屋送老白雲邊他日工部侍郎王欽臣仲至謂余曰吾嘗奉使過仇池有九十九泉萬山環之草木鮮叢可以避世如桃源也

苕溪漁隱曰東坡送范景仁游洛中詩蘚書標洞府松蓋偃天壇注云歐陽永叔嘗游嵩山日暮於絕壁上見苔蘚成文云神清之洞明日復尋不見又六一居士集有戲占唐山隱者詩我昔曾爲洛陽客偶向岩前坐盤石四字丹書萬仞崖神清之洞瑣樓臺蓋紀此事余謂二公人物文章俱爲天下第一自是神仙中人應居紫府闕苑固宜所夢所見之異也

苕溪漁隱曰子由作子瞻墓誌云公謫黃州幅巾芒屨與田夫野老相從溪谷之間築室於東坡自號東坡居士

元城先生語錄云士大夫只看立朝大節如何若大節一虧則雖有細行不足贖也東坡立朝大節極可觀才意邁峻惟己之是信在元豐則不容於元豐人欲殺之在元祐則雖與老先生議論亦有不合處非

隨時上下人也。

苦溪漁隱曰。余觀子瞻墓誌云。元祐二年。君實方議改免役爲差役。差役行於世。法久多弊。編戶充役。不習官府。吏虐使之。多以破產。而狹鄉之民。或有不得休息者。先帝知其然。故爲免役。君實爲人忠信有餘。而才智不足。知免役之害。而不知其利。欲以差役代之。方差官置局。公亦與其選。獨以實告。而君實始不悅矣。嘗見之政事堂。條陳不可。君實忿然。公曰。昔韓魏公刺陝西。義勇公爲諫官。爭之甚力。魏公不樂。公亦不顧。某昔聞公道其詳。豈今日作相。不容某盡言邪。君實笑而止。公知言不用。乞補外。不許。君實始怒。有逐公意。會其病卒。乃已。

藝苑雌黃云。東坡端午帖子皇帝閣云。微涼生殿閣。習習滿皇都。試問我民愠。南風爲解無。原其意。蓋欲聖君推南風之德。以及於黎庶也。唐文宗與柳公權聯句。東坡以爲公權有美而無箴。因續四句。其作端午帖子。用此意也。然洪駒父謂公權已含箴規之意。雖不必續可也。故呂氏家塾廣記云。說者謂公權有諷諫之意。以文宗樂廣廈之涼。而不知路有嘆死也。此語良是。觀公權嘗以筆諫。蓋造次不忘納君於善者。豈於此而無箴邪。又陳輔之以殿桷生餘涼。此兩字有功於修辭。予謂輔之此語。無甚意義。今世所傳。多只用公權舊語。故東坡詩。微涼生殿閣。習習滿皇都。又云。臥聞疎滴梧桐雨。獨咏微涼殿閣風。不聞有殿桷餘涼之說。

苦溪漁隱曰。東城所記湯泉。秦州之駱谷。渝州之陳氏山居。與秦君之所賦東坡。及匡廬。汝水。尉氏。驪山。後謫居惠州。游白水山。佛迹岩。浴於湯泉。共有其八矣。余之所見。新安之黃山。閩中之劍浦。亦有其二矣。

第湯泉多作硫黃氣浴之則襲人肌膚惟驪山是譽石泉李賀詩云華清源中譽石湯徘徊百鳳隨君王黃山是硃砂泉圖經云黃山舊名黟山黟山東峰下有硃砂湯泉熱可點茗春時卽色微紅昔人題詩云三十六峰高倚天瑤臺金闕貯神仙嵩陽若與黃山比猶少靈砂一道泉蓋爲是也余嘗謂湯泉其理不可致詰故東坡白水山湯泉詩云積火焚大槐蓄油災武庫驚燃丞相井疑浣將軍布自憐耳目隘未測陰陽故鬱攸火山裂嬖沸湯泉注豈惟渴獸駭坐使癡兒怖安能長魚鼈僅可燻狐兔山中惟木客戶外時芒屨雖無傾城浴幸免亡國汙唐子西湯泉記云佛迹院中湧二泉其東所謂湯泉其西雪如也二泉相去步武間而東泉熱甚殆不可觸指以西泉解之然後調適可浴意山之出二泉專爲浴者計哉或說炎州地性酷烈故山谷多湯泉或說水出硫黃地中卽溫初不問南北今臨潼湯泉乃在正西而炎州餘水未必皆熱則地性之說固已失之然以硫黃置水中水不能溫則硫黃之論亦未爲得吾意湯泉在天地間自爲一類受性本然不必有待然後溫也凡物各求其類而水性尤耿介得其類則雖千萬里而伏流相通非其類則橫絕徑過十字旁午而不相入故二泉之間不能容尋常而炎涼特異如此蓋亦無足怪者吹氣爲寒呵氣爲溫而同出於一口此其證也

六朝事迹云建康聖湯延禪寺隸湯山下舊有湯泉十所今存者六唐德宗時韓滉爲浙江觀察使滉小女有惡疾浴於湯應時而愈乃以女粧奩建精舍於湯山之右

藝苑雌黃云吟詩喜作豪句須不畔於理方善如東坡觀崔白驟雨圖云扶桑大繭如甕盎天女織絹雲漢上往來不遣鳳啣梭誰能鼓臂投三丈此語豪而甚工石敏若咏雪詩有燕南雪花大于掌冰柱懸簷

一千丈之語豪則豪矣。然安得爾高屋邪。雖豪覺畔理。或云咏雪非敏若詩見鮑欽止夷白堂小集苕溪漁隱曰東坡集載此詩是題趙令晏崔白大圖幅徑三丈故云往來不遺鳳啣梭誰能鼓臂投三丈可謂善造語能形容者也。畫品中止有李營邱驟雨圖從無崔白者兼東坡此詩又云人間刀尺不敢裁丹青付與濠梁崔風蒲半折寒雁起竹間的蹀橫江梅乃是崔白冬景圖藝苑以爲驟雨圖誤矣余又觀李太白北風行云燕山雪花大如席秋浦歌云白髮三千丈其句可謂豪矣奈無此理何如秦少游秋日絕句連卷雌蜺拱西樓逐雨追晴意未休安得萬粧相向舞酒酣聊把作纏頭此語豪而且工。

復齋漫錄云送顧子敦詩人間一好漢誰是張長史舊史張柬之爲荊州長史則天問狄仁傑曰安得好漢用之狄因薦柬之新史易好漢爲奇男子

苕溪漁隱曰余閱舊史云則天問仁傑曰朕要一好漢任使有乎仁傑曰荊州長史張柬之其人雖老真宰相才也溫公通鑑云太后嘗問仁傑朕欲得一佳士用之新史云武后謂仁傑曰安得一奇士用之孫之翰唐史論斷云武氏問仁傑曰我要一好人任使並不云奇男子復齋誤矣

東臯雜錄云顧子敦肥偉號顧屠故東坡送行詩有磨刀向猪羊之句以戲之又尹京時與從官同集慈孝寺子敦凭几假寐東坡大書案上曰顧屠肉案同會皆大笑又以三十錢擲案上子敦驚覺東坡曰且快片批四兩來

復齋漫錄云內翰顧子敦身體魁偉與山谷同在館中夏多晝寢山谷俟其耳熱熟寐即於子敦胸腹間寫字子敦苦之一日據案而寢既覺曰爾亦無如我何及還舍夫人詰其背字脫衣觀之乃山谷所題詩

云綠暗紅稀出鳳城暮雲樓閣古今情行人莫聽宮前水流盡年光是此聲此乃市塵多用此語以文背故山谷因以爲戲

東臯雜錄云東坡善嘲謔以呂微仲豐碩每戲曰公真有大臣體坤六二所謂直方大也後拜相東坡當制有云果藝以達有孔門三子之風直方而大得坤爻六二之動又嘗謁微仲值其晝寢久之方見便坐昌陽盆畜一綠龜坡指曰此易得耳唐莊宗時有進六目龜者敬新磨獻口號云不要鬧不要鬧聽取龜兒口號六隻眼兒睡一覺抵別人三覺微仲不悅

苕溪漁隱曰送小本禪師赴法雲云是身如浮雲安得限南北此二句乃老杜別贊上人詩中全語豈偶然用之邪題碧落洞詩云小語輒響答空山白雲驚此語全類李太白今印本誤作自雷驚不惟無意味兼與上句重疊也後自嶺外歸次韻江晦叔詩云浮雲時事改孤月此心明語意高妙參禪悟道之人吐露胸襟無一毫窒礙也

東坡元豐五年十二月十九日東坡生日也置酒赤壁磯下踞高峰俯鶴巢酒酣笛聲起於江上客有郭石二生頗知音謂坡曰笛聲有新意非俗工也使人問之則進士李委聞坡生日作新曲曰鶴南飛以獻呼之使前則青巾紫裘腰鑱而已旣奏新曲又快作數弄嘹然有穿雲裂石之聲坐客皆引滿醉倒委袖出嘉紙一幅曰吾無求於公得一絕句足矣坡笑而從之詩曰山頭孤鶴向南飛載我南游到九嶷下界何人也吹笛可憐時復犯龜茲

苕溪漁隱曰西清詩話云余嘗觀唐人西域記言龜茲國王與臣庶知樂者於大山間聽風雨之聲均節

成音後翻入中國如伊州涼州甘州皆龜茲至也又學林新編云前漢地里志上郡有龜茲縣應劭注曰龜茲音邱慈某案字書龜居達切又居求切蓋居求音鳩亦收在鳩字韻中然則龜茲當音鳩慈而應劭音龜作邱者于字書居求切誤調入邱音也其餘史書並音龜茲作邱慈實應劭唱其誤耳番夷名號有它音不讀如本字故可汗音檍寒闕氏音烟支谷蠡音祿黎狔氏音權精浩亹音閣門番汗音盤寒允吾音鉛牙先零音銑怜冒頓音墨特凡此皆變爲它音諸名山藏及各書亦不載者

苕溪漁隱曰後山詩話謂退之以文爲詩子瞻以詩爲詞如教坊雷大使之舞雖極天下之工要非本色余謂後山之言過矣子瞻佳詞最多其間傑出者如大江東去浪淘盡千古風流人物赤壁詞明月幾時有把酒問青天中秋詞落日繡簾捲庭下水連空快哉亭詞乳燕飛華屋悄無人桐陰轉午初夏詞明月如霜好風如水清景無限夜登燕子樓詞楚山修竹如雲異材秀出千林表詠笛詞玉骨那愁障霧冰肌自有仙風咏梅詞東武南城新堤固漣漪初溢宴流杯亭詞冰肌玉骨自清涼無汗夏夜詞有情風萬里捲潮來無情送潮歸別參寥詞缺月掛疏桐漏斷人初靜秋夜詞霜降水痕收淺碧鱗鱗露遠洲凡此十餘詞皆絕去筆墨畦徑間直造古人不到處真可使人一唱而三歎若謂以詩爲詞是大不然子瞻自言平生不善唱曲故間有不入腔處非盡如此後山乃比之教坊司雷大使舞是何每況愈下蓋其謬耳復齋漫錄云肉芝詩序曰頃在京師有鑿井得如嬰兒手以獻者臂指皆具膚理如生余聞之隱者曰此肉芝也與子由烹而食之按仙傳拾遺載進士蕭靖之掘地得物類人手肥嫩色微紅烹食之後遇異人曰嘗食仙藥因告之曰肉芝食之者多壽何東坡忘此邪

復齋漫錄云萬松亭在關山始麻城縣令張毅植萬松于道用以庇行者且以名其亭云未十年而松之存者十不及三四東坡元豐二年謫居黃州過而賦詩云十年種木百年規好德無人助我儀縣令若同倉庾氏亭松應長子孫枝天公不赦斧斤厄野火解憐冰零姿爲問幾株能合抱懸勦記取角弓詩崇寧以還坡文方禁故詩碑不復見而過往題咏者不可勝紀鄱陽倪左司濤傷之以詩云舊韻無儀字蒼鬚有恨聲謂此也

苕溪漁隱曰柳子厚王介甫以道傍大松人多取以爲用各以詩惜之子厚意雖自謂語反成晦不若介甫語顯而意適也子厚云孤松停翠蓋託根臨廣路不以險自防遂爲明所誤介甫云虬甲龍鬚不可攀亭亭千尺蔭南山自嗟無地逃斤斧豈願爭明爝火間余頃過衡嶽夾道古松最盛正有此患雖嶽祠相近官不能禁也

苕溪漁隱曰吾家有二畫馬乃陸遠所摹伯時舊本其一則子瞻詩龍膺豹股頭八尺奮迅不受人間羈其一則黃魯直詩西河聯作葡萄錦目光夾鏡耳卓錐止哦此二詩雖不見畫圖當如支遁語道人憐其神俊也

復齋漫錄云明皇雜綠言上所乘馬有玉花驄照夜白又異人錄言玉花驄者以其面白故又謂之玉面花驄故杜子美丹青引云先帝天馬玉花驄畫工如山貌不同觀曹將軍畫馬圖歌云曾貌先帝照夜白龍池十日飛霹靂苕溪漁隱曰李伯時亦嘗畫照夜白圖蔡天啓題詩云天上房星不下來連山窮衆飽駕駘龍姿逸駕飛騰盡賴爾毫端力挽回略似坡云

復齋漫錄云東坡筆記謂李將軍思訓作明皇摘瓜圖嘉陵山川帝乘赤驃起三驥與諸王嬪御十數騎出飛仙嶺下初見平陸馬皆若驚而帝馬見小橋不進正作此狀不知三驥謂何今乃見岑參詩有衛尚書赤驃馬歌云赤鬚胡籬金翦刀平時翦出一驥高乃知唐御馬多翦治而三驥其飾也以上皆東坡說也余讀白樂天詩云舞衣裁兩葉馬鬣翦三花楊巨源觀打毬詩云玉勒回時露赤汗花驥分處拂紅纓嚴維作勅命賜寧王馬詩亦有云鏡點黃金眼花開白雪驥何東坡獨忘樂天等詩邪余又嘗見小說言開元天寶間世尚輕肥多愛三花飾馬郭若虛家藏韓幹畫貴戚閱馬圖中有三花馬蘇大參家有韓幹畫三花御馬晏元獻家張一畫號國出行圖其上亦有三花馬蓋三花馬翦驥爲三瓣耳

茗溪漁隱曰東坡題伯時畫馬云龍眠胸中有千駟議者謂譏其無德而稱余意其不然如文與可善作墨竹故和賀山谷云料得清貧餓太守渭濱千畝在胸中豈亦是譏之邪又山谷咏伯時虎脊天馬圖亦云筆端那有此千里在胸中蓋言畫馬之妙得之於心應之於手若輪扁之斲輪也

復齋漫錄云山谷次韻子瞻和子由觀韓幹馬因論伯時畫天馬云曹霸弟子沙苑丞喜作肥馬人笑之李侯論幹獨不爾妙畫骨相遺毛皮翰林評書乃如此贊肥貴瘦渠未知蓋謂東坡嘗作孫莘老墨妙亭詩云嶧山傳刻典型在千載筆法留陽冰杜陵評書貴瘦硬此論未公吾豈憑短長肥瘦各有態玉環飛燕誰敢憎意屬此也

茗溪漁隱曰山谷題伯時天育驃騎圖云明窗盤礴萬物表寫出人間真乘黃邂逅今身猶姓李可非前世江都王山谷用此事於伯時尤爲親切姓與藝皆同也江都王畫馬今猶有存者陳去非嘗跋以小詩

云天上房是空不動人間畫馬亦難逢當年筆下千金鹿此日窗前八尺龍  
塵史云古之善作詩者工用人語渾然若出於己予於李杜見之顏延年赭白馬賦云旦刷幽燕畫秣荆  
越子美驄馬行云晝洗須騰涇渭深夕趨可刷幽并夜太白天馬歌云雞鳴刷燕哺秣越皆出於顏賦也  
退之云李杜文章在光焰萬丈長信哉

許彥周詩話云老杜作曹將軍丹青引云一洗萬古凡馬空東坡觀吳道子畫壁詩云筆所未到氣已吞  
吾不得見其畫矣斯評也二公之句各可以當之

復齋漫錄云老杜贈曹將軍霸詩云開元之中嘗引見承恩數上黃金殿凌烟功臣少顏色將軍下筆開  
生面良相頭上進賢冠猛將腰間大羽箭褒公鄂公毛髮動英姿颯爽來酣戰鄂公謂尉遲敬德褒公謂  
段志元也故東坡贈寫真何充詩云黃冠野服山家客意欲置我山岩中勛名將相今何在枉寫褒公與  
鄂公蓋用此也鮑欽止亦作謝傳神蔡景直云馳譽丹青有古風筆端及我未宜蒙雲臺麟閣遙相望枉  
寫褒公與鄂公用東坡語尤爲無功

東觀餘論云閣中集名畫記唐志皆作韋鷗子美有韋偃畫馬詩偃當作鷗蓋傳寫之誤曹將軍畫馬神  
勝形韓丞畫馬形勝神鷗從容二人間第筆格差不及耳



# 苕溪漁隱叢話後集卷第二十七

東坡二

復齋漫錄云古樂府張正見雉子斑云惟當渡弱水不怯如臯箭毛處約雉子斑云能使如臯路相迎巧笑間蓋用賈大夫事耳而黃朝英紺素雜記乃謂東坡錯用如臯事故云不向如臯閑射雉歸來何以得卿卿蓋承古樂府之誤耳若潘安仁射雉賦云昔賈氏之如臯試解顏之一笑山谷南園記云可盡記子之言我將鐫之南園之石他日御以如臯雖不獲雉尙期一笑哉若二公者真可謂得傳意

復齋漫錄云號國夫人夜遊圖詩當時亦笑張麗華不知門外韓擒虎蓋全用小杜臺城曲兩句云門外韓擒虎樓頭張麗華凡此取陳後主張貴妃名麗華尤見寵幸隋遣韓擒虎平陳後主與麗華俱被收今之坡詩爲誤作潘麗華遂致黃朝英紺素雜記以東坡爲誤蓋彼不記小杜詩也

藝苑雌黃云前漢龔遂傳有令民種一百本薤五十本葱之說坡和段逢詩云細思種薤五十本大勝取禾三百廛則誤以一百本爲五十本矣陳孔章爲袁紹檄豫州又言曹操之罪云特置發邱中郎摸金校尉所過隳突無骸不露遊聖女山詩云縱令司馬能鐫石奈有中郎解摸金則誤以校尉爲中郎矣盧氏雜說鄭餘慶召親朋呼左右曰處分廚家爛蒸去毛莫拗折項諸人以謂蒸鵝鴨良久就食每人前粟米飯一孟爛蒸葫蘆一枚贈陳季常詩云不見盧懷慎蒸壺似蒸鵝則又以鄭餘慶爲盧懷慎雪詩押簷字一聯云敗屨尙存東郭指飛花又舞謫仙簷東郭指正用雪事出史記滑稽譜謫仙簷蓋取李太白詩所

謂飛花送酒舞前簷者，卽無雪事矣。贈王子直詩云：水底笙歌蛙兩部，山中奴隸橘千頭。誰不愛其語之工？然南史孔德彰門庭之內，草萊不翦，中有蛙鳴。或問之曰：欲爲陳蕃乎？曰：我以此當兩部鼓吹，何必效蕃？卽無笙歌之說。次韻滕元發寄詩云：坐看青邱吞澤芥，自慚黃潦薦溪蘋。按子虛賦云：秋田平青邱，傍徨乎海外。吞雲夢者八九於其胸中，曾不蒂芥。蒂芥刺鯁也，非草芥之芥。西湖詩亦有青邱已吞雲夢芥之說，皆非也。

谷庵銘云：孔公之堂名虛白，蘇子堂後作圓屋，堂雖白矣，庵自黑。知白守黑，名曰谷。老子曰：知其雄，守其雌；爲天下谿，知其白，守其黑；爲天下式，知其榮，守其辱。爲天下谷，然則知白守黑，不可謂之名曰谷也。又詩中言宋廣平爲鐵心，夏仲御爲木腸，亦皆與本處不合。

復齋漫錄云：玉仙觀在京城東南宣化門七八里間。仁宗時，陳道士所修葺，花木亭臺，四時遊客不絕。東坡詩所謂玉仙洪福花如海是也。和徐積詩：殺雞未肯邀季路，裏飯應須問子來。按莊子書：子祀、子輿、子犁、子來，四人相與爲友。然無裏飯之事。莊子書又載子輿、子桑友，而霖雨十日。子輿曰：子桑殆病矣。裏飯而往食之，方知裏飯者，子輿子桑，非子來也。東坡此詩爲誤觀退之贈崔立之詩云：昔者十日雨，子來寒且飢。其友名子輿，忽然憂且思，褰裳觸泥水，裏飯往食之，好事漆園吏，書之存雄辭。然其失，自退之矣。藝苑雌黃云：老杜房公池鵝詩，鳳凰池上應回首，爲報籠隨王右軍。山谷題劉將軍畫鵝詩，還似山陰書罷舉羣驅向王家。而前輩詩又有鵝費義之墨，書罷籠鵝去，數紙尙可博白鵝。山陰不見換鵝經，白鵝曾換右軍書，皆不斥言所書者何經。西清詩話載李白詩：山陰道士如相訪，爲寫黃庭換白鵝。考之晉史，逸

少所寫乃道德經非黃庭也太白蓋誤用此事比觀梅聖俞謝宋元憲贈鵝詩昔居鳳池上曾食鳳池萍乞與江湖去從教養素飴不同王逸少辛苦寫黃庭聖俞此語豈亦承太白之誤歟又觀白氏六帖所載亦言黃庭經則古人誤用此事非獨太白爲然也若溪漁隱曰呂居仁寄朱希真詩云主人鵝可換更爲寫黃庭亦沿襲誤用也余謂太白又有詩云掃素寫道經筆精妙入神書罷籠鵝去何曾別主人則又謂道德經矣

東觀餘論云世傳黃庭經爲逸少書僕嘗攷之非也按陶隱居真誥翼真檢論上清真經始末云晉哀帝興寧二年南嶽魏夫人所授弟子司徒公府長史楊君使作隸字寫出以傳護軍長史許君及子上計掾以付子黃民民以傳孔點後爲王興先竊寫之度江飄淪惟有黃庭一篇得存蓋此經也僕按甲子歲逸少以晉穆帝升平五年卒是年歲在辛酉後二年卽哀帝興寧二年始降黃庭於世安得逸少預書之又案梁虞龢論書表云山陰曇礪村養鵝道士謂羲之曰久欲寫河上公老子兼素早辦而無人能書府君若能自屈書道德經兩章便合羣以奉於是羲之便停半日爲寫畢攜鵝去而晉書本傳亦著道士云爲寫道德經當舉羣相贈耳初未嘗言寫黃庭也以二書考之卽黃庭非逸少書無疑然陶隱居與梁武帝啓云逸少有名之迹不過數首黃庭勸進告誓等不審猶有存否蓋此啓在著真誥前殆未之考證耳至唐張懷瓘作書帖云樂毅黃庭但得幾篇卽爲國寶遂誤以爲逸少書李太白承之作詩山陰道士如相訪爲寫黃庭換白鵝苟欲隨之耳初未嘗致之而韓退之第云數紙尙可博白鵝而不云黃庭豈非覺其謬歟

苕溪漁隱曰世傳黃庭經樂毅論遺教經蘭亭序皆爲王會稽書余觀諸公評論各有區別今悉著於篇蓋欲其知是否耳永叔云黃庭經二篇皆不著書人姓名余初得石本已愛其不俗遂錄之既而又得前本於殿中丞裴造造好古君子也自言藏此本數世矣世傳王羲之嘗寫黃庭經此豈其遺法歟魯直云黃庭經王氏父子書皆不可復見小字殘缺者云是永禪師書旣刓缺亦難辨真僞差大者是吳通微書字形差長而瘦勁筆圓勝徐浩書也二公雖不明言黃庭經爲王會稽書然亦疑似其語蓋牽於世俗之傳故耳永叔云樂毅論石在高紳學士家紳死好事者往往就閱或模傳其本其家祕藏漸爲難得後其子弟以其石質錢於富人家而富人家失火遂焚其石今無復石本矣金石錄云集古錄言樂毅論石已焚之非也元祐間故郎官趙竦常挈石隨行已斷裂則木匣貯之沈存中云王羲之書舊傳惟樂毅論乃羲之親書於石其他皆紙素所傳唐太宗哀聚二王墨蹟惟樂毅論是石本其後隨太宗入昭陵朱梁時耀州節度使溫韜發昭陵得之後傳人間或云公主以僞本易之元不會入墳本朝藏高紳學士家皇祐中紳之子安世爲錢塘主簿樂毅論猶在予嘗見之時石已破缺末後獨有一海字者是也後十餘年安世在蘇州石已破爲數片以鐵束之安世亡不知所在或云蘇州一富家得之今之樂毅論皆其摹本也魯直云樂毅論舊石刻軼其半者字瘦勁無俗氣後有人復刻此斷石文摹傳失真多矣其完書者是國初翰林侍書王著寫用筆圓熟亦不易得如富貴人家子弟非無福氣但病在韻耳觀此則樂毅論時所珍愛如此但舊本今難得耳永叔云遺教經相傳云羲之書僞也蓋唐世寫經手所書耳唐時佛書今在者大抵書體皆類此第其精粗不同耳近有得唐人所書經題其一云薛稷一云僧行敦皆與二人所書

不類而與此頗同。卽知寫經手所書也。然其字亦可愛。子瞻云。歐公言遺教經。非逸少筆。以其言觀之。信不安。然自逸少在時。小兒亂真。自不解辨。況數百年後。傳刻之餘。而欲必其真。僞難矣。顧筆畫精穩。自可爲師法。魯直云。遺教經不知何世何人書。或曰右軍書。黃庭堅曰。吾評此書。在楷法中小不及樂毅論耳。清勁方重。蓋度越蕭子雲數等。頃見瘞鶴銘大字。右軍書其勝處。乃不可名貌。以此觀之。良非右軍筆畫也。則諸公之論如此。其遺教經非王會稽書審矣。永叔云。蘭亭修禊序。世所傳本尤多。而皆不同。蓋唐數家所臨也。其轉相傳摹。失真彌遠。然時猶有可喜處。豈其筆法。或得其一二邪。想其真蹟。宜如何也。世言真本。葬在昭陵。唐末之亂。昭陵爲韜所發。其所藏書畫。皆剔取裝軸金玉而棄之。於是魏晉傳授以來。諸賢墨蹟。遂復流落於人間。太宗時。搜訪所得。集爲十卷。俾摹傳之。數以分賜近臣。今公卿家有法帖是也。然獨蘭亭真本已失。故不得列於法帖。以傳子瞻云。唐太宗訪晉人書。自二王以下。僅千軸。蘭亭文以玉匣。葬昭陵。世無復見。故孫莘老咏墨妙亭詩云。蘭亭繭紙入昭陵。世間遺蹟猶龍騰。魯直云。王右軍禊飲序草。號稱最得意書。宋齊以來。似藏在祕府。士大夫間。未聞稱述。豈未經大盜兵火時。蓋有墨蹟在蘭亭。右者。及蕭氏字文。焚蕩之餘。千不存一。永師晚出。其妙蹟惟有蘭亭。故爲虞褚輩道之。所以太宗求之。百方期於必得。其後公私相盜。今竟失之。書家晚得定武石本。蓋彷彿存古人筆意耳。又云蘭亭序草。王右軍平生得意書也。反復觀之。略無一字一筆。不可人意。摹寫或失之肥瘦。亦自成妍。要各存之。以心會其妙處耳。余性亦嗜古刻。所得蘭亭序。亦數本。肥瘦不同。並存之。聊爲佳玩。洪慶善頃知憲江左。以黃庭經樂毅論見遺。殘缺過半。云得之鄱陽。余觀祕閣曠帖。有此二刻。皆完好無一字殘缺。則知此爲舊本矣。

藝苑雌黃云古人詩押字或有語顛倒而於理無害者如韓退之以參差爲差參以玲瓏爲瓈玲是也比觀王逢原有孔融詩云虛云座上客常滿許下惟聞笑習脂黃魯直有和荆公西太一宮六言詩云啜羹不如放麌樂羊終愧巴西按後漢史有脂習而無習脂有秦西巴而無巴西豈二公之誤邪漢臯詩話云字有顛倒可用者如羅綺綺羅圖畫畫圖毛羽羽毛白黑黑白之類方可縱橫惟韓愈孟郊輩才豪故有湖江白紅慨慷之句後人亦難倣之若不學矩步而學奔逸誠恐麟麒麟鳳凰木草川山之句紛然矣復齋漫錄云韓子蒼言作語不可太熟亦須令生近人論文一味忌語生往往不佳東坡作聚遠樓詩本合用青江綠水對野草閑花以此太熟故易以雲山烟水此深知詩病者予然後知陳無己所謂寧拙毋巧寧朴毋華寧粗毋弱寧僻毋俗之語爲可信

許彥周詩話云季父仲山在揚州時事東坡先生聞其教人作詩曰熟讀毛詩國風與離騷曲折盡在是矣僕嘗謂此語太高後年齒益長乃知東坡之善誘人也

復齋漫錄云錢穆父試賢良對策日東坡晚往迓其歸置酒相勞各舉爲文穆父得傀儡除鎮南軍節度使制首句云勤勞王家出入幕府東坡見此兩句大加歎賞蓋世以傀儡起於王家也

師友談苑云東坡令門人輩作人不易物賦或戲作曰伏其几而襲其裳豈惟孔子學其書而戴其帽未是蘇公蓋當時士大夫倣東坡桶高簷短帽名曰子瞻樣焉因言之公笑曰近扈從燕醴泉觀優人以相與自誇文章爲戲者一優曰吾之文章汝輩不可及也衆優曰何也汝不見吾頭上子瞻乎上爲解顏顧公久之

藝苑雌黃云予與潘伯龍食榧子乃言諸處榧皆不及玉山者予方悟東坡詩有彼美玉山果粲爲金盤實之語恐是上饒玉山縣潘云玉山地名在婺之東陽縣所生榧子香脆過它處予攷集韻榧字注云木名有實出東陽諸郡而本草榧實注亦云今出東陽諸郡

東坡云無事靜坐便覺一日似兩日若能處置此生常似今日得年至七十便是百四十歲人世間何藥能有此効既無反惡又省藥錢此方人人收得但苦無好湯使多嚥不下坡題息軒詩云無事此靜坐一日如兩日若活七十年便是百四十正此意也苕溪漁隱曰余連塞選調四十年在官之日少投閑之日多固能知靜坐之味矣第向平婚嫁之志未畢退之啼號之患方劇正所謂無好湯使多嚥不下也苕溪漁隱曰吳興澤國也春夏之交地尤卑濕仍多蚊蚋子瞻作守日有詩云風定軒窗飛豹腳雨餘欄楯上蝸牛真紀實也舊說秦州西溪濱海多蚊范文正爲監鹽題詩云飽去櫻桃重飢來柳絮輕但知離此去莫要問前程想與吳興同患也

龜山語錄云因論蘇明允衡書權書觀其著書之名已非豈有山中逸民立言垂世乃汲汲於用兵如此所見安得不爲荆公所薄曰大蘇以當時不去二虜之患則天下不可爲又其審敵篇引晁錯說景帝削地之策曰今日夷狄之勢是亦七國之勢其意蓋欲掃蕩二虜然後致太平且曰才以用兵爲事只見騷擾何時是天下息肩時節以仁宗之世視二虜豈不勝如戰國時然而孟子在戰國時所論全不以兵爲先豈以崇虛名而受實弊乎亦必有道矣

苕溪漁隱曰龜山謂老蘇爲荆公所薄余觀張安道作老蘇墓表老蘇亦自鄙荆公蓋道不同不相爲謀

宜其矛盾如此。墓表云：嘉祐初，王安石名始盛，黨友傾一時，其命相制曰：生民以來，數人而已，造作語言，至以爲幾于聖人。歐陽修亦與之善，勸先生與之游，而安石亦願交于先生。先生曰：吾知其人矣，是不近人情者鮮，不爲天下患。安石之母死，士大夫皆弔之，先生獨不往，作辨奸論一篇，當時見之者多不謂然。曰：嘻，其亦太甚矣！先生旣歿，三年之後，而安石用事，其言乃信。

苕溪漁隱曰：題吳江三賢堂內陸龜蒙詩云：千首文章二頃田，囊中未有一錢看。卻因養得能言鴨，驚破王孫金彈丸。談苑云：陸龜蒙居笠澤，有內養自長安使杭州舟經舍下，彈綠頭鴨。龜蒙遽從舍出大呼云：此綠鴨有異，善人言，適將獻天子，今將此死鴨以詣官。內養少長宮禁，信然厚以金帛遺之。因徐問龜蒙曰：此鴨何言？龜蒙曰：常自呼其名，內養憤且笑。龜蒙還其金曰：吾戲耳。

苕溪漁隱曰：遊道場山何山詩云：白水田頭問行路，小溪深處是何山。高人讀書夜達旦，至今山鶴鳴夜半。汪彥章何山何氏書堂記云：寺有何氏書堂圖記，相承以何氏爲晉何楷，嘗讀書此山，後爲吳興太守，以其居爲寺，而名其山。

許彥周詩話云：燕燕于飛，差池其羽。之子于歸，遠送于野。瞻望弗及，泣涕如雨。此真可泣鬼神矣。張子野長短句云：眼方不知人遠，上溪橋。東坡送子由詩云：登高回首坡壠隔，惟見烏帽出復沒。皆遠紹其意。

苕溪漁隱叢話後集卷第二十八

東坡三

東坡云黃州西山麓斗入江中石色如丹傳云曹公敗處所謂赤壁者或曰非也曹公敗歸由華容路路多泥濘使老弱先行踐之而過曰劉備智過人而見事遲華容夾道皆葭葦若使縱火吾無遺類矣今赤壁少西對岸卽華容鎮庶幾是也然岳州復有華容縣竟不知孰是今日李委秀才來因以小舟載酒飲於赤壁下李善吹笛酒酣作數弄風起水湧大魚皆出山上有栖鶴亦驚起坐念孟德公瑾如昨日耳江夏辨疑云周瑜敗曹公於赤壁三尺之童子能道其事然江漢之間名赤壁者三焉一在漢水之側竟陵之東竟陵今復州一在齊安郡之步下齊安今黃州一在江夏西南二百里許陽縣今屬漢予謂郡之西南者正曹公所敗之地也按三國志建安十三年七月曹公南征劉表表卒其子琮代屯襄陽劉備屯樊旣而琮降備走夏口冬公自江陵征備至赤壁戰不利又周瑜傳曰備進住夏口孫權遣瑜等與備并力逆曹公遇於赤壁夫操自江陵而下備與瑜由夏口往而逆戰則赤壁明非竟陵之東與齊安之步下者也故酈道元水經注云江水又東左逕百丈山南右逕赤壁山北昔周瑜與黃蓋詐魏武大將軍處也江水又東逕大軍山南由是觀之以大軍山而考合其處所可以無疑矣此嘉魚圖經所謂赤壁山在縣西北步道七十里者也夫山川土地異處而同名者寧復少哉如熊耳山爲導洛所自者乃在於虢而敗赤眉積甲與山齊者自在洛矣比見詩人所賦赤壁多指在於齊安蓋齊安與武昌相對意以孫氏居武昌而常爲曹公

所攻卽戰於此者邪。客亦有謂予曰：今九江之下有散花洲，乃瑜戰勝犒燕軍士散花於此也。嗚呼，是信習俗之過也。

東坡云：爛蒸同州羔，灌以杏酪食之以七，不以筋。南都撥心麵作槐芽溫淘，糆以襄邑抹猪炊，共城香稻薦以蒸子鵝。吳興庖人所斫松江鱸鮆繼以廬山康王谷水烹，曾抗鬪品茶少焉。解衣仰臥使人誦東坡赤壁前後賦，亦足以一笑也。

苦溪漁隱曰：東坡於飲食作詩賦以寫之，往往皆臻其妙。如老饕賦、豆粥詩，是也。又寒具詩云：纖手搓來玉數尋，碧油煎出嫩黃。深夜來春睡無輕重，壓扁佳人纏臂金。寒具乃捻頭也。出劉禹錫佳話，過子忽出新意。以山芋作玉糆羹，色香味皆奇絕。添酥醍則不可，知人間決無此味也。詩云：香似龍涎仍釀白，味如牛乳更全清。莫將北海金鑾鮆錯比東坡玉糆羹。

上庠錄云：兩學公廚例於三八課試日設別饌。春秋炊餅，夏冷淘，冬饅頭，而饅頭尤有名。士人得之，往往轉送親識。詢前輩云：元豐初，神廟留神學校，嘗恐飲食菲薄，不足以養士。一日有旨詣學，取學生食以進。其日食饅頭，神廟嘗之曰：朕以此養士，可無愧矣。自是飲食稍豐潔，而饅頭遂知名。

唐子西語錄云：余作南征賦，或者稱之。然僅與曹大家爭衡耳。東坡之赤壁二賦，一洗萬古。欲髣髣其一語，畢世不可得也。

苦溪漁隱曰：赤壁後賦云：適有孤鶴橫江東來，翅如車輪。元裳縞衣，戛然長鳴，掠予舟而西也。須臾客去，予亦就睡。夢二道士羽衣翩躚過臨臯之下，揖予而言曰：赤壁之遊樂乎？問其姓名，俛而不答。嗚呼，噫嘻，語畢世不可得也。

我知之矣。疇昔之夜，飛鳴而過我者，非子也邪？道士顧笑予，亦驚悟。此賦初言，適有孤鶴橫江東來，中言夢二道士羽衣翩躚，末言疇昔之夜，飛鳴而過我者，前後皆言孤鶴，則道士不應言二矣。余嘗見陸遠畫赤壁二賦，因以此詰之。渠爲之閣筆高道傳言天寶十三年重陽日，明皇獵於沙苑，雲間有孤鶴徘徊，上親射之，其鶴帶箭翥于西南，衆極目久之，不見。益州城西有道觀，徐佐卿嘗自稱青城山道士，一歲凡三四至觀，一日忽自外歸，攜一箭謂人曰：吾行山中，偶爲此矢所中，已無恙矣。然此箭非人間所有，越明年，箭主至此，當付之。復題其時云：十三載九月九日也。明皇狩蜀至觀，見其箭，命取閱，驚異之，乃知沙苑所射之鶴，卽佐卿也。此賦指道士爲鶴，正暗用此事。

復齋漫錄云：東坡謫居黃州五年，赤壁有巨鶴栖於喬木之上。後賦所謂攀栖鶴之危巢，俯馮夷之幽宮，是也。韓子蒼靖康初守黃州，三月而罷，因遊赤壁，而鶴巢已亡，作詩示何次仲云：緩尋翠竹白沙游，更挽藤稍上上頭。豈有危巢尙栖鶴，亦無陳迹但飛鷗。經營二頃將歸老，眷戀羣山爲少留。百日使君何足道，空餘詩句在江樓。次仲和答云：兒時宗伯寄吾州，諷誦高丈至白頭。二賦人間真吐鳳，五年江上不驚鷗。鶴當見水人猶怒，鶴有危巢孰敢留。珍重使君尋故迹，西風悵望古城樓。二首皆言鶴巢，蓋推賦而言也。藝苑雌黃云：古人文章中多言盧橘。李白詩：盧橘爲秦樹。蒲桃出漢宮。宋之間詩：芙蓉秦地沼。盧橘漢家園。又云：冬花掃盧橘，夏果摘楊梅。戴叔倫詩：盧橘花開楓葉衰。而蔡君謨荔枝譜亦云：道里遼絕，曾不得班於盧橘。江橙之右，皆不顯言盧橘爲何物。東坡集中言真覺院有洛花，花時不暇往。四月十八日與劉景文同往賞枇杷，作詩有魏花非老伴，盧橘是鄉人之句。蓋指盧橘爲枇杷也。故僧惠洪冷齋夜話載此。

意而筠谿甘露集中有嘗盧橘一絕云皮似椑柿鬆而剝核如龍眼味甘鮮滿盤的礫如金彈叢子分嘗憶去年此正謂枇杷然山谷以謂夔湘間有一種色黑而夏熟者疑其爲盧橘則與東坡之意相戾予嘗攷之伊尹書曰果之美者箕山之東青鳧之所有盧橘其夏熟吳錄曰朱光祿爲建安庭有橘冬覆其樹春夏色變青黑色絕美上林賦曰盧橘夏熟近是也魏書花木志曰蜀土有給客橙似橘而非若柚而香冬夏花實相繼通歲食之亦名盧橘則慮橘似非枇杷故上林賦旣言盧橘夏熟又言枇杷燃柿不應如此重複不知東坡何所據而言復齋漫錄云唐庚子西李氏山園記云枇杷盧橘一也而上林賦曰盧橘夏熟黃柑橙棃枇杷燃柿亭奈厚朴則一物爲二物矣然予觀張勃吳興錄云建安郡中有橘冬月於樹上覆裹之至明年春夏色變青黑色尤絕美上林賦云盧橘夏熟盧黑也蓋近是乎張勃之說旣如此則相如之賦殆未可以爲失也

芥溪漁隱曰東坡書劉景文所藏王子敬帖云家雞野鶩同登俎春蚓秋蛇總入奩君家兩行十二字氣壓鄴侯三萬籤此帖乃右軍帖云奉橘三百枚霜未降未可多得東坡以爲子敬帖誤矣韋應物答鄭騎曹青橘絕句云憐君臥病思新橘試摘尤酸亦未黃書後欲題三百顆洞庭須待滿林霜應物嘗爲蘇州刺史所言洞庭卽太湖中洞庭山或云用洞庭湖橘洲事非也魯直謝檀君寄黃柑云色深林表風霜下香著尊前指爪閒書後合題三百顆頻隨驛使未爲慳右軍又一帖云奉黃柑二百不能佳想故得至耳魯直誤用爲三百豫章集又載魯直語余往時以爲右軍帖中贈予黃柑三百者亦誤也右軍前一帖在賜書堂法帖中後一帖在劉次莊法帖中皆墨本也

苦溪漁隱曰東坡帥定武和曾仲錫元日見寄云燕南異事真堪紀三寸黃柑擘永嘉宋武帝子義康時遣還東府取柑供御大者三寸見南史

復齋漫錄云去杭十五年復游西湖詩斷章云誰憐寂寞高常侍老去狂歌憶孟諸高適有兩詩言孟諸其一云朝臨孟諸上忽見芒碭間赤帶終已矣白雲長不還其後又有封邱詩云我本漁樵孟諸野一生自是悠悠者乍可狂歌草澤中寧堪作吏風塵下東坡所用乃後一篇也

苦溪漁隱曰雪詩云紛紛兒女爭所似碧海長鯨君未掣用杜詩或看翡翠蘭苕上未掣鯨魚碧海中又云泥乾路穩放君去莫倚馬蹄如踏鐵用杜詩腕促蹄高如踏鐵交河幾蹴層冰裂書李公擇白石山房云偶尋流水上崔嵬五老蒼顏一笑開若見謫仙煩寄語匡山頭白早歸來用杜詩不見李白云匡山讀書處頭白早歸來東坡嘗作李氏山房藏書記云余友李公擇少時讀書於廬山五老峰下白石菴之僧舍公擇旣去而山中之人思之指其所居爲李氏山房藏書凡九千卷此詩雖言謫仙實指公擇以事與姓皆同故也又濟南和公擇詩云敝裘羸馬古河濱野闊天低穆玉塵自笑浪蕪典屬國來看換酒謫仙人爲蘇李也東坡作詩用事親切類如此它人不及也

苦溪漁隱曰謁告絕句云心有何求遣病安年來古井不生瀾祇愁戲瓦閑童子卻作泠泠一水看事見楞嚴經月光童子室中安禪我有弟子窺窗觀室惟有清水徧在室中了無所見童稚無知取一瓦礫投於水內激水作聲顧盼而去我出定後頓覺心痛爾時童子捷來我前說如上事我則告言汝更見水可

卽開門入此中除去瓦礫童子奉教我後出定身質如初古樂府云昔有行道人陌上見三叟年各百餘歲相與鋤禾莠中叟前致辭室內嫗粗醜故薄薄酒云醜妻惡妾壽乃公用此意也次韻李邦直感舊云婉婉有時來入夢溫柔何日聽還鄉用退之旅宿夢婉婉之句溫柔鄉事見飛燕外傳

東坡云世之蓄某詩文者多矣率真僞相半又多爲俗子所改竄讀之使人不平然亦不足怪識真者少蓋從古所病李太白韓退之白樂天詩文皆爲庸俗所亂可爲太息苦溪漁隱曰東坡文集行於世者其名不一惟大全備成二集詩文最多誠如所言真僞相半其後居世英家刊大字東坡前後集最爲善本世傳前集乃東坡手自編者隨其出處古律詩相間謬誤絕少如御史府諸詩不欲傳之於世老人行題申王畫馬圖非其所作故皆無之後集乃後人所編惜乎不載和陶諸詩大爲闕文也山谷亦有兩三集行於世惟大字豫章集并外集詩文最多其間不無真僞其後洪玉父別編豫章集朱彫李敦儒正是詩文雖少皆擇其精深者最爲善本也

復齋漫錄云東坡作諫論云魏鄭公以蘇張之辨而爲諫諍之術且云鄭公之初實學縱橫之術其所以與蘇張異者心正也世或以東坡之論爲不然余讀鄭公出關詩云中原還逐鹿投筆事戎軒縱橫計不就慷慨志猶存策杖謁天子驅馬出關門請纓羈南越憑軾下東藩鬱紆陟高岫出沒望平原古木鳴寒鳥空山蹄夜猿旣傷千里目還驚九折魂豈不憚艱險深懷國士恩季布無二諾侯羸重一言人生感意氣功名誰復論東坡實不見此詩蓋識見之明有以探其然耳乃知讀書未博未可以輕議前輩也

苦溪漁隱曰余讀三蘇文有諫論上下二篇其間云吾觀昔之臣言必從理必濟莫若唐魏鄭公其初實

學縱橫之說此所謂得其術者也其言止此而已復齋乃云鄭公以蘇張之辨而爲諫諍之術其所以與蘇張異者心正也諫論中初無此等語不知復齋何從得之邪余觀諫論殆是老蘇作格力辭旨可以見矣非東坡所作也

復齋漫錄云東坡初登第以書謝梅聖俞以示歐文忠公公答聖俞書略云不意後生能達斯理也吾老矣當放此子出一頭地故東坡送晁美叔詩云醉翁遺我與子游翁如退之蹈軻邱尙欲放予出一頭酒醒夢斷四十秋蓋敍書語也

文昌雜錄云余見光祿卿解賓王說登州每晴霽烟霧中有城闕樓閣人物車馬雞犬往來之狀彼人謂之海市苔溪漁隱曰東坡言予聞登州海市久矣父老云嘗出於春夏今歲晚不復見矣予到官五日而去以不見爲恨禱於海神廣德王之廟明日見焉乃作此詩云東方雲海空復空羣仙出沒空明中蕩搖浮世生萬象豈有貝闕藏珠宮心知所見皆幻影敢以耳目煩神工歲寒冰冷天地閉爲我起蟄鞭魚龍重樓翠阜出霜曉異事驚倒百歲翁人間所見容力取世外無物誰爲雄卒然有請不我拒信我人厄非天窮潮陽太守南遷歸喜見石廩堆祝融自言正直動山鬼豈知造物哀龍鍾信眉一笑豈易得神之報汝亦已豐斜陽萬里孤鳥沒但見碧海磨青銅新詩綺語亦安用相與變滅隨東風



# 苕溪漁隱叢話後集卷第二十九

東坡四

東坡云世謂樂天有鬻駱馬放楊柳枝詞嘉其主老病不忍去也然夢得有詩云春盡絮飛留不得隨風好去落誰家樂天亦云病與樂天相伴住春隨樊子一時歸則是樊素竟去也予家有數妾四五年相繼辭去獨朝雲者隨予南遷因讀樂天集戲作此詩朝雲姓王氏錢塘人嘗有子曰幹兒未期而夭詩云不似楊枝別樂天恰如道德伴伶玄阿奴絡秀不同老天女維摩總解禪經卷藥爐新活計舞衫歌扇舊因緣丹成逐我三山去不作巫陽雲雨仙苕溪漁隱曰詩意佳絕善於爲戲略去洞房之氣味翻爲道人之家風非若樂天所云櫻桃樊素口楊柳小蠻腰但自咤其佳麗塵俗哉

藝苑雌黃云朝雲者東坡侍妾也嘗令就秦少游乞詞少游作南歌子贈之云鬻鶴迷春態溶溶媚曉光不應容易下巫陽祇恐翰林前世是襄王暫爲清歌住還因暮雨忙警然歸去斷人腸斷人腸空使蘭臺公子賦高唐何其婉媚也復齋漫錄云洛陽伽藍記言河間王有婢名曰朝雲善吹簫諸羌叛王令朝雲假爲老嫗吹簫羌人無不流涕後降語曰快馬健兒不如老嫗吹簫然則名婢曰朝雲不始於東坡也苕溪漁隱曰李太白潯陽紫極宮感秋云何處聞秋聲翛翛北窗竹回薄萬古心攬之不盈掬東坡和韻云寄臥虛寂堂月明浸疎竹冷然洗我心欲飲不可掬予謂東坡此語似優於太白矣大率東坡每題咏景物於長篇中只篇首四句便能寫盡語仍快健如廬山開元漱玉亭首句云高岩下赤日深谷來悲風

劈開青玉峽，飛出兩白龍。谷林堂首句云：深谷下窈窕，高林合扶疎。美哉斯堂成，及此秋風初。行瓊僧間首句云：四州環一島，百洞蟠其中。我行西北隅，如度月半弓。藤州江上夜起對月首句云：江月照我心。江水洗我肝，端如徑寸珠。墮此白雲盤，此聊舉四詩。其它甚衆，又栖賢三峽橋詩有：清寒入山骨，草木盡堅瘦之句。此等語精研絕韻，真他人道不到也。

復齋漫錄云：洗玉池銘始予讀之，皆不得其說。其後得伯時石刻序跋，乃能明其意。蓋元祐八年，伯時在京師居紅橋子第，得陳峽州馬臺石，愛而置之齋中。一日東坡過而謂曰：斷石爲沼，當以所藏玉時出而浴之，且刻其形于四傍。予爲子銘其脣，而號曰洗玉池。而所謂玉者，凡一十有六：雙琥珀、三鹿盧帶鈎、瑩瑞璵、璇杯、水蒼佩、螳螂帶鈎、佩刀柄、珊瑚璧、珥、珪、楹、琥珀等是也。伯時旣下世，池亦湮晦。徽宗嘗卽其家訪之，得于積壤中。其子碩以時禁蘇文，因潛磨去銘文，以授使者。於是包以烟褥，栖以髹匣，異致京師，置之宣和殿中。其十六種玉，惟鹿盧環從葬龍眠，餘者咸歸內府矣。東坡銘刻與伯時序跋，昔雖有之，今皆亡去。而池亦歸天上，惜其本末不著，因存之。苕溪漁隱曰：洗玉池銘云：惟伯時父弔古啜泣道逢玉人，解驂推食劍璫鍼珌錯落其室。旣獲拱寶，遂空四壁，哀此命也。久就淪蟄，時節沐浴，以幸斯石，則此銘固已敍其事矣。復齋乃謂始予讀之，皆不得其說者，何也。

苕溪漁隱曰：和道潛放魚詩云：況逢孟簡對盧仝，不怕校人欺子美。左傳襄公二十五年，命子展子產帥車七百乘伐陳，宵突陳城，遂入之。子美入數俘而出，注子美卽子產也。東坡詩用此，或以孟子所言有饋生魚於鄭子產，校人烹之，疑非子美，蓋不會見此耳。

蘇子由鳳味石硯銘云北苑茶冠天下歲貢龍鳳團不得鳳凰山味潭水則不成潭中石蒼黑堅緻如玉以爲研與筆墨宜世初莫知也熙寧中太原王頤始發其妙吾兄子瞻始名之然石性薄卽厚者不及徑寸最後得此長博豐碩蓋石之傑也子瞻方爲易傳日効于前與有功焉故特援筆凝神而爲之銘曰陶土塗鑿崖石元之蠹穎之賊涵清泉閟重谷聲如銅色如鐵性滑堅善凝墨棄不取長歎息招伏羲揖西伯發祕藏與有力非相時誰爲出茗溪漁隱曰予爲閩中漕幕常被檄於北苑修貢蓋熟知其地矣造茶堂之後鳳凰山之麓有一泉覆以華屋榜曰御泉其廣三四尺深五六尺石甃其底止留泉眼特一小井耳泉之東西二十餘步間兩山回抱各有小淺澗水流出其水皆可造茶卽無深水瀦蓄匯以爲潭者子由所言味潭其地初無之又安得潭中石蒼黑堅緻如玉以爲研乎又云歲貢龍鳳團不得鳳凰山味潭水則不成此言愈誤也子瞻亦云建州鳳凰山如飛鳳下舞之狀山下有石聲如銅鐵作研至美如有膚理此殆玉德也疑其太滑然至溢墨熙寧五年國子博士王頤始知以爲研而求名於余余名曰鳳味又云僕好用鳳味石研然議者異同蓋少得真者皆爲黯黮灘石所亂盡出於逐利之所爲余於叢話前集已辨鳳味研非出於北苑乃劍浦黯黮灘石蘇氏伯仲爲王頤所給信以爲然故反以此灘之石爲亂真耳

茗溪漁隱曰新安龍尾石性皆潤澤色俱蒼黑緻密可以敵玉滑膩而能起墨以之爲研故世所珍也石雖多種惟羅紋者眉子者刷絲者最佳東坡爲孔毅甫作龍尾研銘云澀不留筆滑不拒墨瓜膚而縠理金聲而玉德此羅紋石也又詩云君不見成都畫手開十眉橫雲卻月爭新奇游人指點小顰處中有漁

陽胡馬嘶又不見王孫青瑣橫雙碧腸斷浮空遠山色書生性命何足論坐費千金買消渴邇來喪亂愁天公謫向君家書硯中小窗虛幌相嫵媚令君曉夢生青紅此眉子石也汪彥章詩云冰蠶吐蠟抽銀葱仙女鳴機號月窟雲綃裂斷擲殘繩淪入空山作尤物中書君老不任事蛛網陶泓空俗骨故令玉質傲松腴萬縷秋毫聊出沒此刷絲石也研譜云歙石出於龍尾溪其石堅勁大抵多發墨故前世多用之較其優劣龍尾遠出端溪上硯錄云歙石其最可尚者每用墨訖以水滌之泮然盡去不復留瀆於其間是足過於端石矣端溪石則色貴青紫聲欲清越向日視之有芒入水瀆之無瑕備此四者乃爲佳品也李長吉詩云端州石工巧如神踏天磨刀割紫雲傭利挹水含滿脣暗洒蓑弘冷血痕劉夢得答唐秀才贈紫石硯詩云端州石硯人間重贈我應知正草元闕里廟中空舊物開方竈下豈天然玉蟠吐水霞光淨彩翰搖風絳錦鮮

東坡銘云與墨爲入玉靈之食與水爲出陰鑑之液蓋言其發墨與滋潤也研譜云端石有鸚鵡眼爲貴眼石病也余謂不然若犀象之有文皆物之奇也烏得以病言之舊見士人王堯佐所蓄端硯其一眼正圓大若芡實青綠黃相重其色鮮美自外至心凡六七重誠爲罕得也惟端石乃有眼流傳四方以此爲辨若唐州紫石有絕佳者與端石亂真特以其無眼故得以辨之研譜又云青州紫金石文理粗亦不發墨獨不云唐州紫石蓋出於近歲余嘗侍親之官合肥合肥與唐鄧相去匪遙商人多販此紫石研來因置得之雖色澤可愛然膩甚不發墨計世間必多有此研往往人皆以爲端石矣綠石出於洮河研譜云性懷不起墨不耐久磨山谷與文潛皆云堅可磨刀劍余未嘗見之故莫能定其是否也山谷從人覓綠

石研云夕聞崑石厭頭綺可。唐相溪龍文工莫嫌文吏不知武要試飽霜秋兔毫文潤和魯直惠洮河綠  
石冰壺研詩云洮河之石利劍矛磨刀日解十二牛。千年虜地困沙礫。一日見寶來中州黃子文章妙天  
下獨駕八馬森幢旒。平生筆墨萬金直。奇煤利翰盈篋收。誰持此研參几案。風瀾近手寒生秋。抱持投我  
棄不惜。副以清詩帛加璧。明窗試墨吐秀潤。端州歙州無此色。銅雀臺瓦研。以古物而見貴於世。瓦頗有  
青色。其內平瑩。厚有及寸許者。上多印工人姓氏。皆八分隸書也。六一居士答謝景山遺古瓦研歌略云。  
高臺已傾漸平地。此瓦一墜埋蓬蒿。苔紋半滅荒土蝕。戰血曾經野火燒。敗皮敝絮各有用。誰使鐫鏽凸  
與凹。東坡作山谷銅雀硯銘云。漳濱之埴陶氏我厄。受成不化。以與直隔。入亡臺廢。得反天宅。遇發邱將  
復爲麟獲。潁濱遺老云。客有游河朔。登銅雀廢臺。得其遺瓦。以爲研。甚堅而澤。歸以遺余。爲之銘。略云。土  
生萬物。而能長存。銅雀初成。萬瓦雲屯。得水而埏。得火而堅。水乾火冷。而土不遷。石質金聲。水火則然。臺  
毀棟摧。誰使獨全。披榛得之。如見古人。來爲吾研。明窗細氈。東觀餘論云。研譜言相州真古瓦。朽腐不可  
用。世俗尚其名剛。今人乃以澄泥如古瓦狀。埋土中久。而研之。然近有長安民獻秦武公羽陽宮瓦十餘  
枚。若今之筭瓦然。首有羽陽千歲萬歲字。其瓦殊不朽腐。其比相州瓦。又增古矣。則知相州古瓦。未必朽  
腐。蓋傳聞之誤耳。硯錄云。紅絲石出於青州黑山。其理紅黃相參。二色皆不甚深。理黃者。其絲紅。理紅者。  
其絲黃。其紋上下通徹。匀布瀆之以水。則有滋液出於其間。以手摩拭之。久而黏著如膏。若覆之以匣。至  
開時。數日墨色不乾。經夜卽其氣上下蒸濡。著於匣中有如雨露。自得茲石。而端歙之石。皆置之巾笥。不  
復視矣。研譜云。紅絲石研者。君謨贈余云。此青州石也。得之唐彥猷云。須飲以水使足。乃可用。不然渴燥。

墨爲之乾彥猷甚奇此硯以爲發墨不減端石東坡云唐彥猷以青州紅絲石爲甲或云惟堪作骰盆蓋亦不見佳者今觀雲庵所藏乃知前人不妄許爾余今折衷此三說東坡之說與彥猷合而永叔之說太過余嘗見此石亦潤澤而不枯燥但堅滑不甚發墨彥猷如青社日首發其祕故著硯錄品題爲第一蓋自奇其事也至永叔乃謂紅絲石研須飲之以水使足乃可用不然渴燥若是則非硯材矣因記談苑云徐鉉工篆隸好筆研歸朝聞鄰人耕地時有得銅雀臺古瓦琢爲硯甚佳會所親調補鄰令囑之經年尋得古瓦二絕厚大命工爲二硯持歸而以授鉉鉉得大喜卽注水將試墨瓦壅久燥甚得水卽滲入旋注旋竭有聲噴噴焉鉉笑曰豈銅雀之渴乎終不可用與常瓦無異然則永叔之說毋乃類此乎

苕溪漁隱曰遜齋閑覽云蘇易簡作文房四譜以硯爲首務謂紙筆墨皆可隨時搜索其可與終身俱者惟硯而已此語極當余以文房四譜徧尋初無此語惟硯錄云余生十五六歲卽篤喜硯墨紙筆四者之好皆均若墨紙筆居常求之必得其精者任取用之不乏至於可與終身俱者獨研而已則知遜齋所云誤也

東坡云阮生言未知一生當著幾兩屐吾有嘉墨七十枚而猶求取不已不近愚邪是可嗤也石昌言蓄李廷珪墨不許人磨或戲之云子不磨墨墨將磨子今昌言墓木拱矣而墨故無恙李公擇見墨輒奪相知間抄取殆遍近有人從梁許來云懸墨滿堂此通人之一蔽也余嘗有詩曰非人磨墨墨磨人此語殆可淒然云苕溪漁隱曰東坡前詩乃和舒教授觀所藏墨其略云世間有癖念誰無傾身障簏尤堪鄙一生當著幾兩屐定心肯爲微物起此墨足支三十年但恐風霜侵髮齒非人磨墨墨磨人餅應未罄罍先

恥又云吾蓄墨多矣其間數枚云是庭珪所造雖形色異衆然歲久墨之亂真者多皆疑而未決也又陳履常云晁無斁有李墨半丸云裕陵故物也往於秦少游家見李墨不爲文理質如金石亦裕陵所賜王平甫所藏者潘谷見之再拜云真廷珪所作也世惟王四學士有之與此爲二矣嗟乎世不乏奇珍異寶乏識者耳詩云秦郎百好俱第一烏瓦如漆姿如石巧作松身與鏡面借美於外非良質潘翁拜跪摩老眼一生再見三歎息了知至靈無遁形王家舊物秦家得君今所有亦其亞伯仲小低猶子姪

遜齋閑覽云唐末墨工李超與其子廷珪自易水渡江遷居歙州本姓奚江南賜姓李氏廷珪始名庭邽其後改之故世有奚庭珪墨又有李廷珪墨或有作李廷邽字者李超墨亦不精庭珪之弟庭寬庭寬之子承晏承晏之子文用文用之長子爾明次子爾光爾光之子丕基皆能世其業然皆不及庭珪祥符中治昭應宮用庭珪墨爲染飾今人所有皆其時餘物耳有貴族嘗誤遺一丸於池中疑爲水所壞因不復取既踰月臨池飲又墮一金器乃令善水者取之併得其墨光色不變表裏如新其人益寶藏之然墨喜精堅多珍寶之愈久而愈妙也

東坡云潘谷作墨所以精妙軼倫堪爲世珍者惟難用高麗煤故也以是詩云徂徠無老松易水無良工珍材取樂浪妙手惟潘翁魚胞熟萬杵犀角盤雙龍苕溪漁隱曰余謂李墨旣爲難得則潘墨亦非易求然今世無二人佳墨終不乏固不必愛奇也



# 苕溪漁隱叢話後集卷第三十

東坡五

龜山語錄云作詩不知風雅之意不可以作詩詩尚諷諫唯言之者無罪聞之者足以戒乃爲有補若諫而涉於毀謗聞者怒之何補之有觀蘇東坡詩只是譏諷朝廷殊無溫柔敦厚之氣以此人故得而罪之若是伯淳詩則聞者自然感動矣因舉伯淳和溫公諸人禊飲云未須愁日暮天際乍輕陰又泛舟云只恐風花一片飛何其溫厚也

元城先生語錄云子弟固欲其佳然不佳者亦未必無用處也元豐二年秋冬之交東坡下御史獄天下之士痛之環視而不敢救時張安道致政在南京乃憤然上疏欲附南京遞府官不敢受乃令其子恕持至登聞鼓院投進恕素愚懦徘徊不敢投其後東坡出獄見其副本因吐舌色動久之人問其故東坡不答後子由亦見之云宜吾兄之吐舌也此事正得張恕力或問其故子由曰獨不見鄭崇之救蓋寬饒乎其疏有云上無許史之屬下無金張之託此語正是激宣帝怒爾且寬饒正以犯許史輩有此禍今乃再訐之是益其怒也且東坡何罪獨以名太高與朝廷爭勝耳今安道之疏乃云其文學實天下之奇才也獨不激人主之怒乎但一時急欲救之故爲此言耳僕曰然則是時救東坡宜爲何說先生曰但言本朝未嘗殺士大夫今乃开端則是殺士大夫自陛下始而後世子孫因而殺賢士大夫必援陛下以爲例神宗好名而畏議疑可以止之

苕溪漁隱曰東坡在御史獄獄吏問云雙檜詩根到九泉無曲處世間惟有蟄龍知有無譏諷答曰王安石詩天下蒼生待霖雨不知龍向此中蟠此龍是也吏亦爲之一笑

許彥周詩話云東坡受知神廟雖謫而實欲用之東坡微解此意論賈誼謫長沙事蓋自況也後作神廟挽詞云病馬空嘶櫨枯葵已怯霜此非深悲至痛不能道此語在元祐間獲鬼章作告裕陵文云將帥用命爭酬未報之恩神靈在天難逃不漏之網後人輒謂其微文謗訕天乎寧有是哉

司馬文正公日錄云熙寧三年三月春放榜韓秉國呂惠卿初考阿時者皆在高等許直者皆在下等宋次道劉貢父覆考皆反之吳冲卿陳述古多從初考葉祖洽策言祖宗多因循苟簡之政陛下卽位革而新之冲卿等奏從初考李才元蘇子瞻編排上官均第一祖洽第二陸佃第三上令陳相面讀均祖洽擢祖洽第一又問他卷所在他者佃卷號也擢第三子瞻退擬進士對策而獻之且言祖洽詆祖宗以媚時君而魁多士何以正風化

苕溪漁隱曰唐昌觀玉葉鶴林寺杜鵑一花在唐時爲盛名聞天下玉葉花尤有詞人賦詠唐百家詩選載王建詩云一樹籠鬆玉刻成飄廊點地色輕輕女冠夜覓香來處惟見堦前碎月明劇談錄云上都安樂坊唐昌觀舊有玉葉花甚繁每發若瑤林瓊樹元和中春物方盛車馬尋覩者相繼忽一日有女子年可十七八衣綠繡衣乘馬峩髻雙鬟無簪珥之飾容色婉約出於衆從以二女冠三小僕旣下馬以白角扇障面直造花所佇立良久令小僕取花數枝而出將乘馬回謂女冠曰曩有玉峯之約自此可以行矣時觀者如堵皆見舉轡百步有輕風擁塵隨之而去須臾塵滅望之已在半天方悟神仙之遊劉賓客有

詩云玉女來看玉樹花異香先引七雲軍攀枝弄雪時回首驚怪人間日易斜續仙傳云鶴林寺有杜鵑花寺僧相傳云正元中外國僧自天台鉢中以藥養其根來植此寺人或見女子紅裳艷色遊於花下俗傳花神也一日周寶謂殷七七曰鶴林寺花天下奇絕常聞汝能開頃刻花此花可副重九乎曰可也乃前二日往鶴林寺宿中夜女子來謂七七曰妾爲上蒼所命下司此花非久卽歸閬苑今爲道者開之來日寺僧訝花漸拆至九日爛熳後經兵火其花遂亡信歸閬苑矣余求之唐人詩集寂無詠此花者惟東坡守錢塘觀菩提寺南漪堂杜鵑花云南漪杜鵑天下無披香殿上紅氍毹鶴林兵火真一夢不歸閬苑歸西湖又和述古冬日牡丹云當時只道鶴林仙能遺秋光發杜鵑誰信詩能回造化直教霜柯放春妍又云安得道人般七七不論時節遣花開皆用此故事也余嘗謂小說載事好爲附會以聳動人觀聽使讀之者忘倦每竊疑之凡言花卉必須附會以婦人女子如玉葉花則言有仙女來遊杜鵑花則言有女子司之又摭遺云蜀州郡閣有紅梅數株方盛開有二婦人高髻大袖倚欄而觀題詩於壁曰南枝向暖北枝寒一種春花有兩般憑仗高樓莫吹笛大家留取倚欄看詩思清麗豈非神仙乎又龍城錄云隋開皇中趙師雄遷羅浮一日天寒日暮於松竹林間見美人淡粧素服出遊時已昏墨殘雪未消月色微明師雄與語言極清麗芳香襲人因與之叩酒家共飲少頃一綠衣童來歌舞師雄醉寢但覺風寒襲人久之東方已白起視乃在梅花樹下上有翠羽啾嘈相顧月落參橫但惆悵而已凡此之類其言怪誕無可考據誠是虛撰不足信矣

藝苑雌黃云維揚后土祠有瓊花潔白而香天下惟此一株故好事者剏亭於其側曰無雙韓魏公詩維

揚一株花四海無同類蓋謂是也比觀晏元獻集有翰林盛諫議借示揚州后土祠玉蘂花詩序云此花因王禹偁更名瓊花案李善文選注瓊赤玉也蓋王之誤故晏集有拒霜花詩江城嘉號木芙蓉金蘂瓊房綻蓼風又紅梅花詩巧綴珊瑚綺色絲三千宮面宿胭脂又紅蓼詩絳英瓊粒傲霜前冷落池臺亦自妍又泛濛至祁氏園詩素花皎霜雪紅艷比瑤瓊皆注云瓊赤玉也其意蓋欲辨證世俗之謬案許慎說文亦以瓊爲赤玉然瓊花之名至今不改豈其相承之久歟又王彥輔塵史云說文以瓊爲赤玉比見人詠白物多用瓊退之雪詩云若非燭鵠鷺定是屑瓊瑰又有今朝踏作瓊瑤跡爲有詩從鳳沼來等句將別有所稽邪豈用之不審也

苦溪漁隱曰東坡作惠州白鶴新居上梁文敍幽居之趣蓋以文爲戲自此老啓之也其後葉少蘊作石林谷草堂上梁文孫仲益作西徐上梁文皆效其體格然不能無優劣矣余亦嘗效之有云春風雨足耕隴首之曉雲秋日鱸肥釣波心之寒月

苦溪漁隱曰杜牧之九日齊安登高云江涵秋影雁初飛與客攜壺上翠微又有詩云烟深隋家寺殷葉暗相照獨佩一壺遊秋毫泰山小東坡用其語作詩云明日南山春色動不知誰佩紫微壺以牧之曾作中書舍人故言紫微壺又牧之詩何如釣船雨篷底臥秋江又憶齊安郡云平至睡足處雲夢澤南州一夜風欺竹連江雨送秋東坡用其語作詩云客睡不妨船背雨又云平生睡足連江雨盡日舟橫拍岸風苦溪漁隱曰東坡守汝陰作擇勝亭以帷幕爲之世所未有也銘略云乃作斯亭簷楹欒梁鑿枘交設合散靡常赤油仰承青幄四張我所欲往十夫可將與水升降除地布牀又云豈獨臨水無適不藏春朝花

郊秋夕月場無脛而趣無翼而翔敝又改爲其費易償榜曰擇勝名實允當觀此銘則其製度亦可備也子由亦云子瞻爲汝陰守以幄爲亭欲往卽設不常其處名曰擇勝爲作四言一章轍愛其文故繼之略云我兄和冲塞剛立柔視身如傳苟完不求山盤水嬉習氣未瘳豈以吾好而俾民憂頴尾甚清頴曲孔幽風有翠幄雨有赤油匪舟匪車亦可相攸近時吳傳朋以東坡此銘改數字更爲擇勝閣銘而書之不知者乃以爲傳朋作極可笑也

苕溪漁隱曰呂丞相跋杜子美年譜云考其筆力少而銳壯而肆老而嚴非妙于文章不足以至此余觀東坡自南遷以後詩全類子美夔州以後詩正所謂老而嚴者也子由云東坡謫居僧耳獨喜爲詩精鍊華妙不見老人衰憊之氣魯直亦云東坡嶺外文字讀之使人耳目聰明如清風自外來也觀二公之言如此則余非過論矣

苕溪漁隱曰東坡作膠西超然臺記其略云園之北因城以爲臺者舊矣稍葺而新之時相與登覽放意肆志焉南望馬耳常山出沒隱見若近若遠庶幾有隱君子乎而其東則廬山秦人盧敖之所從遁也西望穆陵隱然如城郭師尚父齊威公之遺烈猶有存者北俯維水慨然太息思淮陰之功而弔其不終此語蓋效習鑿齒之書其後汪彥章作京口月觀記又從而效之造語皆可喜也鑿齒與弟祕書云吾以去歲五月三日來達襄陽觸目悲感略無懽情痛惻之事故非書言之所能盡也每定省家舅從北門入西望隆中想臥龍之吟東眺白沙思鳳雛之聲北臨樊墟存鄧老之高南瞻城邑懷羊公之風縱目檀溪念崔徐之友肆睇魚梁追二德之遠未嘗不徘徊移日惆悵極多撫策躊躇慨然而泣曰若乃魏武之所置

酒孫堅之所墮斃裴杜之故居繁王之舊宅遺事猶存星列滿目瓊瑤常流碌碌凡士焉足以感其方寸哉彥章月觀記云嘗與子四顧而望之其東曰海門鷗夷子皮之所從遁也其西曰瓜步魏佛狸之所嘗至也若其北廣陵則謝太傅之所築埭而居也江中之流則祖豫州之所擊楫而誓也計其一時英雄慷慨憤中原之未復反虜之未擒欲吞之以忠義之氣雖狹宇宙而隘九州自其胸中所積亦江山有以發之

四六談塵云東坡嶺外歸與人啓云七年遠謫不意自全萬里生還適有天幸所襯字皆漢人語也又黃門謝復官表云一毫以上皆出於上恩累歲偷安有慚於公議秋毫皆帝力也用張敖語

若溪漁隱曰東坡祭徐君猷文云平生彷彿尙陳中聖之觴後夜渺茫徒掛初心之劍因其姓而用事尤爲中的

若溪漁隱曰次韻沈長官詩云莫道山中食無肉玉池清水自生肥天慶觀乳泉賦云鏘瓊佩之落谷灔玉池之生肥澄邁驛通潮閣詩云杳杳天低鶴沒處青山一髮是中原伏波將軍廟碑有云南望連山若有若無杳杳一髮耳皆兩用之其語崛奇蓋得意也

東坡泗州大聖傳云和尙河國人也又曰世莫知其所從來不知何國人也近讀隋書西域傳乃有河國余在惠州忽被命謫僧耳太守方子容自攜告身來且語余曰此固前定無可恨吾妻沈素事僧伽謹甚予以謂事之前定者不待夢而知然予何人也而和尙辱與同行得非夙世有少緣契乎若溪漁隱曰參

寥有詩誌此事云臨淮大士亦無私應物長于險處施親護舟航渡南海知公盛德未全衰若溪漁隱曰子由古史云二世屠戮諸公子殆盡而後授首於劉項按史記二世爲趙高所殺子嬰立降漢王漢王以屬吏項王至斬之則授首於劉項者乃子嬰非二世也又云陸遜之於孫權高熲之於隋文言聽計從致君於王伯矣而忮心一起二臣不得其死可不哀哉余按吳志陸遜上疏諫孫權不宜易太子權不聽因憤恚卒又按北史煬帝以高熲謗訕朝政誅之二人非孫權隋文所殺其恠悟如此子由譏司馬遷作史記淺近而不學疎略而輕信故因遷之舊而作古史乃反若是寧不畏後人之譏乎

蘇少公云吾兄子瞻謫居儋耳瓊州進士姜唐佐往從之遊氣和而言道有中州士人之風子瞻愛之贈之詩曰滄海何曾斷地脈白袍端合破天荒且告之曰子異日登科當爲子成此篇君遊廣州州學有名學中崇寧二年正月隨計過汝陽以此句相示時子瞻之喪再逾歲矣覽之流涕念君要能自立而莫與終此詩者乃爲足之云生長茅間有異芳風流稷下古諸姜適從瓊管魚龍窟秀出羊城翰墨場滄海何曾斷地脈白袍端合破天荒錦衣今日千人看始信東坡眼力長若溪漁隱曰冷齋夜話載此句乃云滄海何曾斷地脈朱崖從此破天荒遂以姜唐佐爲朱崖人附會爲說今當以子由詩爲正也

復齋漫錄云子瞻子由門下客最知名者黃魯直張文潛晁無咎秦少游世謂之四學士至若陳無己文行雖高以晚出東坡門故不及四人之著故無己作佛指記云余以詞義名次四君而貧於一代是也而無咎詩云黃子似淵明城市亦復真陳君有道澤化行閭井淳張侯公瑾流英思春革新才更難及淮海一臚秦當時以東坡爲長公子由爲少公無己答李端叔書云蘇公之門有四客人黃魯直秦少游晁

無咎則長公之客也。張文潛則次公之客也。然而四客各有所長。魯直長于詩詞。秦晁長于議論。魯直與秦觀書曰。庭堅心醉于詩與楚辭似若有得。至於議論文字。今日乃當付之少游。及晁張無已足下可從此四君子。一一問之。其後張文潛贈李德載詩。亦云長公波濤萬頃海。少公峭拔千尋麓。黃郎蕭蕭日下鶴。陳子峭峭霜中竹。秦文情麗紆桃李。晁論嶧嶧走珠玉。乃知人才各有所長。雖蘇門不能兼全也。復齋漫錄云。張芸叟詩。夕陽牛背無人臥。帶得寒鴉兩兩歸。與東坡所記蘇叔黨詩葉隨流水歸何處。牛載寒鴉過別村。下句與張相合。

東臯雜錄云。李廌方叔祭東坡云。道大不容才高見忌。皇天后土。明一生忠義之心。名山大川。還千古英靈之氣。

# 苕溪漁隱叢話後集卷第三十一

山谷上

山谷云八月十七日與諸生步自永安城入張寬夫園待月以金荷葉酌客客有孫叔敏善長笛連作數曲諸生曰今日之會樂矣不可以無述因作此曲記之文不加點或以爲可繼東坡赤壁之歌云斷虹霽雨淨秋空山染修眉新綠桂影扶疎誰便道今夕清輝不足萬里青天嫦娥何處駕此一輪明玉寒光零亂爲人偏照醞釀年少隨我追涼晚城幽徑繞芳園森木共倒金荷家萬里難得樽前相屬老子平生江南江北最愛臨風曲孫郎微笑生來聲散霜竹苕溪漁隱曰山谷謂此詞可繼東坡赤壁之歌余故列東坡之詞於左方大江東去浪淘盡千古風流人物故壘西邊人道是三國周郎赤壁亂石穿空驚濤拍岸卷起千堆雪江山如畫一時多少豪傑遙想公瑾當年小喬初嫁了雄姿英發羽扇綸巾談笑處檣櫓灰飛烟滅故國神遊多情應笑我早生華髮人生如夢一樽還酹江月

苕溪漁隱曰余讀豫章先生傳云公嘗游皖樂山谷寺石牛洞之林泉因自號山谷道人天下皆稱曰山谷而不名字以配東坡云

復齋漫錄云無已呼山谷爲金華仙伯故題李白真詩金華仙伯哦七字好事不復千金模蘇養直詩亦云但見金華仙伯語筆端邱壑飽經心苕溪漁隱曰葛洪神仙傳云皇初平年十五家使牧羊有道士見其良謹將至金華山石室中其兄初起入山索之累年不得後隨一道士歸初起見而問曰羊何在初平

曰近在山東兄往見白石初平叱之白石皆起爲羊後易姓爲赤松子不知無已呼魯直爲金華仙伯若取其同姓皇固非黃矣

復齋漫錄云山谷謫涪州別駕因自號涪翁按益部耆舊傳廣陵有老翁釣於涪水自號涪翁然則涪翁之稱古有之矣苦溪漁隱曰後漢逸民傳云初父老不知何出常漁釣於涪水人因號涪翁復齋不取於此乃取益部耆舊傳以爲異書邪

苦溪漁隱曰魯直以雙井茶送孔常父常父答詩有煎點徑須煩綠珠之句因戲答云知公家亦闕掃除但有文君對相如政當爲公乞如願作書遠寄宮亭湖錄異傳云廬陵歐陽明道彭蠡以船中所有投湖中云以爲禮積數年復過有數吏來候明云青洪君相邀且曰感公有禮且厚遺公願勿取獨求如願耳明旣見遂求如願如願者青洪君婢也明將歸所願輒得數年大富

東坡云眼惡剔抉齒便漱潔治眼如治民治齒如治軍治軍如商鞅之治秦此語本出魯直云

呂氏童蒙訓云作文必要悟入處悟入必自工夫中來非僥倖可得也如老蘇之於文魯直之於詩蓋盡此理也

苦溪漁隱曰前輩譏作詩多用古人姓名謂之點鬼簿其語雖然如此亦在用之何如耳不可執以爲定論也如山谷種竹云程嬰杵臼立孤難伯夷叔齊食薇瘦梅花云雍也本犁子仲由元鄙人善於比喻何

冷齋夜話云徐師川言予于東坡山谷瑩中三君子但知敬畏者然其瑕疵予能笑之如東坡議論諫諍真所謂殺身成仁者也其視死生如旦暮不爾安能爲哉而反欲學長生不死山谷赴官姑熟旣至未視事聞當罷去俯就之七日符至乃去問其故曰不爾無舟吏可還士之進退本末欲分明不可苟也豈以舟吏爲累哉瑩中大節昭著其能必行其志者視爵祿如糞土然時時對日者談命此皆顛倒也吾故得而笑之

苦溪漁隱曰魯直少喜學佛遂作發願文云今日對佛發大誓願從今日盡未來世不復姪欲飲酒食肉設復爲之當墮地獄爲一切衆生代受其苦可謂能堅忍者也其後悉毀禁戒無一能行之於詩句中可見矣以酒渴愛江清作五詩其一云廖侯勸我酒此亦雅所愛中年剛制之常懼作災怪連臺盤拗倒故人不相貸誰能知許事痛飲且一快嘲小德云中年舉兒子漫種老生涯學語囀春鳥塗窗行暮鴉欲嗔主母惜稍慧女兒誇解著潛夫論不妨無外家謝榮緒割獐見貽二首云何處驚虧觸禍機煩公遣騎割鮮肥秋來多病新開肉糲飯寒蠶得解圍二十餘年枯淡過病來筋下劇甘肥果然口腹爲災怪夢去呼鷹雪打圍傳云飲食男女人之大欲存焉若戒之則誠難節之則爲易乃近於人情也東臯雜錄云魯直嘲小德有學語春鶯囀書窗秋雁斜後改曰學語囀春鳥塗窗行暮鴉以是知詩文不厭改也

苦溪漁隱曰題磨崖碑後詩云事有至難天幸耳上皇踢踏還京師內間張后色可否外間李父頤指揮南內淒涼幾苟活高將軍去事尤危臣結春秋二三策臣甫杜鵑再拜詩安知忠臣痛至骨後世但賞瓊琚詞觀詩意皆是言明皇末年事余以唐史考之明皇幸蜀還居興慶宮李輔國遷之西內居甘露殿繼

流高力士于巫州。詩云。南內誤矣。又以元結本傳及元次山集考之。但有時議三篇。指陳時務而已。初無一言以及明皇。肅宗父子間。不知魯直所謂臣結春秋二三策者。更別出何書也。魯直以此配臣甫杜鵑。再拜詩子美杜鵑詩。正爲明皇遷居西內而作。則次山春秋二三策亦當如杜鵑詩有爲而言。若以時議三篇爲是。則事無交涉。乃誤用也。或云魯直蓋用孟子。吾於武成取二三策之語。然於元結果何預焉。如顏魯公湖州放生池碑載其上。肅宗表云。一日三朝大明天子之孝。問安視膳不改家人之禮。東坡謂魯公知肅宗有愧於此乎。孰謂公區區於放生哉。此事若用之。卻爲親切。

復齋漫錄云。韓子蒼言張文潛集中載中興頌詩。疑秦少游作。不惟涪溪有少游字刻。兼詳味詩意。亦似少游語也。此詩少游號傑出。第玉環妖血無人掃之句爲病。蓋李遐周詩云。若逢山下鬼。環上繫羅衣。貴妃之死。高力士以羅巾縊焉。非死兵刃也。然余以杜詩有血污遊魂歸不得之語。亦指妃子張蓋本杜也。苦溪漁隱曰。余遊涪溪。觀磨崖碑之側。有此詩刻石。前云讀中興頌。張末文潛後云。秦觀少游書。當以刻石爲正。不知子蒼亦何所據而言邪。

東臯雜錄云。中興頌刻南崖石鑑。江之南北數里。草木人物毫髮畢見。僧云。昔有人鑿取去。行數驛。夢山神追取。卽載還龕置崖上。但方二尺許爾。余偶命從者洗其旁二丈餘。皆光瑩可鑑。僧驚云。未見也。

苦溪漁隱曰。吾鄉乳溪有石崖。亦光能鑑物。與涪溪崖石政相類。人因呼爲石照。蘇黃門嘗題詩云。雲開石照鏡。新磨烏度猶攀野老過。忽見塵容應笑我。年來底事白鬚多。

苦溪漁隱曰。予官閩中。見其風俗呼父爲郎罷。呼子爲困。顧況有詩云。郎罷別困困別郎罷。及至黃泉不

得在郎罷前乃知顧況用此方言也。山谷送秦少章往餘杭從蘇公詩班衣兒啼真自樂從師學道也不惡。但使新年勝故年，卽如常在郎罷前。唐子西詩兒餒噴郎罷皆用顧況語也。

復齋漫錄云題子美浣花圖云隣家有酒邀皆去得意魚鳥來相親按世說簡文入華林園曰會心處不必在遠翛然林水使自有濠濮間趣覺鳥獸禽魚自來親人又贈晁無咎詩雞蘇胡麻留渴羌不應亂我官焙香按拾遺記晉有羌人姚馥字世芬充圉人每醉中好言王者興亡事但言渴於酒羣輩呼爲渴羌也。

苕溪漁隱曰真誥云昔有傅先生者其少好道入焦山石室中積七年而太極老君詣之與之木鑽使穿一石槃厚五尺許云穿此槃便當得道其人乃晝夜穿之積四十七年鑽盡石穿遂得神丹乃昇太清故觀伯時畫馬詩云木穿石槃未渠透坐窗不邀令人瘦卽前事也北史云齊高歡在勅勒川命斛律明月奏琵琶作歌應詔曰勅勒川陰山下天似穹廬籠罩四野天蒼蒼沙茫茫風吹草低見牛羊故題陽關圖詩云想得陽關更西路北風低草見牛羊此語殊有所本也。

苕溪漁隱曰筆談云嘉祐中揚州有一珠甚大天晦多見初出於天長縣陂澤中後轉入甓社湖又後乃在新開湖中凡十餘年居民行人常常見之余友人書齋在湖上一夜忽見其珠甚近初微開其房光自吻中出如橫一金線俄頃忽張殼其大如半席殼中白光如銀珠大如拳爛然不可正視十餘里間林木皆有影如初日所照遠處但見天赤如野火倏然遠去其行如飛浮於波中杳杳如日古有明月之珠此珠色不類月熒熒有芒焰殆類日光崔伯易嘗爲明珠賦伯易高郵人蓋嘗見之近歲不復出不知所往

樊良鎮正當珠往來處。行人至此往往維舟數宵以待現。名其亭爲玩珠。又文昌雜錄云。禮部李侍郎說。祕書少監孫莘老。莊居在高郵。新開湖邊。一夕陰晦。莊客報湖中珠見。與數人同行小草徑中。至水際。見微有光彩。俄而明如月。陰霧中人面相覩。忽見蚌蛤如蘆席大。一殼浮水上。一殼如帆狀。其疾如風。舟子飛小艇競逐之。終不可及。既遠。乃沒。故呈孫莘老詩云。甓社湖中有明月。淮南草木借光輝。故應剖蚌登王府。不若含沙弄夕霏。莘老又是高郵人。用此事以擬之。大爲切當。

復齋漫錄云。自賀方回爲青玉案詞。山谷尤愛之。故作小詩以紀之。及謫宜州。山谷兄元明和以送之云。  
千峯百嶂宜州路。天黯淡知人去。曉別吾家黃叔度。弟兄華髮舊山修水。異日同歸處。尊罍飲散長亭暮。別語丁寧不成句。已斷離腸人幾許。水村山館酒醒無寐。滴盡空堦雨。山谷和云。烟中一線來如路。極目送歸鴻去。一曲陽關雲外度。山胡聲轉子規言語。正是愁人處。別恨朝朝連暮暮。憶我當筵醉時句。度水穿雲心已許。晚年光景小窗南浦共捲西山雨。洪覺範和云。綠槐烟柳長亭路。恨耿耿分離去。日永如年愁難度。高城回首碧雲遮盡。目斷人何處。解鞍旅舍天將暮。暗憶丁寧千萬句。一寸危腸情幾許。薄衾孤枕。夢回人靜。徹曉瀟瀟雨。

復齋漫錄云。唐朱晝喜陳懿老至詩云。一別一千日。一日十二憶。苦心無閑時。今日見玉色。乃知山谷五更歸夢三千里。一日思親十二時之句。取此。

苕溪漁隱曰。水仙花詩云。借水開花自一奇。水沉爲骨玉爲肌。暗香已壓酴醿倒。只愧寒梅無好枝。第水仙花初不在水中生。雖欲形容水字。卻反成語病。

山谷云野人採鄭花以染黃不借攀而成色故名山礬海岸孤絕處補陀山澤者以謂小白花予疑卽此花爾不然何以觀音老人端坐不去邪苕溪漁隱曰余閱華嚴經合論云觀世音住居補陀洛迦注云小白華山觀世音菩薩居之爲諸菩薩說慈悲經此山多有小白花甚香山谷所言卽此事也

藝苑雌黃云種竹者多用辰日山谷所謂根須辰日斲筍看上番成是也又用臘月杜陵所謂東林竹影薄臘月更須栽是也非此時移之多不活惟五月十三日古人謂之竹醉日栽竹多茂盛按筍譜云民間說竹有生日卽五月十三日也移竹宜用此日或陰雨土虛則鞭行明年筍莖交出故晏元獻詩云苒苒渭濱族蕭蕭塵外姿如能樂封殖何必醉中移宋景文詩云除地墻陰植翠筠纖莖潤葉與時新賴逢醉日終無損正似得全於酒人黃元明詩云夏栽醉竹餘千箇春糞辰瓜滿百區

復齋漫錄云諺云情人眼裏有西施又云千里寄鵝毛物輕人意重皆鄙語也山谷取以爲詩故答公益

春思云草茅多奇士蓬草有秀色西施逐人眼稱心最爲得謝陳適用惠紙云千里鵝毛意不輕



# 苕溪漁隱叢話後集卷第三十二

山谷下

苕溪漁隱曰。陵郡澹山岩。秦周貞實之舊居。余往歲嘗遊之。因見李西臺黃太史詩刻。愛其詞翰雙美。因搨墨本以歸。真佳玩也。西臺詩石刻漫滅。九字不可辨。因闕之。詩云。常思羽衣人。宅此岩崔傍。□□通大道。元關掩中黃。古朴宮殿。偃亞松桂香。洞戶漏夕月。木罅生□陽。疊齒上層巔。露井連曲房。斷壁橫廣幕。蠹石排吟□。蟄痕燕穴空。乳溜虬鱗張。清泉弄春□。靈草過冬芳。自笑老倒容。誰□刀圭霜。金版佩上籍。玉音歌洞章。□□夜森立。絳節朝飛揚。咫尺仙路高。喧囂機世忙。浮埃走車馬。奔迸多事場。真地擁烟霞。根本無爲鄉。不到久歎息。一來徒悲傷。但聽鏗華鐘。所得心耳涼。太史詩二首。其一云。去城二十五里近天與隔。斷俗子塵。春蛙秋蠅不到耳。夏涼冬暖總宜人。岩中清磬僧定起。洞口綠樹仙家春。惜哉此山世未顯。不得雄文鑄翠珉。其二云。澹山澹性人。安在。徵君避秦亦未歸。石門竹徑幾時有。瑤臺瓊室至今疑。洞中明潔坐十客。亦可呼樂醉舞衣。閬州城南果何似。永州澹岩天下稀。

六一居士云。余嘗與蔡君謨論書。以爲書之盛。莫盛於唐。書之廢。莫甚於今。余之所錄。如于頤高駢。下至楷書手陳遊環等。皆有之。蓋唐之武夫悍將。暨楷書手輩。字皆可愛。今文儒之盛。其書屈指可數者。無三四人。非皆不能。忽不爲耳。

苕溪漁隱曰。本朝能書者。有李西臺宋宣獻。東坡謂李俗而宋寒。殆是浪得名。又謂建中書雖可愛。終可

鄙雖可鄙，終不可棄。余於西臺書不多見，獨見其永州澹山岩詩，清勁簡遠，不減晉唐間人書，則東坡之論，有不然者矣。惟六一居士云：五代之際，有楊少師，建隆已後，稱李西臺，二人筆法不同，而書名爲一時之絕。山谷云：李西臺出羣拔萃，肥不剩肉，如世間美女，豐肥而神氣清秀者，則二公之論得之矣。山谷因李君貺，借示其祖西臺草聖，并書賦詩云：當時高蹈翰墨場，江南李氏洛下楊。二人歿後數來者，西臺惟有尚書郎篆科草聖，凡幾家。奄有漢魏跨兩唐，紙摹石鏤多彷彿。曾未得似君家藏，側理數幅冰不及。字體欹傾，墨猶濕，明窗棐几，開卷首坐客失床皆起立。新春一聲雷未聞，何得龍蛇已驚蟄。仲將伯英無後塵，邇來此公下筆親。使之早出見李衛，不獨右軍能逼人。山谷此詩許可如此，真不虛美矣。余素未曾見宣獻書，不知其果如何。但山谷云：近世士大夫書，富有古人法度，惟宋宣獻公耳。能用徐季海書意，莫年擺落右軍父子規模，自成一家，當無遺恨矣。又其書清瘦而不弱，亦古人所難。則坡谷之論異同如此。余欲折衷之，以未見其書，故不敢爾。東坡云：歐陽文忠公論蔡君謨書，獨步當世，此爲至言。君謨行書第一，小楷第二，草書第三，就其所長而求其所短，大字爲少疎也。天資既高，又輔以篤學，其獨步當世，宜哉。近世論君謨書者，頗有異論，故特爲明之。山谷云：蔡君謨行書簡札甚秀麗可愛，至于作草，自云得蘇才翁屋漏法，令人不解。又云：頃年觀廟堂碑摹本，竊怪虞永興名浮于實，及見舊刻，方知永興得智永筆法爲多。又知蔡君謨真行簡札，能入永興之室也。邇來士大夫，惟荊公書有古人氣質，而不端正，然筆間甚逸。士大夫學荊公書，但爲橫風疾雨之勢，至于不著繩尺，而有魏晉間風氣，不復彷彿。嘗觀王濛書，想見其人，秀整所謂毫髮無遺恨者。荊公嘗自言學濛書，東坡賦孫莘老墨妙亭詩云：徐家父子亦秀絕，字外出

力中藏稜山谷云書家論徐會稽筆法怒猊抉石渴驥奔泉以余觀之誠不虛語如季海少令韻勝則興稚恭並驅爭先可也季海長處正是用筆勁正而心圓若論工不論韻則王著優子季海季海不下子敬若論韻勝則右軍大令之門誰不服膺往時觀怒猊抉石渴驥奔泉之論茫然不知是何等語老年乃于季海書中見之如觀人眉目也三折肱知爲良醫誠然哉季海暮年乃更擺落王氏規模自成一家所謂盧蒲叟其髮甚短而心甚長惜乎當時君子莫能以短兵伐此老賊也前朝翰林侍書王著筆法圓勁今所藏樂毅論周興嗣千字文皆著書墨蹟此其長處不減季海所乏者韻爾沈傳師道林嶽麓寺詩字勢豪逸真復奇崛所恨工巧太深耳少令巧拙相半使子敬復生不過如此東坡蓋學徐浩書山谷蓋學沈傳師書皆青過於藍者然二公深諱之故東坡云見歐陽叔弼云余書大似李北海余亦自覺其如此世或謂似徐浩非也山谷云予比來極愛顏魯公書時時輒有其氣骨而人以爲殊未得其彷彿寫我心耳豈可謂衆目哉二公當時自言如此自今觀之人固不信也山谷跋東坡書云如華嶽三峯卓然參昂雖造化之鑪錘不自知其妙也中年書圓勁而有韻大似徐會稽晚年沉着痛快乃似李北海此公天資解書比之詩人是李太白之流士大夫學子瞻書但臥筆取妍至於老大精神可與顏楊方駕則未之有也山谷自云余書姿媚而乏老氣自不足學學者輒萎弱不能立筆雖然筆墨各繫其人工拙要須其韻勝耳病在此處筆墨雖工終不近也

六一居士云石曼卿工於書筆畫遒勁體兼顏柳東坡言蘇子美兄弟書俱秀俊山谷言蘇才翁兄弟皆喜作大字筆力豪壯此三人俱近世能書者恨未盡見之獨見子美所書岳陽樓碑雖清瘦勁健然乏風

韻余不甚喜之東坡云近日米芾行書王鞏小草亦頗有高韻雖不逮古人亦必傳於世也山谷云余嘗評米元章書如快劍斫陣如強弩射千里所當穿徹書家筆力亦窮于此然似仲由未見孔子時風氣耳祕閣續帖劉無言箋題便不類今人書使之春秋高江東又出一羊欣薄紹之矣余居苕溪閱無言書多矣晚年雖用筆圓熟然乏秀氣殊不逮山谷之題評也余今第取歐陽蘇黃之論具著於篇若古今諸家書評世多有之不復載之云

苕溪漁隱曰涪翁晚年再遷宜州道出祁陽草書靖節詩四首清晨聞叩門倒裳往自開者其一也棲棲失羣鳥日暮猶獨飛者其二也昔欲居南村非爲卜其宅者其三也春秋多佳日登高賦新詩者其四也並鑱石于嘉會亭余昔經由摹得墨本愛其筆法之妙自成一家涪翁嘗言元祐中與子瞻穆父飯寶梵僧舍因作草數紙子瞻賞之不已穆父無一言問其所以但云恐公未見藏真真蹟庭堅心竊不平紹聖貶黔中得藏真自序于石揚休家諦觀數日恍然自得落筆便覺超異回視前日所作可笑也然後知穆父之言不誣且恨其不及見矣今祁陽草聖正是涪翁黔州以後作誠佳絕也東坡嘗跋之云曇秀來海上見東坡出黔安居士草書一軸問此書如何東坡云張融有言不恨臣無二王法恨二王無臣法吾於黔安亦云然他日黔安見之當捧腹軒渠也藏真又有千字文真蹟舊蓄於江南李氏紙尾有後主錯金書題云懷素僧草聖戴叔倫詩云詭形怪狀翻合宜誠哉是言其後此真蹟又轉蓄於董令升家紹興間歸天上矣桂林有此石刻余嘗得摹本因取古人書評疏于後見東坡于此書且褒且貶深竊怪之其言曰僧藏真書七紙開封王君鞏所藏君侍親平涼始得其一二而兩紙在張鄧公家其後馮公當世又獲

其三雖所從得者異不可考然筆勢奕奕七紙意相屬也君鄧公外孫而與當世相善乃得而合之余嘗愛梁武帝評書善取物象而此公尤能自譽觀者不以爲過信乎其書之工也然其爲人倜儻本不求工而能工如此如汲人之操舟無意於濟否是以覆卻萬變而舉止自若其近於道者邪張長史草書頽然天放略有點畫處而意態自足號稱神逸此其褒之也又其詩云顛張醉素兩禿翁追逐世好稱書工何曾夢見王與鍾妄自粉飾欺盲聾有如市娼抹青紅妖歌嫚舞眩兒童此其貶之也至於涪翁則云張長史書郎官廳壁記楷法妙天下故草聖度越諸家無轍迹可尋懷素見顏尚書道張長史書意故獨入筆墨三昧懷素草工瘦而長史草工肥瘦硬易作肥勁難工此兩人者一代草書之冠冕也詳味其言真確論矣然二人草聖之工在當時已自李杜有歌詩推許之不特後世也謫仙贈懷素草書歌云少年上人號懷素草書天下稱獨步墨池飛出北溟魚筆鋒殺盡中山兔八月九月天氣涼酒徒辭客滿高堂牋麻素絹排數箱宣州石硯墨色光吾師醉後倚繩牀須臾掃盡數千張飄風驟雨驚颯颯落花飛雪何茫茫起來向壁不停手一行數字大如斗恍惚如聞神鬼驚時時只見龍蛇走左盤右蹙如驚電狀同楚漢相攻戰湖南七郡凡幾家家屏障書題徧王逸少張伯英古來幾許浪得名張顛老死不足數我師此藝不師古古來萬事貴天生何必要公孫大娘渾脫舞少陵因殿中楊監見示張長史草書圖賦詩云斯人已云亡草聖祕難得及茲煩見示滿目一悽惻悲風生微絹萬里起古色鏘鏘鳴玉動落落羣松直連山蟠其間溟漲與筆力有練實先書臨池真盡墨俊拔爲之主暮年思轉極未知張王後誰並百代則嗚呼東吳精人也

旭蘇州

逸氣感清識楊公拂篋笥舒卷忘寢食念昔揮毫端不得觀酒德苦溪漁隱曰山谷詩雪

裏過門多惡客。自注云：不飲者爲惡客。出元次山集。余以元集檢尋其詩云：將船何處去。送客小回南。有時逢惡客。還家亦少酣。注云：非酒徒卽爲惡客。山谷又一絕云：破卵扶頭把一盃。燈前風味喚仍回。高陽社裏如相訪。不用閑攜惡客來。

復齋漫錄云：唐吳子華詩云：暖漾魚遺子。晴遊鹿引麝。乃悟山谷詩：河天月暈魚分子。槲葉風微鹿養麝。所自。苕溪漁隱曰：山谷此詩乃是河天月暈魚分子。槲葉風微鹿養麝。非麝字韻。復齋誤矣。

苕溪漁隱曰：後山謂魯直作詩過於出奇，誠哉是言也。如和文潛贈無咎詩：本心如日月，利欲食之既。王聖涂二亭歌：絕去藪澤之羅兮。官于落羽。洪玉父云：魯直言羅者得落羽以輸官。凡此之類出奇之過也。也藝苑雌黃云：宿觀音院詩云：相戒莫浪出。月黑虎變藩。予不解此語。夔字不知作何訓。嘗讀老杜課伐木詩序云：維條伊枚。委積庭內。我有藩籬。是闕是補。則旅次於小安山。有虎知禁。夔人屋壁列樹白菊。鏗焉。牆實以竹。示式遏爲虎近。此序所謂夔人正謂夔府之人耳。不知山谷用此意否。

復齋漫錄云：薄薄酒云：吾聞食人之肉可隨以鞭仆之戮。乘人之車可加以鉄鍼之誅。按老萊子妻云：妾聞之可食以酒肉者可隨以鞭捶可授以官祿者可隨以斧鉞。今先生食人之酒肉受人之官祿此皆人之所制也。山谷云：今俗書庵字。旣于篆文無有。又庵非屋不當從广。三國志焦光傳云：居蝸牛廬中。意今庵也。後漢皇甫規爲中郎持節監關中兵會軍大疫死者十三四。親入庵廬巡視三軍感悅卽用此庵字爲有依據。苕溪漁隱曰：廣韻云：庵，小草舍也。菴，菴藺果。又菴蘿果也。集韻云：庵，圓屋曰庵。或從草菴。菴，藺草名。或作菴。魯直以菴非屋不當從广。然與廣集二韻全不合。殆亦難用。殊不知漢史從省文借用爲庵。

字耳。

藝苑雌黃云：荆楚歲時記，春節懸長繩于高木，士女袴服坐立其上，推引之名鞶韁。楚俗謂之拖鈎，涅槃經謂之胥索。古今藝術圖曰：鞶韁，北方山戎之戲，以習輕趨者。或云齊威公北伐山戎，此戲始傳中國。然攷之字書，則曰鞶韁繩戲也。今其字從革，實未嘗用革。按王延壽作千秋賦，正言此戲，則古人謂之千秋，或謂出自漢宮祝壽詞也。後人妄易其字爲鞶韁，而語復顛倒耳。山谷詩未到清明先禁火，還依桑下繫千秋。又云穿花蹴踏千秋索，挑菜嬉游二月晴，皆用千秋字，蓋得其實也。

苕溪漁隱曰：杜牧之詩云：薦紅半落平池晚，曲渚飄成錦一張。又云平生五色線，願補衰衣裳。魯直皆用其語。詩云：菰葉蘋花飛白鳥，一張紅錦夕陽斜。又云：公有胸中五色線，平生補袞用功深。

藝苑雌黃云：李濟翁資暇集云：假借書籍云：借一癡，借二癡，索三癡，還四癡。又玉府新書杜元凱遺其子書曰：書勿借人。古諺借書一嗤，還書二嗤。後人更生其辭，至於三四，因訛爲癡焉。紺素雜記載此二事云：癡之與嗤，其義略同。或曰：傭書者之誤。予謂此二字皆非。按廣韻云：瓻，丑飢切。酒器，大者一石，小者五斗。古之借書盛酒瓶，則借書一瓻，當用此字。或又用鴟字者，鴟夷亦盛酒器也。所謂鴟夷滑稽，腹大如壺，盡日盛酒，人復借沽，蓋此物也。山谷詩云：願公借我藏書目。時送一鴟，開鑼魚莫惜，借行千里遠。他日還君又一鴟，然則借書一鴟，用鴟字爲勝。

苕溪漁隱曰：余讀豫章先生傳贊云：山谷自黔州以後，句法尤高，筆勢放縱，實天下之奇作。自宋興以來，一人而已矣。此語蓋本呂居仁江西宗派圖敍而言。敍云：國朝歌詩之作，或傳者多依效舊文，未盡所趣。

惟豫章始大出而力振之，抑揚反覆，盡兼衆體以此也。

復齋漫錄云：荆公詠淮陰侯詩：將軍北面師降虜。此事人間久寂寥。山谷亦云：功成千金慕降虜。東面置坐師廣武。雖云晚計太疎略，此事亦足垂千古。二詩意同。荆公送望之出守臨江云：黃雀有頭顱，長行萬里餘。山谷黃雀詩：牛大垂天且剖烹。細微黃雀莫貪生。頭顱須復行萬里，猶和鹽梅傳說羹。二詩使袁譚事亦同。許彥周詩話云：淮陰勝而不驕，乃能師李左車。最奇特事。荆公詩：將軍北面師降虜。此事人間久寂寥。李廣誅霸陵尉薄於德矣。東坡詩：今年定起故將軍。未肯先誅霸陵尉。用事當如此向背。若溪漁隱曰：魯直過平輿懷李子先詩：世上豈無千里馬，人中難得九方臤。題徐孺子祠堂詩：白屋可能無孺子。黃堂不是欠陳蕃。二詩命意絕相似。蓋歎知音者難得耳。

復齋漫錄云：豫章嘗自贊其真云：似僧有髮，似俗無塵。作夢中夢見身外身。蓋亦取詩僧淡白寫真詩耳。淡白云：已覺夢中夢，還同身外身。堪歎余兼爾，俱爲未了人。若溪漁隱曰：山谷以今時人形入詩句，蓋取法於少陵。少陵詩云：不見高人王右丞。藍田邱壑蔓寒藤。又云：復憶襄陽孟浩然。清詩句句盡堪傳之類是也。故山谷云：司馬丞相驟登庸詔用元老超羣公。又云：閉門覓句陳無已。對客揮毫秦少游之類是也。近世風俗訛甚，悉以丈相呼，更不復知其字疇，敢形入詩句，必相顧而失色也。禮記云：年長以倍，則父事之；十年以長，則兄事之；五年以長，則肩隨之。今不問其長幼，悉以丈呼之，是不會讀禮記，寧不羞乎。復齋漫錄云：潘子真詩話云：霜威能折綿之句。余問山谷所從出。山谷曰：勁氣方凝酒，清威正折綿。庾肩吾詩也。余讀晉阮籍大人先生歌略曰：陽和微弱陰氣竭，海凍不流綿絮折。呼吸不通寒冽冽，乃知折綿。

之事始於阮籍庾肩吾用此耳豈山谷偶忘之邪

復齋漫錄云東坡和山谷嘲小德末句云但使伯仁長還興絡秀家蓋伯仁乃絡秀子耳洪駒父哭謝無逸詩但使添丁長終興謝客家此學東坡語尤無功添丁盧仝子氣骨不相屬也絡秀本伯仁父浚之妾小德亦庶出故坡用事其切如此山谷詩解著潛夫論不妨無外家更覺其工而符無外家爲鄉人所曉

隱居著書以譏當世得失又欲彰顯其名故號潛夫論

晉周顥字伯仁母絡秀少時在室顥父浚爲安東將軍嘗出獨遇雨止絡秀家會其父兄不在絡秀聞浚至與一婢具數十人饌甚精辦而不聞人聲浚因求爲妾其父兄不許秀曰門戶殄瘁何惜一女若連姻貴族將來庶大有益矣父兄許之後生顥及嵩謨並列顯位絡秀謂顥曰我屈節爲汝妾門戶計耳汝不與我家爲親吾亦何惜餘年顥等從命由是李氏遂得爲方雅之族



# 苕溪漁隱叢話後集卷第三十三

秦太虛

藝苑雌黃云。程公闢守會稽。少游客焉。館之蓬萊閣。一日席上有所悅。自爾眷眷不能忘情。因賦長短句。所謂多少蓬萊舊事。空回首。煙靄紛紛也。其詞極爲東坡所稱道。取其首句。呼之爲山抹微雲。君中間有寒鶲萬點。流水遶孤村之句。人皆以爲少游自造此語。殊不知亦有所本。予在臨安見平江梅知錄云。隋煬帝詩云。寒鶲千萬點。流水遶孤村。少游用此語也。予又嘗讀李義山效徐陵體贈更衣云。輕寒衣省夜。金斗熨沉香。乃知少游詞玉籠金斗時熨沉香。與夫睡起熨沉香。玉腕不勝金斗。其語亦有來歷處。乃知名人必無杜撰語。苕溪漁隱曰。晁無咎云。少游如寒景詞云。斜陽外寒鶲萬點。流水遶孤村。雖不識字人。亦知是天生好言語。其褒之如此。蓋不會見煬帝詩耳。

復齋漫錄云。少游別蘇子。由于斗野亭作詩云。古埭天連雁。荒祠木蔽牛。不堪春解手。更爲晚停舟。子由和云。飲食逢魚蟹。封疆入斗牛。予觀其意。上句取杜詩。青青竹筍迎船出。白白江魚入饌來。其下句乃取庾蘭成路已分子湘漢。星猶看于斗牛也。

復齋漫錄云。少游爲千秋歲。世尤稱之。秦旣沒。藤州晁無咎嘗和其韻。以弔之云。江頭苑外常記春朝退。飛騎軋。鳴珂碎。齊謳雲遶扇。趙舞風回帶。嚴鼓斷。杯盤藉草猶相對。洒涕誰能會。醉臥藤陰蓋。人已去。詞空在。兔園高宴悄。虎觀英游改。重感慨。驚濤自卷珠沉海。中云醉臥藤陰蓋者。少游臨終作詞。所謂醉臥

古藤陰下了不知南北故無咎用之山谷守當塗日郭功甫寓焉日過山谷論文一日山谷云少游千秋歲詞歎其句意之善欲和之而海字難押功甫連舉數海字若孔北海之類山谷頗厭未有以卻之次日功甫又過山谷問焉山谷答曰昨晚偶尋得一海字韻功甫問其所以山谷云羞殺人也爺娘海自是功甫不論文於山谷矣蓋山谷用俚語以卻之

許彥周詩話云黃魯直愛與郭功甫戲謔嘲調雖不當盡信至如曰公做詩費許多氣力做甚此語切當大有益於學詩者不可不知也

苦溪漁隱曰和東坡金山詩云雲峰一隔變炎涼猶喜重來飯積香維摩經云維摩詣往上方有國號香積以衆香鉢盛滿香飯悉飽衆會故今僧舍廚名香積二字不可顛倒也太虛乃遷就押韻殊不成語小詞云落紅鋪徑水平池弄晴小雨霏霏杏園憔悴杜鵑啼無奈春歸用小杜詩莫怪杏園憔悴去滿城多少插花人春日云卻憇小庭纔日出海棠花發麝香眠語固佳矣第恐無此理香譜云香中尤忌麝唐鄭注赴河中姬妾百餘盡騎香氣數里逆于人鼻是歲自京兆至河中所過瓜盡一蒂不獲然則海棠花下豈應麝香可眠乎同子瞻端午日遊諸寺云雙溪貫城郭暝色帶孤禽用老杜秦中紀行詩暝色帶遠客之語也

許彥周詩話云元撰作樹萱錄載有人入夫差墓中見白居易張籍李賀杜牧諸人賦詩皆能記憶句法亦各相似最後老杜亦來賦詩記其前四句云紫領寬袍漉酒巾江頭蕭散作閑人悲風有意摧林葉落日無情下水濱吁嗟若數君子者皆不能脫然高蹈猶爲鬼邪殊不可曉也若以爲元撰自造此詩則數

公之謝信可庶幾而少陵之匹右。孤留廿月能達也。老淳淳隱日分閔泊。淹移集秦。夕游有利與九首皆擬古人。如韓退之、李賀、杜牧之、白居易、李太白、杜子美、玉川子、孟郊、韋應物。內擬子美詩云：紫領寬袍漉酒巾。江頭蕭散作閑人。悲風有意摧林葉。落日無情下水濱。車馬憧憧誰道義。市朝衰衰共埃塵。覓錢稚子啼紅頰。不信山翁篋笥貧。前四句與樹萱錄同。竟誰作邪。

詩說雋永云：秦淮處度爲韓膺胄作枝巢詩。建炎間在會稽。一日語伋云：先得兩句：大勝商山老。同居一木奴。杌柂危中壘。高聳塚中纏。未知後成篇否。若溪漁隱曰：元恆錄云：巴邛人家有橘園。霜後諸橘盡收。餘二大橘。如三四斗。益巴人異之。卽令攀摘。輕重亦如常橘。剖開每橘有二老人相對象戲。談笑自若。一叟曰：橘中之樂不減商山。但不得深根固蒂。爲人摘耳。處度此詩殊不善用事。此但言橘中之樂不減商山。烏得便謂商山老。每橘有二老人。亦烏得謂之同居也。若東坡洞庭春色賦云：吾聞橘中之樂不減商山。豈霜餘之不食。而四老人者。游戲於其間。謝無逸詠橘詩云：巴邛清霜後。獨餘兩大橘。一朝剖而食。四老欣然出。乃知避世士退藏務深密。皆善用事。無疵病可指擿也。

### 陳履常

復齋漫錄云：書當快意讀易盡。客有可人期不來。世事相違。每如此。好懷百歲幾回開。其後又寄黃充前四句云：俗子推不去。可人廢招呼。世事每如此。我生亦何娛。蓋無已得意。故兩見之。

復齋漫錄云：晁無咎玉山過彭門。而無已廢居里中。無咎出小鬟舞。梁州佐酒。無已作木蘭花云：娉娉裊裊。芍藥梢頭紅樣小。舞袖低垂心倒。郎邊客已知。金樽玉酒勸我花前千萬壽。莫莫休休。白髮簪花各自

羞無咎云人疑宋開府鐵心石腸及爲梅花賦清腴艷發殆不類其爲人無已清適雖鐵石心腸不至于開府而此詞清腴艷發過於梅花賦矣苦溪漁隱曰乙酉歲余歸苦溪上才獲復齋漫錄見無已小詞因筆之

苦溪漁隱曰履常絕句云此生精力盡於詩末歲心存力已疲與溫公進呈資治通鑑表云臣之精力盡於此書之語共相脗合豈偶然邪

復齋漫錄云荆楚歲時記正月七日翦綵爲人或鏤金薄貼屏風上亦戴之像人入新年形容改新無已立春詩云巧勝向人真耐老衰顏從俗不宜新更覺其工苦溪漁隱曰余閱荆楚歲時記云正月七日翦綵爲人或鏤翦金薄爲人貼屏風亦戴之頭鬟以識新歲更始所云止此卽無像人入新年形容改新九字復齋以無已詩有衰顏從俗不宜新之句遂牽合撰此九字亦誣甚矣

文昌雜錄云立春日賜三省官采勝各有差謝于紫宸殿門杜臺卿說正月七日爲人日家家翦綵或鏤金薄爲人以貼屏風亦戴之頭鬟今世多刻爲華勝像瑞圖金勝之形引釋名華像草木華也勝言人形容止等一人著之則勝又引賈充李夫人典誠曰每見時人月旦花勝交相遺與謂正月旦也今俗用立春日亦近之然公卿家尤重此日莫不鏤金刻繪加飾珠翠或以金銀窮極工巧交相遺問焉

許彥周詩話云無已賦宗室畫詩滕王蛱蝶江都馬一紙千金不當價又作曾子固挽詞丘園無起日江漢有東流近世詩人罕匹其儔

苦溪漁隱曰寄送定州蘇尚書云枉讀平生三萬卷貂蟬當復作兜牟齊武帝戲周盤龍曰貂蟬何如兜

鑾對曰貂蟬生于兜鍪常反用此事意言蘇公之才學不當臨邊然頗牧出于儒林古人以爲美談履常之言殊覺非也

若溪漁隱曰杜牧之早雁詩云仙掌月明孤影過長門燈暗數聲來六一居士汴河聞雁云野岸柳黃霜正白五更驚破客愁眠皆言幽怨羈旅聞雁聲而生愁思至後山則不然但云遠道勤相喚羈懷悽作愁則全不蹈襲也

復齋漫錄云漢臯張君詩話謂鮑當吟孤雁云更無聲接續空有影相隨當時號爲鮑孤雁凡物有羣而孤者皆然何獨雁乎然予觀司馬文正詩話乃謂當爲河南府法曹常忤知府薛映因賦孤雁詩所謂天寒稻粱少萬里孤難進不惜充君庖爲帶邊城信薛大嗟賞時號鮑孤雁與張君所記不同而詞意亦大非前句可及當以張君所記爲失也

### 晁無咎

復齋漫錄云無咎評本朝樂章不見諸集今錄於此云世言柳耆卿曲俗非也如八聲甘州云霜風淒漸慘關河冷落殘照當樓此唐人語不減高處矣歐陽永叔浣溪沙云堤上遊人逐畫船拍堤春水四垂天綠楊樓外出鞦韆要皆絕妙然只一出字自是後人道不到處東坡詞人謂多不諳音律然居士詞橫放傑出自是曲中縛不住者黃魯直間作小詞固高妙然不是當家語自是耆卿唱好詩晏元獻不蹈襲人語而風調閑雅如舞低楊柳樓心月歌盡桃花扇影風知此人不住三家村也張子野與柳耆卿齊名而時以子野不及耆卿然子野韻高是耆卿所乏處近世以來作者皆不及秦少游如斜陽外寒鴉萬點

流水遶孤村。雖不識字。亦知是天生好言語。

菩溪漁隱曰。無已稱今代詞手。惟秦七黃九耳。唐諸人不迨也。無咎稱魯直詞。不是當家語。自是着腔子唱好詩。二公在當時品題不同如此。自今觀之。魯直詞亦有佳者。第無多首耳。少游詞雖婉美。然格力失之弱。二公之言殊過譽也。

菩溪漁隱曰。雪浪齋日記。謂晏叔原工于小詞。舞低楊柳樓心月。歌盡桃花扇影風。不愧六朝宮掖體。無咎評樂章。乃以爲元獻詞誤也。元獻詞謂之珠玉集。叔原詞謂之樂府補亡集。此兩句在補亡集中全篇云。彩袖慇懃捧玉鍾。當年拚卻醉顏紅。舞低楊柳樓心月。歌盡桃花扇影風。從別後。憶相逢。幾回魂夢與君同。今宵剩把銀缸照。猶恐相逢是夢中。詞情婉麗。

李易安云。樂府聲詩並著。最盛于唐開元天寶間。有李八郎者。能歌擅天下。時新及第進士。開宴曲江榜中。一名士先召李。使易服隱名姓。衣冠故敝。精神慘沮。與同之宴所。曰。表弟願與坐末。衆皆不顧。旣酒行。樂作。歌者進時。曹元謙念奴爲冠歌罷。衆皆咨嗟稱賞。名士忽指李曰。請表弟歌。衆皆哂。或有怒者。及轉喉發聲。歌一曲。衆皆泣下。羅拜曰。此李八郎也。自後鄭衛之聲日熾。流靡之變日煩。已有菩薩蠻。春光好。莎雞子。更漏子。浣溪沙。夢江南。漁父等詞。不可徧舉。五代干戈四海。瓜分豆剖。斯文道熄。獨江南李氏君臣。尙文雅。故有小樓吹徹玉笙寒。吹皺一池春水之詞語。雖奇甚。所謂亡國之音哀以思也。逮至本朝。禮樂文武大備。又涵養百餘年。始有柳屯田永者。變舊聲作新聲。出樂章集。大得聲稱于世。雖協音律。而詞語塵下。又有張子野。宋子京兄弟。沈唐。元絳。晁次膺輩繼出。雖時時有妙語。而破碎何足名家。至晏元獻。

歐陽永叔蘇子瞻學際天人作爲小歌詞直如酌蠡水于大海然皆句讀不葺之詩爾又往往不協音律者何邪蓋詩文分平側而歌詞分五音又分五聲又分六律又分清濁輕重且如近世所謂聲聲慢雨中花喜遷鶯既押平聲韻又押入聲韻玉樓春本押平聲韻又押上去聲又押入聲本押仄聲韻如押上聲則協如押入聲則不可歌矣王介甫曾子固文章似西漢若作一小歌詞則人必絕倒不可讀也乃知別是一家知之者少後晏叔原賀方回秦少游黃魯直出始能知之又晏苦無鋪敍賀苦少典重秦卽專主情致而少故實譬如貧家美女雖極妍麗丰逸而終乏富貴態黃卽尙故實而多疵病譬如良玉有瑕價自減半矣苕溪漁隱曰易安歷評諸公歌詞皆摘其短無一免者此論未公吾不憑也其意蓋自謂能擅其長以樂府名家者退之詩云不知羣兒愚那用故謗傷蚍蜉撼大樹可笑不自量正爲此輩發也東臯雜錄云予昔爲太學生暇日遊西池過道者院池上壁間見東坡題詩下馬逢佳客攜壺傍小池清風亂荷葉細雨出魚兒井好能冰齒茶甘不上眉歸途更蕭瑟真個解催詩後有諸公和獨記無咎一聯云雨園鳩逐婦風徑燕將兒亦佳句也

復齋漫錄云元豐己未廖明略晁無咎同登科明略所遊田氏者麗姝也一日明略邀無咎晨過田氏遽起對鑑理髮且盼且語草草擁掠以與客對無咎以明略故有意而莫傳也因爲下水船一闌云上客驪駒至鸚喚銀屏睡起困倚紵臺盈盈正解螺髻鳳釵墮繚繞金環玉指巫山一段雲委半窺鏡向我橫秋水斜領花交鏡裏淡拂鉛華匆匆自整羅綺斂眉翠雖有愔愔意空作江邊解佩情何寄

張右史

復齋漫錄云文潛詩云新月已生飛鳥外落霞更在夕陽西蓋用郎士元送楊中丞和番詩耳郎詩云河陽飛鳥外雪嶺大荒西

復齋漫錄云東坡泗州僧伽塔詩耕田欲雨刈欲晴去得順風來者怨若使人人禱輒遂造物應須日千變文潛用其意別爲一詩云南風霏霏麥花落豆田漠漠初垂角山邊夜半一犁雨田父高歌待收穫雨多瀟瀟蠶簇寒蠶婦低眉憂繭單人生多求復多怨天公供爾良獨雖

苦溪漁隱曰夜涼江海近天闊斗牛微張右史集中佳句也備成集中亦有之蓋誤收入非東坡所作李太白有云天清一雁遠文潛有云天形一雁高二句俱工未易分優劣也

金石錄云唐昭陵六馬贊初太宗以文德皇后之葬自爲文刻石于昭陵又琢石像平生征伐所乘六馬爲贊刻之皆歐陽詢八分書世以爲殷仲容書非是至諸降將名氏乃仲容書耳苦溪漁隱曰文潛有昭陵六馬詩云天將剗隋亂帝遣六龍來森然風雲姿颯爽毛骨開颺馳不及視山立儼莫回長鳴視八表擾擾萬駒駘秦王龍鳳姿魚鳥不足摧腰間大白羽中物如風雷區區數堅子縛取如提孩手持掃天帚六合無塵埃艱難濟大業一一非常材惟時六驥足續與英衛陪功成鏘八鸞玉輅行天街荒涼昭陵闕古石埋蒼苔文潛得意筆也

溪堂居士

復齋漫錄云無逸嘗于黃州關山杏花村館驛題江城子詞云杏花村裏酒旗風烟重重水溶溶野渡舟橫楊柳綠陰濃望斷江南山色遠人不見草連空夕陽樓外晚燈籠粉香融淡眉峰記得年年相見畫屏

中只有關山今夜月千里外素光同過者必索筆于館卒卒頗以爲苦因以泥塗之

復齋漫錄云晉許遜爲旌陽令時江西有蛟爲害旌陽與丹徒吳猛仗劍殺之遂作大鐵柱以鎮壓其處今豫章有鐵柱觀而柱猶存也無逸嘗賦詩云豫章城南老子宮塔前一柱立積鐵云是旌陽役萬鬼夜半昇來老蛟穴插定三江不沸騰切勿搖撼坤軸裂蒼苔包裹鱗皴皮我欲摩挲肘屢掣旌陽掣家上天去只留千夫應門戶西山高處風露寒茲事恍惚從誰語安得猛士若朱亥袖往橫山打狂虜

張芸叟

復齋漫錄云芸叟嘗評詩云永叔之詩如乍成春服乍熱釀醅登山臨水竟日忘歸王介甫之詩如空中之音相中之色人皆聞見難可着摸石延年之詩如飢鷹夜歸岩冰春拆迅逸不可言蘇東坡之詩如武庫初開矛戟森然不覺令人神懶仔細檢點不無利鈍梅聖俞之詩如深山道人草衣葛履王公見之不覺屈膝郭功甫之詩如大排筵席二十四味終日揖遜求其適口者少矣世以爲知言余謂芸叟之論公否未敢必然觀東坡所記芸叟西征途中詩止云張舜民通練西事稍能詩而已則東坡蓋不以善詩待芸叟邪

苕溪隱漁曰西清詩話蔡百衲條所撰也已嘗行于世矣余舊錄得百衲所作詩評今列于此云柳子厚詩雄深簡淡迥拔流俗至味自高直揖陶謝然似入武庫但覺森嚴王摩詰詩渾厚一段覆蓋古今但如久隱山林之人徒成曠淡杜少陵詩自與造化同流孰可擬議至若君子高處廊廟動成法言恨終欠風韻黃太史詩妙脫蹊徑言謀鬼神唯胞中無一點塵故能吐出世間語所恨務高一似參曹洞下禪尙墮

在元妙窟裏。東坡詩天才宏放。宜與日月爭先。凡古人所不到。發明殆盡。萬斛泉流。未爲過也。然頗恨方朔極諫時。雜以滑稽。故罕逢醞藉。韋蘇州詩。如渾金璞玉。不假雕琢成妍。唐人有不能到。至其過處。大似村寺高僧。奈時有野態。劉夢得詩。典則既高。滋味亦厚。但正若巧匠。矜能不見。少拙。白樂天詩。自擅天然。貴在近俗。恨如蘇小雖美。終帶風塵。李太白詩。逸態凌雲。照映千載。然時作齊梁間人體段。略不近渾厚。韓退之詩。山立霆碎。自成一法。然譬之樊侯冠佩。微露粗疎。柳柳州詩。若捕龍蛇。搏虎豹。急與之角。而力不敢暇。非輕蕩也。薛許昌詩。天分有限。不逮諸公遠矣。至合人意處。正若芻豢。時復咀嚼自佳。王介甫詩。雖乏丰骨。而翻出清新。方似學語之小兒。酷令人愛。歐陽公詩。溫麗深穩。自是學者所宗。然似三館畫手。未免多與古人傳神。杜牧之詩。風調高華。片言不俗。有類新及第少年。略無少退藏處。固難求一唱而三歎也。右此十四公。皆吾生平宗師追仰所不能及者。留心旣久。故閑得而議之。至若古今詩人。自是珠聯玉映。則又有不得而知也已。

王仲至

復齋漫錄云。仲至與少游謁恭敏李公。飯于閑燕堂。卽席聯句云。黃葉山頭初帶雪。綠波尊底暫回春。欵臣已聞璧月暖枝句。更看朝雲暮雨人。觀老愧紅粧翻曲妙。喜逢佳客放懷新。欵臣天明又出桃源去。此境何時再問津。觀

復齋漫錄云。仲至使遼回。謁恭敏李公。席中賦詩云。穹廬三月已淹留。白草黃雲見卽愁。滿袖塵埃何處洗。李家池上海棠洲。

# 苕溪漁隱叢話後集卷第三十四

張天覺

復齋漫錄云天覺旣相謝表有云十年去國門前之雀可羅一日還朝屋上之鳥亦好微宗親題于所御扇然丁晉公詩固嘗云屋可占鳥曾貴士門堪羅雀稱衰翁矣王元之黃州上任謝表云宣室鬼神之間敢望生還茂陵封禪之書已期身後亦出于杜子美竟無宣室召徒有茂陵求之語前輩不以爲嫌者蓋文勢事情自須如此也苕溪漁隱曰東坡有云怒移水中蟹愛及屋上鳥亦佳對也

苕溪漁隱曰梅聖俞有續金針詩格張天覺有律詩格洪覺範有禁臠此三書皆論詩也聖俞金針詩格云有內外意內意欲盡其理外意欲盡其象內外含蓄方入詩格如旌旗日暖龍蛇動宮殿風微燕雀高旌旗喻號令日暖喻明時龍蛇喻君臣言號令當明時君所出臣奉行也宮殿喻朝廷風微喻政教燕雀喻小人言朝廷政教才出而小人向化各得其所也如島嶼分諸國星河共一天言明君理亂一統也天覺律詩格辨諷刺云諷刺不可怒張怒張則筋骨露矣若廟堂生莽卓岩谷死伊周之類也未如花濃春寺靜竹細野池幽花濃喻媚臣秉政春寺比國家竹細野池幽喻君子在野未見用也沙鳥晴飛遠漁人夜唱閑沙鳥晴飛遠喻小人見用漁人比君子夜不明之象言君子處昏亂朝廷而樂道也芳草有情皆礙馬好雲無處不遮樓芳草比小人馬喻勢利之輩雲喻詔佞之臣樓比鈞衡之地若此之類可謂言近而意深不失風騷之體也其說數十悉皆類此覺範禁臠云杜子美詩言山間野外事意在譏刺風俗如

三絕句曰：楸樹馨香餘釣磯，斬新花藥未應飛。言後進暴貴可榮觀也，不如醉裏風吹盡，可忍醒時雨打稀。言其恩重材薄，眼見其零落，不若未受恩眷時，比天恩以雨多，故致花易壞也。門外鷗鷺久不來，沙頭忽見眼相猜。言貪利小人畏君子之譏其短也。自今已後知人意，一日須來一百回。言君子蒙以養正瑾瑜匿瑕，山藪藏疾，不發其惡而小人未革面，詔諛不知媿恥也。無數春笋滿林生，柴門密掩斷人行。會須上番看成竹，客至從嗔不出迎。言唯守道爲歲寒也。前輩多法其意作之，如韓稚圭詩曰：風定曉枝蝴蝶鬧，雨勻春圃桔槔閑。又蔡持正詩曰：風搖熟果時閑落，雨滴餘花亦自香。以雨比天恩也。桔槔比宰相功業之就已退閑矣。時公在相州作熟果比大臣黜落，時公在安州覺範舊遊天覺之門，宜其論詩之相似也。余謂論詩若此皆非知詩者。善乎山谷之言曰：彼喜穿鑿者棄其大旨，取其發興于所遇林泉人物草木魚虫，以爲物物皆有所託，如世間商度隱語者，則詩委地矣。

唐子西

苕溪漁隱曰：上張天覺內前行云：內前車馬撥不開，文德殿宣麻回紫微。侍郎拜右相，中使押赴文昌臺。此語善于敍事質而不俚。又云周公禮樂未要作，致身姚宋亦不惡。向來兩翁當國年，民間斗米纔四錢。此語善于諷誦，當而有理，皆可法也。湖上云：佳月明作哲，好風聖之清。栖禪暮歸云：草青仍過雨，山紫更斜陽。語意俱新矣。

苕溪漁隱曰：晚春云：水國春深梅子雨，江天日暮鯉魚風。用李賀江樓曲云：樓前流水江陵道，鯉魚風起芙蓉老。子西有云：素知行路惡，敢厭在家貧。樂天有云：始知爲客苦，不及在家貧。二聯語意絕相類，並佳。

句也

復齋漫錄云辨蜀論云自頃諸公議論頗以蜀人爲疑苟可以防閑沮遏無不爲矣吾不知其說也以公孫述嘗有蜀乎是時王郎據邯鄲盧芳據九原劉永據梁宋隗囂據秦隴而秦豐李憲之屬不可勝數何獨蜀也以劉氏嘗有蜀乎是時曹氏據河南袁紹據河朔袁術據九江劉表據荊州孫氏據江表而公孫度呂布之屬不可勝數何獨蜀也以王孟嘗有蜀乎是時劉隱稱南漢李景稱南唐錢鏐稱吳越劉崇稱東漢而馬殷王審知高季興之屬不可勝數何獨蜀也其大略如此余後因讀外史構杌見五代時後唐魏王伐蜀之後朝廷頗疑蜀人凡有勢力貲產之族悉令遣入洛隱士張立爲詩以諷曰朝廷不用憂巴俗稱伯何曾是蜀人乃知子西用其意凡子西數百言而立以十四字盡之可謂簡而當矣

復齋漫錄云禹貢華陽黑水惟梁州岷嶓既藝沱潛既道蔡蒙旅平和夷底績則蜀道與中國通久矣蜀主本紀載秦惠王謀伐蜀刻五石牛置金其後給蜀人云能糞金蜀主信之發卒千人使五丁力士開道致牛于成都秦因遣張儀隨石牛以入蜀遂奪蜀焉此事尤近誣蜀人吳師孟醇翁金牛驛辨之以詩云唱奇騰怪可刪修爭奈常情勝謬悠禹貢已書開蜀道秦人安得糞金牛萬重山勢隨坤順一勺天波到海流自哂據經違世俗庶幾同志未相尤醇翁以通議大夫致仕享年九十

韓子蒼

詩說雋永云呂居仁作江西宗派圖置子蒼其間韓不悅而蘇黃門初見韓詩自云惚然再見儲光羲也若溪漁隱曰余閱欒城集有題韓駒秀才詩卷一絕云唐朝文士例能詩李杜高深到者稀我讀君詩笑

無語恍然再見儲光羲。

復齋漫錄云子蒼嘗言作詩文當得人印可乃自不疑所以前輩汲汲於求知也。

復齋漫錄云火樹銀花合星橋鐵鎖開暗塵隨馬去明月逐人來遊妓皆穠李行歌盡落梅金吾不禁夜玉漏莫相催唐蘇味道上元詩也韓子蒼和館中上元游葆真宮觀燈詩云開卷愛公如李益解言明月逐人來多情好共春流轉刻燭題詩又一回子蒼以蘇詩爲李益何邪然蘇意乃取梁朱起望月詩耳朱云唯餘故樓月遠近必隨人。

若溪漁隱曰東坡續麗人行詩注云李仲謀家有周昉畫背面欠伸內人極精戲作此詩云深宮無人春晝長沉香亭北百花香美人睡起薄梳洗燕舞鶯啼空斷腸畫工欲畫無窮意背立春風初破睡若教回首更嬌然陽城下蔡俱風靡子蒼用此意題伯時所畫宮女云睡起昭陽暗淡粧不知緣底背斜陽若教轉盼一回首三十六宮無粉光終不及東坡之偉麗也。

復齋漫錄云皮日休謝人送酒云門巷寂寥空紫苔先生應渴解醒盃醉中不得相親問故遣青州從事來晉桓溫有主簿善別酒味以好者爲青州從事謂青州有齊郡言到臍也子蒼謝信守連鵬舉送酒云詩說雋永云王咸平黼爲校書郎日嘗夢龍降其室故子蒼作咸平生日詩云昔年親擢校書郎夜夢蒼龍繞屋梁異事那知今日應六龍深駐載賡堂又云已向叢霄侍玉宸竭來端爲付經綸不須更說人間事曾是仙中第一人黃和固陵御製詩云君王龍記赭加卿卽其事也。

後齋漫錄云晁元忠西歸詩安得龍山潮駕回安河水水從樓前來中有美人淚子蒼取其意以代葛亞卿作詩云君住江濱起畫樓妾居海角送潮頭潮中有妾相思淚流到樓前更不流唐孫叔向有經昭應溫泉詩云一道泉回繞御溝先皇曾向此中游雖然水是無情物也到宮前咽不流子蒼末句又用孫語也苕溪漁隱曰余以陵陽集閱之子蒼十絕爲葛亞卿作皆別離之詞必亞卿與妓別子蒼代賦此詩其詩云妾願爲雲逐畫檣君言十日看歸航以此可知也又云初合雙鬟觸事差離筵酌酒強回頭縱言眼軟偏饒淚莫道心癡不解愁亦佳句也徐師川跋云夏木陰陰欲放船黃鸝啼了落花天十詩說盡人間事付與風流葛稚川

苕溪漁隱曰子蒼題明皇上馬圖云翠華欲幸長生殿立馬樓前待貴妃尙覓君王一回顧金鞍欲上故遲遲余舊觀蔡天啓集中有此詩竟誰作邪

復齋漫錄云李彭商老有建除體贈子蒼云滿朝以詩鳴何獨遺大雅平生黃葉句摸索便知價蓋是時子蒼自館職斥宰分寧縣時也子蒼有和李上舍冬日詩最爲世所推故商老有黃葉之句全篇云北風吹日晝多陰日暮擁堵黃葉深倦鵠遶枝翻凍影飛鴻摩月墮孤音推愁不去如相覓與老無期稍見侵顧藉微官年少事病來那復一分心

苕溪漁隱曰鄭谷等共定今體詩格一進一退韻如李師中送唐介七言八句詩是也子蒼于五言八句近體詩亦用此格其詩云盜賊尤如此蒼生困未蘇今年起安石不用笑包胥子去朝行在人應問老夫鬚髮衰白盡瘦地日攜鉏蓋蘇夫在十虞字韻詩說雋永云子蒼和人詩云窮如老鼠

穿牛角拙似鮎魚上竹竿。若溪漁隱曰：余蹭蹬銓選四十載，拙固有之，貧亦宜然。每以子蒼自況，屢哦此一聯，真余著題也。以陵陽集徧尋無之，因足成一章云：執戟老人雙鬢班，陸沉三世不遷官。窮如老鼠穿牛角，拙似鮎魚上竹竿。豈有葡萄博名郡，空餘苜蓿上朝盤。榮華氣象無絲許，正坐平生骨相寒。

若溪漁隱曰：汪彥章自吳興移守臨川，曾言甫以詩送之云：白玉堂中曾草詔，水精宮裏近題詩。先以示子蒼，子蒼爲改兩字，白玉堂深曾草詔，水精宮冷近題詩。迥然與前不侔，蓋句中有眼也。

陳去非

若溪漁隱曰：去非舊有詩云：風流丘壑眞吾事，籌策廟堂非所知。其後登政府無所建明，卒如其言。九日詞云：九日登臨有故常，隨晴隨雨一傳觴。用退之淮西碑欲事故常之語，又憶洛中舊遊詞云：憶昔午橋橋上飲，坐中多是豪英。長溝流月去無聲，杏花疎影裏吹笛至天明。此數語奇麗，簡齋集後載數詞，惟此詞爲優。

若溪漁隱曰：去非詩云：一官成一集，盡付古沙頭。蓋用王筠事，而楊大年亦如此。南史王筠自撰其文章，以一官爲一集，自洗馬、中書、中庶、吏部、左佐、臨海、大府各十卷，尚書三十卷，凡一百卷，行于世。本朝名臣鏡微波喜搖人，小立待其定。

若溪漁隱曰：去非詩云：京師葆眞宮，垂楊映沼。有山林之趣，去非將罷尚符日，題其池亭云：聊將兩鬢蓬，起照千丈鏡。微波喜搖人，小立待其定。

傳楊億爲文每官成一集所著括蒼、武夷、潁陰、韓城退居汝陽蓬山辭榮冠鼈等集。

四六談塵云去非草故相義陽公起復制云眷子次輔方宅大憂爲言者令貼麻陳改云方服私艱說者又以爲語忌王初察草鄭華陽持餘服麻云矧君臣相與之際當諒乃心顧忠孝兩全之難重違所請。

### 周明老

復齋漫錄云荆楚歲時記云冬至一百五日卽有疾風甚雨謂之寒食王君玉詩疾風甚雨青春老瘦馬肥牛綠野深又見明老詩藁云疾風甚雨悲遊子峻嶺崇岡非故鄉苕溪漁隱曰余亦云飛絮落花春向晚疾風甚雨暮生寒。



# 苕溪漁隱叢話後集卷第三十五

本朝雜記上

蔡寬夫詩話云唐學士院在右銀臺內舍光殿宴罷歸院多經叢武樓故鄭畋酬通義劉相瞻詩曰劉剛暗借驄輪便叢武樓中似去年蓋以嘗與瞻同爲學士侍宴故也故事凡禁中有燕設則學士院備食以延從官宋宣獻公罷禁林後因宴日再至以詩寄故院云雲間乍闋仙韶曲禁裏還過叢武樓蓋用唐事前輩立意命辭皆不草草此尤精確云

元城先生語錄云先生言玉堂故事人多不解太宗嘗飛白題翰林學士院曰玉堂之廬正字以英廟諱蓋此四字出于漢李尋傳且玉堂殿名而待詔者有直廬在其側李尋待詔黃門故云久汚玉堂之廬至英廟嗣位乃行撤去及元豐中有翰林學士上言乞摘上兩字復榜院門以爲臣下光寵詔可是乞以殿召名其院也不遜甚矣僕退而檢漢書蓋漢之待詔者或在公車或在金馬門或在宦者或在黃門時李尋待詔黃門哀帝使侍中往問災異對曰臣尋位卑術淺偶遇衆賢待詔食大官衣御府久汚玉堂殿之廬師古曰玉堂殿在未央宮然制度不見其詳獨翼奉傳略載之奉嘗上疏曰漢德隆盛在于孝文皇帝躬行節儉外省徭役其時未有甘泉建章及上林中諸離宮館也未央宮又無高門武臺麒麟鳳凰白虎玉堂金華之殿獨有前殿乃武帝所造也僕後以問先生先生曰然苕溪漁隱曰金坡遺事云淳化二年十月翰林學士蘇易簡有劄子乞御書玉堂之署太宗飛白四字付宰臣李昉于中書面賜之以光禁林事始于

此也。

復齋漫錄云。錢內翰希白畫景詩云。雙蜂上簾額。獨鵠裊庭柯。一裊字最其所用意處。然韋蘇州聽鶯曲。有時斷續聽不了。飛去花枝猶裊裊。已落第二矣。

許彥周詩話云。錢希白作擬唐詩百篇。備諸家之體。自序曰。今之所擬。不獨其詞。至于題目。豈欲拋離本集。或有事疏斯亦見之。本傳故其擬張籍上裴晉公詩曰。午橋莊上千竿竹。綠野堂中白日春。富貴極來惟歎老。功名高後轉輕身。嚴更未報皇城裏。勝賞時遊洛水濱。昨日庭趨三節度。淮西曾是執戈人。又作擬盧仝詩云。門前飛楊花。屋後惡水鳴青蛙。案上兩卷書。堯典與舜典。留與添丁作生涯。擬古當如此相似方可傳。

苕溪漁隱曰。沈存中筆談云。真宗時向文簡敏中拜右僕射。麻下日。李昌武爲翰林學士。當對。上謂之曰。朕自卽位以來。未嘗除僕射。今日以命敏中。此殊命也。敏中應甚喜。對曰。臣今日早候對。亦未知宣麻。不知敏中何如。上曰。敏中門下今日賀客必多。卿往觀之。明日卻對來。勿言朕意也。昌武候丞相歸。乃往見丞相。謝客門闌。悄然無一人。昌武與向親徑入見之。徐賀曰。今日聞降麻。士大夫莫不歡慰。朝野相慶。公但唯唯。又曰。自上卽位。未嘗除端揆。此非常之命。自非勳德隆重。眷倚殊越。何以至此。公復唯唯。終未測其意。又歷陳前世爲僕射者。勳勞德業之盛。禮命之重。公亦唯唯。終無一言。旣退。復使人至庖廚中。問今日有無親戚賓客。飲食宴會。亦寂無一人。明日再對。上問昨日見敏中否。對曰。見之。敏中之意何如。乃以其所見對。上笑曰。向敏中大耐官職。故呂居仁寄向縣丞詩云。耐官丞相風流在。坐守簞瓢不訴窮。張仲

宗作向伯恭雍熙堂詩亦云家世從來耐官職百年猶見典型存然本朝名臣傳乃云李文靖沆其初相也真宗密使中人覩之曰朕首命沆爲相汝私往觀其忻戚中使還言其門無車馬蕭然如常上歎曰李沆大耐官職豈非名臣傳所記之誤邪

幕府燕閑錄云韓魏公初罷相出鎮長安或獻詩云是非莫問門前客得失須憑塞上翁引取碧油紅旆去鄴王臺畔醉春風公以爲然卽請守相州若溪漁隱曰先君有言近世士人與上官詩無非訛詞未聞有規勸之語者或者獻詩於魏公勸其辭分陝之重而爲晝錦之榮可謂能規勸矣

文昌雜錄云太師潞公西歸開封推官趙君錫作小詩二十篇紀恩寵以送行其尤爲人傳誦者如樂人都用教坊家席上羣公換口誇內裏宣來蕉葉蓋御前賜出縷金花坐上纔初佳句傳中官寫得便聞天聖人含笑搜尋了依韻當時賜和篇西苑重排餞會時新篇御製降形墀明朝上已無公事赴宴臣僚總進詩雖王建宮詞無以過此也

法藏碎金云予壯歲歷官之日嘗見公館壁上有題詩云猛風拔大樹其樹根已露上有寄生草青青猶未悟不知何人之作也因知物理自昔而然先覺形言警戒多矣

復齋漫錄云雲齋廣錄記馮當世慶歷中以鄂州薦至大江風濤洶湧幾至沉沒來春廷試第一還過大江風微浪穩舟楫安然公題詩江亭云江神也世情爲我風色好余讀唐文粹見施肩吾及第後過揚子江詩云憶昔將貢年抱愁此江邊魚龍鬪閃爍黑浪高於天今日步春草復來經此道江神也世情爲我風色好迺知當世取肩吾末句題於江亭耳非自作也

東臯雜錄云呂文穆蒙正少年讀書西京龍門利涉院壁間題詩云怪得池塘春水滿夜來雷雨起南山狀元宰相之兆已見于此詩矣。

苕溪漁隱曰荆楚歲時紀云立春日悉翦綵爲燕子以戴之故歐陽永叔詩云不驚樹裏禽初變共喜敘頭燕已來鄭毅夫云漢殿鬪簪雙綵燕併知春色上敘頭皆立春日帖子詩也。

藝苑雌黃云修真入道祕言曰以立春日清晨北望有紫綠白雲者爲三元君三素飛雲三元君以是日乘八輿上詣天帝子候見當再拜自陳某已乞得給侍輪轂三過見元君之輦者白日昇天歲時廣紀載此事云臣鑄按舉場嘗試立春日望三素雲詩取此事故蘇子容作皇太妃閣春帖子云萬年枝上看春色三素雲中望玉宸許沖元作皇帝閣春帖子云三素雲飛依北極九農星正見南方

法藏碎金云世間人中年二顛倒者十有七八其一少而當勤以圖身計而反自放逸老而無成故古人有詩云少年輕歲月不解早謀身晚歲成無益低眉向世人其一老而當逸以就便安而反自勞役老而彌苦故古人有詩云可憐八九十齒墮雙眸昏朝露貪名利夕陽憂子孫惟此二事知之不難而知者尙少何況深妙之事乎

上庠錄云胡先生瑗湖州人以德行名於時州人遺子弟從之學者數百人慶歷四年仁宗興太學有司乞下湖州取先生法以爲太學法遂著爲令傳者謂今五等齋規是也後數年先生始來居太學四方之士聞先生名自遠而至太學不能容遂傍取官舍以爲學舍太學西廡即御書閣所在祖宗以來嚴火禁而齋不許燈先生請於朝乞勿禁燈惟遺火者以皇城法論自是士始便之

四六談慶云熙寧間鄧潤甫作邢妃制云周南之詠耳無險詖私謁之心齊詩之美雞鳴有警戒相成之道後王荊公退居金陵屢用之孫巨源作除太尉制云秦官太尉漢代上公語典而重

蔡寬夫詩話云唐制中書舍人六員皆預省事嘗以其間一人專掌書畫故謂之知制誥闕則用他官兼知其後翰林置學士遂分內外制學士自外官拜者貞元初皆召試制書批答詩各一首張仲素後有加賦一首名曰五題惟自中書舍人拜則免試爲其嘗已掌外制故也李文正公顯德中以主客員外郎遷屯田郎中爲學士竇儀以詩賀之曰新銜錦帳連三字舊制星垣放五題蓋以此也貞元以前學士職尤未重故滿三歲始遷知制誥元和後自學士入爲相者十七人故自舍人拜者皆以爲優然制誥本中書正職事何用更入銜元豐宮制行雖以六舍人分隸六房事命詞書畫皆隨其房掌之員闕則事簡者兼遂削去知制誥而惟學士帶之蓋制命本出中書學士特掌之故耳此所以爲稱也

蔡寬夫詩話云唐兩省官上事皆宰相親送之上事官設牀几面南判案三道宰相別施一牀坐于西隅謂之壓角不知何義亦不知所從起此禮今不復存惟中書舍人上日設氈褥于庭下北向再拜閣老一人別設褥位立于東北隅候上事官拜畢則相與揖而升階亦謂之壓角蓋有餘風也吳正憲詩云壓角舊儀煩閣老濡毫逋責費公移宋龍圖次道詩云聖世建官追茂制唐家壓角失前規皆以記此宰相不親送或曰馮瀛王爲相時判紙尾罷之後遂不講舊制辭皆有潤筆隨官品定數以謂當制官辭頭疎數不同其所得亦有多寡不均因請集而分之故晏元獻有潤毫均厚薄之句其後有當送而不至者往往牒催是以正憲公詩併及之此皆西垣舊事元豐宮制行遂罷潤筆今惟石刻官品物數尙龕於舍人廳

壁云。

文昌雜錄云。余記中書舍人禮上壓角。未詳何義。按唐裴坦傳。載令狐綯薦坦爲知制誥。裴休持不可。不能奪。故事舍人初詣省視事回。丞相送之。施一榻于堂上。壓角而坐。坦見休重愧謝。休喟然曰。此令狐丞之舉。休何力。顧左右索肩輿出。宋次道乃云。舍人上事必設紫褥於庭。面北拜。閣長立褥之東北隅。謂宰相臨焉。上事者設床几。面南而坐。判三道案。宰相別施一牀。連上事官。南坐于西隅。謂之壓角。自常侍以下。以南爲上。差誤相承。實乖禮敬。何不爲丞相設位于衆官之南。常侍諫議給事舍人循次而坐于丞相之下。尊卑有序。足以爲儀。由此觀之。不獨中書舍人。凡兩省官禮上宰相皆壓角也。至五代馮道爲宰相。判狀尾罷之。應自此閣長立于東北隅。猶謂之壓角。如宋次道所紀也。又五代會要晉天福五年三月。勅中書門下五品已上兩省上事。宰相壓角之禮宜廢。

復齋漫錄云。亭亭畫舸係春潭。只向行人酒半酣。不管烟波與風雨。載將離恨過江南。張文潛詩也。王平甫嘗愛而誦之。然余謂張特取東坡長短句。無情汁。水自東流。只載一船離恨向西州之句。苕溪漁隱曰。余以張右史集徧尋無此詩。蔡寬夫詩話以謂此詩嘗有人於客舍壁間見之。莫知誰作。或云鄭兵部仲賢也。然集中無之。二說竟未知孰是。

苕溪漁隱曰。余於叢話前集云。鄭兵部仲賢。鄭工部文寶。不知其果一人邪。果二人邪。今觀歐陽永叔詩話云。鄭工部文寶。於張僕射園吟詩一聯。最爲警絕云。水暖鳧鷺行哺子。溪深桃李臥開花。蔡寬夫詩話

云鄭兵部仲賢歐陽文忠公稱其張僕射園中一聯以爲集中少比卽前一聯詩是也以此考之則文寶仲賢蓋是一人名與字耳但工部兵部之稱不同西清詩話云緜山王子晉祠詩是鄭工部文寶題則工部之稱與歐公同但蔡寬夫誤作兵部耳余又於前集云夷季幼槃或謝適之字乎比見臨川謝幼槃文集方知幼槃是謝適之字無逸之弟也其謝夷季卻別是一人

四六談塵云王荊公拜相麻世所稱工然腦詞乃云若礪於舟世莫先於汝作有袞及繡人久佇於公歸或以爲先後失倫王初寮作宣德門成賞功制云閣道穹隆兩觀擎翔於霄漢闕庭煥麗十戶開闔於陰陽時謂工則工矣但喚下句不來

復齋漫錄云古今詩話美方謗上廣守詩鱷去溪潭韓吏部珠還合浦孟嘗君不知珠還合浦乃後漢孟嘗不可以孟嘗君遷就也

苕溪漁隱曰淮北之地平夷自京師至汴口並無山惟隔淮方有南山米元章名其山爲第一山有詩云京洛風塵千里還船頭出沒翠屏間莫能衡霍撞星斗且是東南第一山此詩刻在南山石崖上石崖之側有東坡行香子詞後題云與泗守游南山作字畫是東坡所書小字但無姓名崇觀間禁元祐文字遂鏽去之余頃居泗上皆打得此二碑至今尙存其詞云北望平川野水荒灣共尋春飛步孱顏和風弄袖香霧縈鬟正酒酣人語笑白雲間飛鴻落燕相將歸去淡涓娟玉宇清閑何人無事宴坐空山望長橋上燈火亂使君還

上庠錄云世稱太學聚天下士旣知道理又無持祿固寵之累故其品藻人物皆合公議于是以太學爲

無官御史臺。神宗謂舒亶曰。頗聞太學生好雌黃人物。雖執政官亦畏其口。何也。然則無官御史臺之號。恐自此始。

東臯雜錄云。蔡忠懷秉政日。吳處厚數千以差遣。得知漢陽。不如意。忠懷俄出守安陸。賦詩十絕。處厚乃箋注文致其怨望。疏于朝。宣宗大怒。遂竄新州。處厚改知衛州。素餌硫黃。至是疽發于腦。自嚼其舌斷而死。苕溪漁隱曰。余于叢話前集已載持正因吳處厚箋注其詩而得罪。今錄此事以附益之。姑爲小人之戒也。

四六談麈云。四六全在編類古語。李義山有金鑰。宋景文有一字至十字對句。司馬文正有金桴。王岐公在中書極久。生日例有禮物之賜。集中謝表其用事多同。而語不蹈襲。李衛公作文箴云。譬諸日月。雖終古嘗見。而光景嘗新。宣和末。罪已詔如天變。譴見而朕不悟。百姓怨懟而朕不知。乃用陸宣公語。宇文叔通詞也。呂成公求退表云。侵尋甲子。六十有三。補報朝廷。萬分無一。乃出於李黃門邦直。

東臯雜錄云。熙寧中。章子厚奉詔城沅州時。陶弼知辰州。贈詩云。善戰無如新息侯。漢兵纔渡綠蘿州。君挽我陶溪粟。直到牂牁水口頭。詩刻今在沅州洪江寨。寨正與牂牁水相直。

復齋漫錄云。熙寧六年冬。建昌軍城北五里間。甘滴降於進士徐上交別業。松上濃厚如酒澤。其味甜香。山上亦多甘露。何獨徐家地分乎。羣童各持松葉吮弄甚多。時有野叟賣藥於市者。語人曰。太守不察耳。何物爲甘露。露自天降。而偏於數畝間乎。吾嘗客華陰。縣民亦有以甘露降告縣者。縣令因出自按之。有

道人笑焉縣令怒械繫之道人曰譬如人身精液流通均布六七十年中若其壽短促則湧併於未死之前矣此木蓋將槁故耳官人不信請留我以待明春此松必不復榮也縣令如其說果驗焉元祐丙子渾城西天慶觀松一株有甘露郡人皆以爲祥及聞此野夫之說有詣天慶觀觀之昔時甘露所降之松果已先枯矣

上庠錄云熙寧間有福州洪浩居太學累年其父以詩寄之云太學何蕃且一歸十年甘旨誤庭闈休辭客路三千遠應念人生七十稀腰下雖無蘇子印篋中幸有老萊衣歸期定約春前後免使高堂詠式微浩得詩感泣於是揖諸生遂歸聞而歸者十五六焉逮紹聖間始著歸省之令然猶九年爲限崇寧二年推行三舍有司以學法進呈徽宗曰興學校以厚人倫申孝弟而學生有祖父母父母不歸省侍立法有九年之久考之人情頗爲未安因改爲三年之限苕溪漁隱曰雲齋廣錄亦載前詩以洪浩爲餘杭人復齋漫錄云廬山瑞香花古所未有亦不產他處天聖中始稱傳東坡諸公繼有詩咏豈靈草異芳俟時乃出故記序篇什悉作瑞字訥禪師云山中瑞采一朝出天下名香獨見知張祠部圖之強名佳客以瑞爲睡焉其詩曰曾向廬山睡裏聞香風古斷世間春竊花莫撲枝頭蝶驚覺南柯半夢人苕溪漁隱曰余觀元祐羣公集並無詠瑞香花詩惟東坡次韻曹子方龍山真覺院瑞香花云幽香結淺紫來自孤雲岑骨香不自知淺色意殊深移栽青蓮宇遂冠薈葛林結爲楚臣佩散落天女襟又有西江月詞三首其一云領巾飄下瑞香風驚起謫仙春夢其一云更看微月轉光風歸去春雲入夢東坡詞意亦與張祠部詩意相類但能含蓄之耳

苕溪漁隱曰。陳子高九日瑞香盛開。有詩云。宣和殿裏春風早。紅錦薰籠二月時。流落人間真善事。九秋霜露卻相宜。俚俗因此詩。遂號瑞香爲錦薰籠。余嘗嫌其名不雅。未能易之也。兼此詩亦淺近。子高別有古詩一篇。意含諷刺。語加微婉。得騷人之體格。其詩云。佳人在空谷。雙星思銀河。契闊不有命。盛時豈蹉跎。娟娟匡廬秀。如此粲者何。香蜜綴紅繆。寶薰罩宮羅。幽窗下團鑾。微風自婆娑。寂寥千年初。戢戢蓬艾多。何階託方便。百金聘猗儺。赤欄青蔑舫。丁寧護根窠。泥沙亦天幸。扳聯入宣和。誰令蘭蕙徒憔悴。守岩阿。

許彥周詩話云。陳克子高作贈別詩云。淚眼生憎好天色。離觴偏觸病心情。雖韓偓溫庭筠未嘗措意至此。

苕溪漁隱曰。木樨閩中最多。路傍往往有參天合抱者。土人以其多而不貴之。漕宇門前兩徑。自有一二百株。至秋花盛開。籃輿行清香中。殊可愛也。古人賦詠。惟東坡倅錢塘。八月十七日天竺送桂花。分贈元素詩云。月缺霜濃細葉乾。此花元屬桂堂仙。鶯峰子落驚湔夜。蟾窟枝空記昔年。破戒山僧憐耿介。練裙溪女鬪清妍。顧公採擷紱幽佩。莫遣孤芳老澗邊。陳去非有詞云。黃衫相倚翠葆層層底。八月江南風日美。弄影山腰水尾。楚人未識孤妍。離騷遺恨千年。無住庵中新夢。一枝喚起幽禪。万俟雅言有詞云。芳菲葉底。誰會秋江意。深綠護輕黃。怕青女霜侵憔悴。開分早晚都占九秋天。花四出。香七里。獨步珠宮裏。佳名岩桂。卻是因遺子。不自月中來。又那得蕭蕭風味。霓裳舊曲。休問廣寒人。飛太白。酬仙藥。香外無香比。文昌雜錄云。京師貴家多以酴醿漬酒。獨有芬香而已。近年方以楔楂花懸酒中。不惟馥郁可愛。又能使

酒味辛冽始於戚里外人蓋未知也。

文昌雜錄云李冠卿說揚州所居堂前杏一株極大花多而不實適有一媒姥見如此笑謂家人曰來春與嫁了此杏冬深忽攜酒一樽來云是婚家撞門酒索處子裙一腰繫杏上已而奠酒辭祝再三家人莫不笑之至來春此杏結子無數江淮亦多有嫁橘法不知是何術也。

上庠錄云貢士舉院其地本廣勇故營也有文官花一株花初開白次綠次緋次紫故名文官花花枯經年及更爲舉院花再生今欄檻當庭尤爲茂盛。

文昌雜錄云兵部杜員外言今關中有白蕤棫樸也芃芃叢生民家多採作薪且言烟與他木異嘗取試之其烟直上如線高五七丈不絕詩所謂薪之槱之物雖微可以升燎於上帝亦蘋蘩蘊藻之類邪。



# 苕溪漁隱叢話後集卷第三十六

## 本朝雜紀下

呂氏童蒙訓曰徐仲車山陽人小許榜登科初從安定先生學潛心力行不復仕進仲車一日因具公裳見貴官因思曰見貴官尚具公裳豈有朝夕見母而不具公裳者乎遂晨夕具公裳揖母事母至孝山陽人化之

司馬文正公日錄云朱壽昌父任諫議大夫壽昌母素微生壽昌歲餘遺出之因是不知所在壽昌既長求之不得乃棄官尋之刺血書懺以散與人至是得之於同州迎以歸錢子飛知永興軍奏其事乞加旌賞故召之王介甫方以李定爲至孝故送壽昌赴審官而壽昌以同母弟妹皆在同州乃折資授河中通判苕溪漁隱曰東坡云朱壽昌郎中少不知母所在刺血寫經求之五十年去歲得之蜀中以詩賀之云嗟君七歲知念母憐君壯大心愈苦羨君臨老得相逢喜極無言淚如雨不羨白衣作三公不愛白日升青天愛君五十着綵服兒啼卻得償當年烹龍爲炙玉爲酒鶴髮初生千萬壽金花詔書錦作囊白藤肩輿簾蹙繡感君離合我酸心此事今無古或聞長陵謁來見大姊仲孺豈意逢將軍開皇善桃空記面建中天子終不見西河郡守誰復譏穎谷封人羞自薦日錄又云淮南轉運司體量李定嘉祐八年四月母亡不曾丁憂介甫以李定爲至孝何其蔽邪

復齋漫錄云番陽張吉父介方娠時父去客東西川不還張君自爲兒時愴然有感其言語聲息未嘗不

在蜀也。與尙書彭公器資同學。作詩云。應是子規啼不到。致令我父未歸家。聞者皆憐之。既長。走蜀。父初無還意。乃還省母。復至涪閬。往返者三。其父遂以熙寧十三年三月至自蜀鄉人迎謁歎息。或爲感泣。一時名士皆賦詩以記其事。器資詩略云。河可以竭山可徙。我翁不歸行不已。三往三復翁歸止。翁行尙壯今老矣。兒昔未生今壯齒。郭功甫詩略云。父昔離家子方孕。子得其父今壯年。胡弗歸兮死敢請。慰我慈母心懸懸。三往三復又十載。孝子執鞭方言還。

四六談麈云。四六施于制誥表奏文檄。以便于宣讀。多以四字六字爲句。宣和間。多用全文長句爲對。習尙之久。至今未能全變。前輩無此體也。此起于王咸平翰苑之作。人多倣之。兼四六之義。在于裁剪。若全句對全句。亦何以見工。以經語對經語。史語對史語。詩語對詩語。方妥帖。太祖郊祀。陶穀作赦文。不以籩豆有楚。對黍稷惟馨。而曰豆籩陳有楚之儀。黍稷奉惟馨之薦。近世王初寮作寶籞宮青詞云。上天之載無聲。下民之虐匪降。時人許其裁剪。

宋景文筆記云。文有屬對平側用事。供公家一時宣讀。施行似健快。然不可施于史傳。余修唐書。未嘗以唐人一詔一令載者。惟捨對偶之文。近高古者。乃可著于篇。大抵史近古。對偶宜今。以對偶之文入史。如粉黛飾壯士。笙匏佐鼙鼓。非所施也。

呂氏童蒙訓云。龔殿院彥和清介自立。少有重名。元祐間。簽判瀛州。其弟大壯尤特立不羣。曾子宣帥瀛。欲見不可得。一日徑過彥和。邀其弟出。不可辭也。遂出相見。卽爲置酒。從容終日乃去。因題詩壁間云。自慚太守非何武。得向河陽見兩龔。近時貴人如子宣之能下士。亦難及也。

東臯雜錄云青社表淘亭取太公表東淘之義元祐初曾子宣爲守鼎新之賦詩云表淘風流舊所間  
冥飛觀一番新山河十二名空在簪履三千迹已陳極目烟嵐九霄近滿川樓閣萬家春由來興廢南柯  
夢且喜登臨屬後人

文昌襍錄云工部王侍郎云昨謫守單州後圃有宓子賤琴臺爲一郡之勝獨此可以銷憂且有詩云琴  
聲久逐秋雲去臺勢空隨古堞高旣召還見于垂拱殿與呂資政同班廬因話琴臺後數日呂遂知單  
州甚可異也

許彥周詩話云蘇太監作文饒放作鴻溝詩云置俎均辛蠶峨冠信沐猴方矜几上肉已墮幄中籌海嶽  
歸三尺衣冠闕一丘路人猶指似山下是鴻溝

四六談塵云綦叔厚草蜀將制曰已失秦川之險敢云蜀道之難辛炳爲中司遽作彈文曰川猶未失也  
綦自辨其語上曰朕知之矣卿所言者我能往寇亦能往

復齋漫錄云劉偉明贈熊待制詩云西清寓直荷爲橐在蜀宣風繡作衣蓋南史劉杳傳著紫荷橐事見  
張安世傳持橐簪筆之意而偉明乃以荷爲芰荷之荷何邪

東臯雜錄云李誠之才致高妙守邊有威信熙寧初荆公用事議論不合退居汝上題詩云燕子知時節  
還尋舊宇歸新人方按曲不許傍簾飛嘗作昭陵挽詞云堯民喪考無生意杞國憂天有壞時聞道宗祧  
歸聖嗣一時收淚賀重熙其他佳句其多

東坡云過太平州見郭祥正言嘗從章惇入梅山溪洞中說降其首領見洞主蘇母家有神畫被服如士

大夫事之甚嚴問之云此知桂州李大夫也問其名曰此豈可名哉扣頭稱死罪數四卒不敢名徐考其年月本末則李師中誠之也誠之嘗爲提刑桂府爾吾識誠之知其爲一時豪傑也然小人多異議不知夷獠乃爾畏信之彼其利害不相及爾

許彥周詩話云晁無咎在崇寧閒次李誠之長短句韻以弔誠之曰射虎山邊尋舊迹騎鯨海上追前約便與江湖永相忘還堪樂不獨用事的確其措意高古深悲而善怨似離騷故特錄之

復齋漫錄云王公韶少日讀書於廬山東林裕老庵庵前有老松因賦詩云綠皮皺剝玉嶙峋高脚分明似古人解與乾坤生氣概幾因風雨長精神裝添景物年年換擺掉窮愁日日新惟有碧霄雲裏月共君孤影最相親王荊公爲憲江東過而見之大加稱賞遂爲知己

苕溪漁隱曰蔡寬夫詩話云盧龍圖秉少豪逸熙寧初遊京師久不得調嘗作書曰青衫白髮病參軍旋糴黃梁置酒樽但得有錢留客醉何須騎馬傍人門荊公一見曰此亦非碌碌者卽薦用之前此蓋未嘗相識也又石林詩話云劉季孫初以右班殿直監饒州酒荊公爲憲江東巡歷按酒務始至廳事見屏間有題小詩曰呢喃燕子語梁間底事來驚夢裏閑說與傍人應不解杖藜攜酒看支山大稱賞之卽召與語嘉歎之久升車而去不復問務事荊公以三詩而取三士其樂善之心今人所未有也吾故表而出之許彥周詩話云鮮于子駿作九誦東坡大稱之云友屈宋于千載之上觀堯祠舜祠二章氣格高古自東漢以來鮮及前輩稱贊人略緣賓也

復齋曼綠云王深輔道觀文昭子也數宗朝妄奏天神降于家卒以此受禍人以其父熙河妄殺之報耳

嘗爲漁家傲詞云日月無根天不老浮生總被消磨了陌上紅塵常擾擾昏復曉一場大夢誰先覺洛水東流山四遶路傍幾個新華表見說在時官職好爭信道冷烟寒雨埋荒草

詩說雋永云孫伯野宣和間爲中書舍人論麗人入貢所過騷動貶散官居于蘄州許崧老時爲給事中乃封駁曰孫傳山東野人乞從末減楊時可時爲省郎以詩送孫曰清議豈徒光四戶直聲應已到三韓黃門有手能批敕太學無人爲舉幡四六談塵云孫伯野論麗人搔擾中批云至乃用蘇軾語全無顧忌孫表云不知言語之合前人但見裔夷之負中國

苕溪漁隱曰宣政間京師置四輔郡拱州東輔也先君時爲宗學官從凡孝著遊學拱輔因有書來先君寄之以詩曰東輔書初至西宮夜正寒感時嗟阻闊喜汝報平安學耨知兼力辭淳發巨瀾三冬文史足軒翥未應難

復齋漫錄云韓子蒼喜吳可小詩東風可是閑來往時送江梅一陣香殊不知張芸叟茶穀詩云晚風亦自知人意時去時來管送香吳取此耳

苕溪漁隱曰胡宿詩風花飛有態烟絮墜無痕張先詞柳徑無人墜飛絮無影二人詩詞頗相類

三山老人語錄云孫元中故事云好事多載酒殼時念揚雄之句諸公盡登臺省誰憐鄭老之窮對偶亦新奇復齋漫錄云翟嗣宗尉臨淮頗爲監司所窘遂於臨淮館驛題蜘蛛詩其序云偶見蜘蛛因成四韻織絲來往疾如梭長愛騰空作網羅害物身心雖甚小漫天網紀亦無多林間宿鳥應嫌汝簾外飛蛾亦懼他莫學螳螂捕蟬勇須知黃雀奈君何林子中時爲發運過而見之召而謂責且戒以無爲浮薄因薦

之于朝云。

復齋漫錄云。王直方詩話。紀徐師川早朝詩。內一聯云。黃氣遠臨天北極。紫宸住在殿中央。以余觀之。乃是杜子美。玉几猶來天北極。朱衣只在殿中央。一聯也。

詩說雋永云。徐師川贈鄭公實謳詩云。平生不喜劉蕡策。色色人中自有人。又云。字得蘇黃妙。文薰班馬香。鄭有詩集。其間與張嘉父唱酬頗多。苦溪漁隱曰。師川因鄭謳而進致身樞府。東湖集中。與鄭唱酬亦多。如誰家竹可款。何處酒難忘。皆一時唱酬之詩也。贈張仲宗云。詩如雲態度。人似柳風流。題干生畫云。故山黃葉下。夢境白鷗前。此集中好句也。

詩說雋永云。丁未之春。汴清淮濁。錢遜叔登淮山樓詩云。華戎變氣俗。淮汴倒清渾。徐師川詩云。淮流漲後濁。汴水淺來清。

呂氏童蒙訓云。呂與叔嘗作詩云。文如元凱徒稱僻。賦似相如止類俳。唯有孔門無一事。只傳顏氏得心齋。橫渠讀詩詩云。置心平易始知詩。楊中立云。知此詩則可以讀三百篇矣。

復齋漫錄云。吳丞相敏十歲時。遊山寺賦詩云。古木霜根重。殘僧雪頂深。棟梁元剝落。香火半消沉。在真州時。贈吳正仲詩。先生古人風。文字祖西漢。不令萬錢食。亦合五花判。

四六談麈云。汪退傅初坐陳東歐陽澈事降官。後復以啓謝廟堂時。相作答啓云。一男子之上書。人何足道。諸大夫曰可殺。公豈容心。熊太學叔雅之詞也。陸逸中德先宣和間。再爲中執法。嘗彈蔡絛。范丞相建炎間。答其啓云。久居言路。詐彈多權貴之臣。屢掌。登拔皆純正之士。范射策。陸曾謂其不純正。舒起

居清國之詞也。師友談記云。友人董耘饋長沙貓笋薦以享太史公。太史公輒作詩爲贊。因筭寓意且以爲贈爾。其詩曰。穿雲斲石遠林空。來涉烟波萬萬重。實比梧桐能食鳳。簷翻風雨便成龍。一枝未許塵鞍掛。千畝終留渭水封。陋巷菜羹知不稱。君王玉食願時供。薦卽和之。亦以寓自興之意。且述前相知之情焉。其詩曰。節藏泥滓氣凌空。薦俎寧知肉味重。未許韋編充簡冊。也勝絲縷誑蛟龍。短萌任逐霜刀重。美榦須煩雪壤封。他日要令高士愛。不應常奉宰夫供。秦少游亦和之曰。楚山春筍斷雲空。北客常嗟食不重。秀色可憐刀切玉。清香不斷鼎烹龍。論羹不愧尊千里。入貢常隨傳一封。薄祿奉親甘旨少。滿苞時賴故人供。茗溪漁隱曰。李方叔稱范淳父爲太史公。以其爲國史修撰故也。

茗溪漁隱曰。詩選云。朱喬年絕句。春風吹起簾龍兒。戢戢滿山人未知。急喚蒼頭斲烟雨。明朝吹作碧參差。蓋前人有詠筍詩云。急忙且喫莫踟蹰。一夜南風變成竹。喬年點化乃爾精巧。余觀魯直已先有此句。從斌老乞苦筍云。煩君更致蒼玉來。明日風雨皆成竹。前詩並蹈襲魯直也。

詩說雋永云。晃冲之叔用樂府最知名。詩少見於世。政和末。先公爲御史。朱深明爲郎官。其謝先公寄茶兼簡深明詩曰。諫議茶猶寄。郎官迹已疎。斜封三道印。不奉一行書。會遠長安去。終臨顧渚居。大江清見底。爲問渴如何。

詩說雋永云。蔡攸入燕。其父魯公寄詩云。百年盟誓宜深慮。六月王師盍少休。緇衣堂下清風滿。早早歸來醉一甌。茗溪漁隱曰。蔡京知伐燕之役爲不可。胡不以告于上。但形于詩句。以沽名。其不忠之甚歟。復齋漫錄云。西清詩話記其父蔡元長喜周邦彥祝壽詩云。化行禹貢山川外。人在周公禮樂中。余以爲

此乃模寫東坡藏春塢詩年拋造物甄陶外春在先生杖履中是也。

四六談塵云靖康間劉觀中遠作百官賀徽廟還京表云漢殿上皇本是野田之叟唐朝肅帝又非揖遜之君何槩文縑索筆塗之用此二事別作一聯云擁篲卻行陋未央之過禮執轎前引笑靈武之曲恭康執權平仲在揚州草宗開封制云想望夷門未泯葱葱之佳氣顧瞻淮甸安能鬱鬱而久居。

苕溪漁隱曰閩中近時刊行詩話總龜卽舒城阮閱所編詩總也余家有此集今總龜不載此序故錄于此云余平昔與士大夫遊聞古今詩句膾炙人口多未見全本及誰氏所作也宣和癸卯春來官郴江因取所藏諸家小史別傳雜記野錄讀之遂盡見前所未見者至癸卯秋得一千四百餘事共二千四百餘詩分四十六門而類之其播揚人之隱慝暴白事之曖昧猥陋太甚雌黃無實者皆略而不取至其本惟一詩而記所取之意不同如栗爆燒氈破猫跳觸鼎翻春洲生荻芽春岸飛楊花載所作之人或異如幾夜礙新月半江無夕陽斜陽如有意偏傍小窗明如此之類皆兩存之若愛其造語之工而舉一聯如風暖鳥聲碎日高花影重不知其全篇亦有喜其用字之當而論一字如惠和官尙小師達祿須干不知其所引自誤如此之類咸辨證之然皆前後名公鉅儒逸人達士傳諸搢紳間而著以爲書不可得而增損也但類而總之以便觀閱故名曰詩總倦游歸田幅巾短褐松窗竹几時卷舒之以銷閑日不願行干時也世間書固未盡於此後有得之者當續焉宣和五年十一月朔舒城阮閱序

苕溪漁隱曰王周士和人詩云人情千里白頭浪世事幾番黃葉風宋大觀題嚴子陵祠堂云英姿凜凜都如在盛夏釣臺風月寒石敏若新蟬云滿身美蔭抱高柳問汝適從何處來初寮集載其父投壺云勢

如高捧金徒箭聲似連鏗玉殿籤皆善造語亦可喜也

了齋集云余讀左經臣詩編有招友人之句云一別又經無數日百年還得幾多時非特詞意清逸可玩味也老子世途幻景迅速讀此二語能無警乎

許彥周詩話云楊舜韶名友夔長僕十餘歲向同在姑蘇時盜賊發孫堅墓楊作詩云闔廬城邊荒古丘昔誰葬者孫豫州久無行客爲下馬時有牧童來放牛嗚呼舜韶今亡矣他詩皆工必傳於世也

復齋漫錄云東魯孔傳字聖傳先聖之裔而中丞道輔之孫也爲人博學多聞取唐以來至于吾宋詩頌銘贊奇編奧錄窮力討論織芥不遺撮其樞要區分彙聚有益于世者續唐白居易六帖謂之六帖新書韓子蒼爲篇引以爲孔侯之書如富家之儲材棟樑枅栱雲委山積匠者得之應手不窮其用豈小至貪多務得晦而不出幸人之不知以成己之名者此侯之所恥也苕溪漁隱曰六帖新書出于東魯兵火之餘南北隔絕其本不傳於江左使學者弗獲增益聞見惜哉近時有紺素雜記學林新編藝苑雌黃此三書皆相類辨正古今訛舛校定史傳得失誠有補於學者吾于叢話固嘗采摭云司馬文正公日錄云章郇公得象爲職方知洪州罷歸丁晉公與楊文公博召數人皆不至丁以爲二人博無歡楊曰有章職方者善博可召之既至丁不勝輸銀器教百兩章初無喜色亦不辭他日又博章輸銀器數百兩亦無吝色丁由是佳其有度量援引以至清顯楊亦嘗稱郇公他日必爲公台厚遇之

苕溪漁隱曰三朝正史云楊億祖文逸爲唐玉山令億將生文逸夢一道士自稱懷玉山人未幾億生有紫毛披體長尺餘經月乃落本朝名臣傳云母章氏始生億夢羽衣人自稱武夷君託化旣誕則一鶴雛

盡室驚駭，貯而棄之江。其叔父曰：我聞聞世之人，其生必異。追至江濱，開視，則鶴蛻而嬰兒具焉。體猶有紫毳尺餘，旣月乃落。二書所紀不同，予謂名臣傳，其言怪誕良甚，當以正史爲是也。

東臯雜錄云：時邦美陽武人，父爲鄭州牙校，補軍將，吏部差押綱至成都，時年六十四。婦方四十餘，未有子。謂其夫曰：我有白金百星，可攜行至蜀，求一妾歸冀。得子爲身後計。父至成都，輸納畢，訪牙僧，見一女甚端麗，詰其家世，不對。窺見以布總髮，怪問之，悲泣曰：父本都下人，爲雅州掾官卒，扶護至此，不能歸。鬻妾欲辦裝耳。父惻然，攜金往見其母，以助其行，又爲幹行計。同上道路中，謹事掾妻如部曲，至都上僦居，販殯畢，方辭歸。妻迎問買妾狀，具以實告。未幾，妻有孕。一夕，夢有數人披衲襖，輿一金紫人留堂中。及旦，邦美生，後堂犬亦生九子，故小字十狗。後登進士第一，官至吏部尙書。

四六談麈云：靖康間，京兆尹程伯起，謝賜出等牙簡表，云：看山拄頰，敢爲晉士之清狂。上馬投囊，豈有唐賢之風度。汪彥章詞也。翟公巽以陳通之亂，自越援杭，其謝降官表云：豈比越人坐視秦人之瘠，欲安劉氏，固知晁氏之危。李漢老坐其兄會稽失守，落職。謝表云：包胥不食而哭，秦素心猶在；李陵得當而報漢，後效難期。席大光罷參政爲潭帥，謝表云：暴揚之惡，初過于共兜；播告之詞，忽同於方召。詩選云：蘇庠養直嘗盛夏，追涼方與客對棋。有衣褐者，特謁云：羅浮山道人江觀潮，未及起迎，道人直造就坐。旁若無人，養直驚愕，問所從來，答曰：羅浮黃直人，以公不好世人之所好，悉母已成，令某持丹度公，可服之。袖中出一小盒，藥黃色，而膏融，養直遲疑，問道人曰：此丹非金非石，乃真炁煉成，疑卽且止。俟有急服之，出門徑去。俄頃不見，養直以丹置佛室。後與客飲，醉後食蜜雪，和以龍腦，一夕暴下而卒。所親記

道人之言亟取丹視之其堅如石磨以飲之卽甦自是康強異常齒落者復生髮白者再黑目枯者更明紹興十七年歲旦日與家人酌別且告辭鄰里二日東方未明披衣曳杖出門行步如飛妻孥奔逐僅能挽其衣則已逝矣若溪漁隱曰洪慶善與養直皆丹陽人予以問慶善慶善云初無此事乃曾端伯得之傳聞之誤耳余于後湖集序嘗言之云不待訪丹砂于岣嶁依羽人于丹丘而羅浮之客九轉之丹至矣僕馳書問之且丐錄近詩居士答言頃得方士神藥奪命鬼手中服食以來哦詩結字無復餘習矣養直後以壽終亦無他異端伯之言不可信也

司馬文正公日錄云劉貢父言李宥知江寧府遭火疑軍士爲變不救遂燔市里寺觀府庫皆盡宥令幕職方龜年作表奏內曰不意禍起蕭牆釁生回祿時新有衛士之變朝廷惡其言由是州官得罪皆重以宥年老直除分司

元城先生語錄云先生平日皆莊語有一雅謔漫記之先生爲諫議大夫日值除一執政姓胡名不欲記之先生再三論列文字不降出時劉貢父爲給事中先生于朝路見之間曰昨晚有甚文字降出貢父曰豈非器之于新除有異聞乎先生曰然若遲回不去當率全臺諫攻之孔子所謂鳴鼓而攻之者貢父應聲曰將謂是暗箭子元來是鳴鼓兒聞者皆啓齒先生素嚴毅亦有笑容又曰貢父好謔然立身立朝極有可觀故某與之交遊

復齋漫錄云王直方詩話記陳輔題湖陰先生壁詩云身似舊時王謝燕一年一度到君家荆公見而笑曰此戲君爲尋常百姓耳然余觀山谷有詩答直方送並蒂牡丹云不如王謝堂前燕會見新粧並倚欄

若以荆公之言，則直方未免爲山谷所戲。正苦不自覺耳。

詩說雋永云：石藏用劉寅，俱擅醫名。石喜用熱藥，劉喜用山藥。京師爲之語曰：藏用篋中三斛火，劉寅匣內一壺水。龍川略志云：彭山有隱者，通古醫術，與世諸醫所用法不同。人莫之知，單驥從之學，盡得其術。遂以醫名於世。治平中，予與驥過廣都，論古今術同異。驥旣言其略，復歎曰：古人論五臟六腑，其說有謬者，而相承不察，欲以告人人罕信者。古說左腎其腑膀胱，右腎命門，其腑三焦。丈夫以藏精，女子以繫胞，以理推之，三焦當如膀胱，有形質可見。而王叔和言三焦有藏無形，不亦大謬乎？蓋三焦有形如膀胱，故可以藏，有所繫。若其無形，尚何以藏繫哉？其所以謂之三焦者，何也？三焦分布人體中，有上中下之異，方人心湛然，欲念不起，則精氣散在三焦，榮華百骸，及其慾念一起，心火熾然，翕撮三焦精氣入命門之臟，輸瀉而出，故號此腑爲三焦耳。世承王叔和之謬而不悟，可爲長太息也。予甚異其說，後爲齊州從事，有舉子徐遁者，石守道之婿也。少嘗學醫療病，有精思。予爲述驥之言，遁喜曰：齊嘗大飢，羣凶相鬪割而食。有一人皮肉盡而骨脈全者，遁以學醫故，往觀其五臟，見右腎下有脂膜如手大者，正與膀胱相對。有二白脈，自其中出，夾脊而上貫腦，意此卽導引家所謂夾脊雙關者。而不悟脂膜如手大者之爲三焦也。單君之言，與所見懸合，可以正今人之謬矣。

上庠錄云：元祐間馬涓、張庭堅等四人，擅名太學。時號四俊。劉灝，湖州人，年少亦自負，初補太學生，聞而慕之，以刺謁曰：不識可當一俊否？涓等哂之。灝復曰：何得是名？涓等設詭計以困之，曰：每試當預約一字，限於程試中用之。善者乃預既而私試之。灝請字涓曰：第一句用將字。其時策問神宗實錄，灝對曰：秉史

筆者權猶將也雖君命有所不受而況其它乎後果爲第一聞者厭之因目爲曰接扇僕

復齋漫錄云劉韜始爲尉於洪之豐城性不飲酒飲則面色爲之烘然時郡推官公檄抵邑能飲啖與公同會以諺語戲公曰小器易盈真縣尉答曰窮坑難滿是推官

詩說雋永云李伯紀爲行營使時王仲時張仲宗俱爲屬王頎長張短小白事相隨一館職同在幕下戲云啓行營大雞昂然來小雞竦而待

東臯雜錄云葉祖義少游太學有俊聲滑稽無窮嘗戲作詩云醉來黑漆屏風上草寫盧仝月蝕詩上庠錄云政和丙申殿試何槩爲狀元潘良貴次之皆年少有丰貌而第三人郭孝友頗古怪唱名日呵出御街觀者皆曰狀元真何郎膀眼真潘郎第三人真郭郎也

文昌雜錄云昔見故老言有一朝士好爲諺語嘗云近求得一對的似有理曰躁因修賀刺怒爲答空書聞者無不大噱



# 苕溪漁隱叢話後集卷第三十七

## 大梅

傳燈錄云。師住天台山。梅子貞舊隱。一僧入山迷路。問曰。和尚在此山多少時也。師曰。只見四山青又黃。又問出山路什麼處去。師曰。隨流去。僧歸說似鹽官鹽官令僧去請師出山。師有偈云。摧殘枯木倚寒林。幾度逢春不變心。樵客遇之尤不顧。郢人那得苦追尋。大寂聞師住山。乃令一僧到問云。和尚見馬師得個什麼便住此山。師云。馬師向我道。卽心是佛。我便向這裏住。僧云。馬師近日佛法又別。師云。作麼生別。僧云。近日又道非心非佛。師云。這老漢惑亂人。未有了日。任汝非心非佛。我只管卽心卽佛。其僧回舉似馬祖。祖云。大衆梅子熟也。苕溪漁隱曰。韓子蒼送僧住梅山詩。寺門岑寂知何許。想對千岩萬壑。待得梅山梅子熟。不辭先寄一枝來。用前事也。

## 天衣

僧寶傳云。懷東游至翠峯。翠峯衆盛。懷當營炊。自汲澗折擔悟旨。顯公印可以爲奇。辭去。久無耗。有僧自淮上來。曰。懷出世鐵佛矣。顯使誦唱之語曰。譬如雁過長空。影沉寒水。雁無遺踪之意。水無留影之情。顯激賞久之。

## 端師子

僧寶傳云。端師子始見弄獅子者。發叨心要則。以彩帛像其皮。時時著之。因以爲號。秦少游聞其道高。請

升座。端以手自指曰。天上無雙月。人間只一僧。一堂風冷淡。千古意分明。少游首肯之。能誦法華經。必得錢五百。乃開帙。日誦數句。卽持錢地坐。去其缺薄者易之而去。好歌漁父詞。月夕必歌之。達旦有狂僧回頭和尙。以左道鼓動流俗。士大夫亦安其妄。方對丹陽呂公肉食。端徑至指曰。正當與麼時。如何是佛。回頭不能遽對。端捶其頭。推倒乃行。又有妖人。號不托掘。秀州城外地有佛像。建塔其上。傾城敬信。端見。搥住曰。如何是佛。不托擬議。端趨之而去。章相子厚請升座。使俞秀老撰疏。敍其事曰。推倒回頭。趨翻不托。七軸之蓮經未誦。一聲之漁父先聞。端聽僧官宣至此。以手擲揄曰。止。乃引聲吟曰。本是瀟湘一釣客。自東自西自南北。大衆譟然稱善。端顧笑曰。我觀法王法。法王法如是。下座。

山谷云。釣魚船上謝三郎。雙鬚已蒼蒼。莎衣未必貴。不肯換金章。汀草畔。浦花傍。靜鳴根。自來往。好箇漁父家風。一片瀟湘。金華俞秀老作此篇。道人多傳之。非道意岑寂。其語不能如是。菩溪漁隱曰。傳燈錄云。元沙福州閩縣人。姓謝氏。幼好垂釣。泛小船於南臺江。狎諸漁者。年甫三十。忽慕出塵。乃棄釣艇。投芙蓉山訓禪師落髮。秀老用其事也。

參寥

復齋漫錄云。參寥詩可人。惟有秦淮月。出沒涓涓波浪中。子瞻送蜀僧詩。當時半破峨嵋月。還在平羌江水中。二意偶同。

詩禪心已作沾泥絮。肯逐東風上下狂之意。

苕溪漁隱曰冷齋夜話謂道潛作詩追法淵明其詩有逼真處曰數聲柔櫓蒼茫外何處江村人夜歸又曰隔林彷彿聞機杼知有人家住翠微余細細味之句格固佳但不類淵明語豈得謂之逼真處若東坡和陶詩前山正可數後騎且勿驅此方是逼真處惠洪不善評詩其言豈足憑哉

洪覺範

苕溪漁隱曰僧寶傳覺範所撰也但欲馳騁其文往往多失事實至于作贊又襍以詩句此豈更法示褒貶之意乎其詩有云行盡湘西十里松到門卻立數諸峰崇公事跡無尋處庭下春泥見虎踪又云廬山殿閣如生成食堂處處禪床折我比三門似冷灰盡日長廊卷風葉又爲奇語云如月照衆水波波頓見而月不分如春行萬國處處同時而春無迹但其才性穉爽見于言語文字間若干禪門本分事則無之也

冷齋夜話云予留南昌久而忘歸獨行無侶意緒蕭然偶登秋屏閣望西山于是浩然有歸志作長短句寄意其詞曰城裏久偷閑塵浣雲衫此身已是再眠蠶隔岸有山歸去好萬壑千岩霜曉更凭欄減盡晴嵐微雲生處是茅菴試問此生誰作伴彌勒同龕

復齋漫錄云臨川距城南一里有觀曰魏壇蓋魏夫人經遊之地具諸顏魯公之碑以故諸女真嗣緒不絕然而守戒者鮮矣陳虛中崇寧間守臨川爲詩曰夫人在兮若冰雪夫人去兮仙踪滅可惜如今學道人羅裙帶上同心結洪覺範嘗作長短句贈一女真云十指嫩抽春笋纖纖玉軟紅柔人前欲展強嬌羞微露雲衣霓袖最好洞天春晚黃庭卷罷清幽凡心無計奈閒愁試撚花枝頻嗅

許彥周詩話云近時僧洪覺範頗能詩其題李慤畫像云淮陰北面師廣武其氣豈止吞項羽公得李祐不肖誅便知元濟在掌股此詩當與黔安並驅也頃年僕在長沙相從彌年其他詩亦甚佳如云含風廣殿聞暮响度日長廊轉柳陰頗似文章巨公所作不類衲子又善作小詞情思婉約似秦少游至如仲殊參寥雖名世皆不能及

清順

復齋漫錄云冷齋夜話記西湖僧清順詩久從林下遊頗識林下趣從渠綠陰繁不礙清風度閑來石上眠落葉不知數一鳥忽飛來啼破幽寂處予見子蒼言後四句不同云困卽蟠石眠莫省落花數惟聞犬吠聲更入青蘿去後兩句雖不同無害第落葉不知數一句不可蓋初夏間未應落葉之多耳菩溪漁隱曰惟聞犬吠聲更入青蘿去乃惠詮詩東坡嘗和之云惟應山頭月夜夜照來去皆是也子蒼之言復齋之記皆誤也

緇黃雜記

復齋漫錄云前輩好稱僧悟清詩烏歸花影動魚沒浪痕圓以爲句意皆新然余讀後梁沈君攸臨水詩云花落圓紋出風急細流翻乃知魚沒浪痕圓之句出于此唐史云劉氏傳記載煬帝旣誅薛道衡乃云尙能道空梁落燕泥否蓋道衡詩嘗有是句楊公諲苑載僧希晝北宮書亭云花露益虫穴梁塵墮燕泥予以爲鍊句雖工而致思不逮于薛矣

復齋漫錄云元豐末張詵樞言龍圖之守杭也一日宴客湖上劉涇巨濟僧仲殊在焉樞言命卽席賦詩

曲巨濟先唱云憑誰妙筆橫掃素縑三百尺天下應無此是錢塘湖上圖仲殊遞云一般奇絕雲淡天高秋夜月費盡丹青只這些兒畫不成樞言又出梅花邀二人同賦仲殊卽作前章云江南二月猶有枝頭千點雪邀上芳樽卻占東君一半春巨濟不復繼也後陳襲善云我爲續之曰尊前眼底南國風光都在此移過江來從此江南不復開

古今詞話云東坡守錢塘劉巨濟赴處州道過錢塘東坡留飲于中和堂僧仲殊與焉時堂之屏有西湖圖東坡邊索牋管作減字木蘭花曰憑誰妙筆橫掃素縑三百尺天下應無此是錢塘湖上圖以後疊屬巨濟辭遜再三遂以屬仲殊繼曰一般奇絕雲淡天高秋夜月費盡丹青只這些兒畫不成東坡大稱賞之苕溪漁隱曰此詞首句云憑誰妙筆橫掃素縑三百尺則是初無此西湖圖姑言之耳詞話乃云中和堂屏有西湖圖可見其附會爲說全與詞意不合以此驗之其以爲東坡作亦必妄言當以復齋爲正也許彥周詩話云晦堂心禪師初退黃龍院作詩云不住唐朝寺閑爲宋地僧生涯三事衲故舊一枝藤乞食隨緣過逢山任意登相看莫相笑不是嶺南能此詩深靜平實道眼所了非世間文士詩僧之所能彷彿也

詩說雋永云泉州僧慶老有詩云交情老去淡如水病骨秋來瘦似松真方外語也

苕溪漁隱曰予嘗愛政黃牛山中偈云橋上山萬層橋下水千里惟有白鷺鷥見我長來此造語平易不加雕斲而清勝之景閑適之意宛然在吾目中矣

復齋漫錄云西清詩話取瘦權谷口未斜日數峯生夕陰之句然宋之間詩云日落西山陰衆草起寒色

權意取此沈約登元鶴樓詩亦云雲來片嶺黑日下半溪陰苕溪漁隱曰癩可東溪集有詩云僵步入蘿徑綿延趣最深僧居不知處彷彿清磬音石梁邀屢度始見青松林谷口未斜日數峰生夕陰淒風薄喬木萬竅作龍吟摩挲綠苔石書此慰幽尋復齋以爲瘦權詩誤矣

苕溪漁隱曰汪彥章龍溪集有霜餘溪上四絕癩可東溪集亦有霜餘溪上五絕內四絕卽龍溪集中詩但一絕不是所謂故人江北江南岸者餘皆同之不知竟誰作邪四絕中其一云水似秋蛇巧作蟠山如濃翠擁高鬟清風明月元無主乞我烟蘿茅數間殊清駛可愛

筆談云知道者苟未至脫然隨其所得淺深皆有效驗尹師魯自直龍圖閣謫官過梁下與一佛者談師魯自言以靜退爲樂其人曰此猶有所係不若進退兩忘師魯頓若有所得自爲文以記其說後移鄧州是時范文正公守南陽少日師魯忽手書與文正別仍囑以後事文正極訝之時方饌客掌書記朱炎在座炎老人好佛學文正以師魯書示炎曰師魯遷謫失意遂至乖理殊可怪也宜往見之爲致意開譬之無使成疾炎卽詣之師魯已沐浴衣冠而坐見炎來道文正意尹笑曰何希文惟以生人見待洙死矣與炎談論頃時遂隱几而卒炎急使人馳報文正至哭之甚哀師魯忽舉頭曰早已與公別安用復來文正驚問所以師魯笑曰死生常理也希文豈不達此仍問其後事師魯曰此在公耳乃揖希文復逝俄頃又舉頭顧希文曰亦無鬼神亦無恐怖言訖遂長往師魯所養至此可謂有力矣尙未能脫有無之見何也得非進退兩忘猶存于胸中歟

苕溪漁隱曰余讀劉興朝悟道發真集其言曰余少治儒術長登仕版蓋未嘗信佛也三十有二歲見東

林長老總公與之語。七日始生信焉。卽取其書讀之三年。蓋恨其信之之晚也。然循其理而體會。則似悟還迷。依其法而行持。則慙靜還擾。旣而閱傳燈錄。始知佛有法眼妙心。密相付囑。而達摩西來。單傳此事。衆生悟者。可以見性而了心。其後發明此事。但覺境界非常。取證道歌讀之。句句盡是吾之心地。讀至六般神用空不空。一顆圓光色非色。如是希奇之事。吾今已得現前。任是千聖出來。也須退步。始得示人。以偈曰。世間多少英雄漢。終日迷頭沒人喚。可憐眼底黑漫漫。不見驪珠光燦爛。過今晡又來。旦不覺年華暗中換。急擡頭高着眼。徑寸不在蚌中產。靈利男兒薦得時。好笑教渠腸欲斷。又有詩云。古今堂堂此事同歸。因處處獲圓通。片心豁去滄溟窄。雙眼開來宇宙空。出海銀蟾光動地。離弦金鏃疾追風。須知佛祖埋藏後。坐斷千崖是此翁。

蘇子由云。聰禪師昔以講誦爲業。晚游淨慈本師之室。誦南岳思大和尚口吞三世諸佛語。迷悶不能入。一日爲本燒香。本曰。吾疇昔爲汝作夢甚異。汝不悟。將死不可不勉。師茫然不知所謂。旣而禮僧伽像。醒然有覺。知三世可吞無礙也。趨往告本。本曰。向吾夢汝吞一世界。吞一剃刀。汝今日始從迷悟。是始出家。真吾子也。乃擊鼓升座。爲衆說此事。聰作禮涕泣而罷。聰往高安聖壽禪院。余嘗從之間道。聰曰。吾師本公。未嘗以道告人。皆聽其自悟。吾今亦無以告子。余從不告門。久而入道。乃爲頌曰。道不可告。告卽不得。以不告。告是真告。敕香嚴辭去。得之瓦礫。臨濟不喻。至愚而悉。非愚非瓦。皆汝師力有不至此。是非出家。夢吞剃刀。髮落如花。游行四方。物莫能遮。終亦不告。獨障其邪。弟子度者。數如恆河沙。苕溪漁隱曰。禪門須是悟入。方爲究竟。倘不爾。亦安能七縱八橫。去處自在也哉。余觀劉興朝見惠林冲老。冲爲焚香設誓。

曰我法中自有悟門若也以無爲有卽是誑汝吾當永墮無間地獄吾將此身設大誓願願汝此去堅信不退他日有見方表斯言又龍門言有李提刑者將傳燈錄白先師云某素留心此道每看此錄多有不會處望一一開示先師云此事不如是理會須有省悟始得若有省悟無有不會者自不消問人若無省悟祇那會處亦未是在二大士之言真得其要矣

苦溪漁隱曰陳體常答黃冕仲二書敍學佛之旨深切著明余嘗三復其言歎其有理恨未能盡行也體常又有頌六首今錄二首其一云密坐研窮省細微到頭須是自忘機應無祖佛能超越豈有冤親更順違歷歷孤明尤認影巍巍獨步尙披衣翊嗟會得照靈者也道尋師得旨歸其二云個中端的有誰知知者歸來到者稀卽見卽聞還錯會離聲離色轉乖違山青水綠明元旨鶴唳猿啼顯妙機有意覓渠終不遇無心到處盡逢伊

冷齋夜話云陳瑩中北歸過南昌言鄒志完在韶州極精進閉門誦華嚴經舍利生袖間此真入信他日誦華嚴經於觀音像前有修竹三根生像之後志完揭茅出之不可乃垂枝覆像如世所畫寶陀岩竹今猶無恙韶人局鑠之以爲過客游觀北還至永州澹山岩有馴狐凡貴客至則鳴志完將至而狐輒鳴寺僧出迎志完怪之僧以狐鳴爲言志完作詩曰我入幽岩亦偶然初無消息與人傳馴狐戲學仙伽客一夜飛鳴報老禪

法藏碎金云太白夜懷有句云宴坐寂不動大千入毫髮潘祐獨坐有句云凝神入混茫萬象成虛空予愛二子吐辭精敏之力入道深密之狀合而書之聊資已用苦溪漁隱曰余觀志公十二時頌自非深悟

上乘同佛知見豈能作此語也是時達磨猶未西來誌公已明此理所謂先得我心之所同然者誌公沒于天監十三年而達磨以普通八年至金陵由此之魏傳佛心印禪宗方興近世學佛者往往忽此頌而弗觀蓋貴耳而賤目耳予嘗手書此頌置之座右朝夕味之尤愛其最後一首云雞鳴丑一顆明珠圓已久內外推尋覓總無境上施爲渾大有不見頭又無手世界壞時終不朽未了之人聽一言只這如今誰動口以至三祖信心銘永嘉證道歌皆禪學之髓初地之人其可弗觀乎

東臯雜錄云漣水天長寺裏道者塔靈爽甚著行狀云觀音化身也太祖太宗真宗仁宗皆嘗召至京師欲留之不可曰臣與漣水人有宿緣不歸淮水必爲暴漣人魚矣許之皆賜御筆至今匣藏寺中真宗召入禁中時欲立章獻未決命嬪御出見師閱之凡二百許人皆無語至章獻挽之曰陛下可善遇此人能與陛下主家計真宗奇之意遂定及章獻垂簾又召至錫賚不貲復歸有新知軍入境雅不喜師遂告其徒緣盡當滅知軍疑其詐死命焚之凡三日衣械不動其徒禱曰師不違衆願不若應火化忽雷雨驟作水滿庭薪火皆滅口中出白烟自焚立盡而目睛舌根不壞舍利無數邦人葬其骨淮岸目睛舌根舍利藏塔下至今淮水漲溢至塔即止後賜塔額許歲度兩僧

僧寶傳云言法華者莫知其所從來相傳言誦法華經故以爲名至和三年仁宗始不豫國儲未立天下寒心諫官范鎮首發大議乞擇宗室之賢者使攝儲貳以待皇嗣之生退居藩服典宿衛尹京邑以繫天下之望并州通判司馬光亦以爲言凡三上疏一留中二付中書上夜焚香默禱曰翌日化成殿具齋虔請法華大士俯臨無卻清旦上道衣凝立以待俄馳奏言法華自右掖門徑趨將至寢殿侍衛呵止不可

上笑曰朕請而來耳有頃至輒升御榻跏趺而坐受供訖將去上曰朕以儲嗣未立大臣咸以爲言侵尋暮晚嗣息無有期一決之師索筆引紙連書曰十三十三凡數十行擲筆無他語皆莫測其意其後英宗登極乃濮安懿王第十三子方驗前言也

東臯雜錄云裴休與黃蘖爲忘年友一日同行宛水上見有駕柴車過隄下泥深牛憊鞭之不已休方止其鞭者蘖遽曰不可不重打兩脚時勸不得四脚時不肯行也好打

三山老人語錄云明州妙音僧法淵爲人佯狂日飲酒市肆歌舞笑自如丐錢于人得一錢卽欣然以爲足得之多復與道路廢疾窮者能言人禍福無不驗人疑其精于術數故號淵三命發言無常及問之掉頭不顧惟云去去有喪之家必往哭之葬則送之無貧富皆往莫測其意人以爲狂又號曰顛僧大覺禪師初住育王開堂僧倔然出問話人莫不竊笑大覺問顛僧是顛了僧僧了顛答云大覺是大了覺覺了大大覺嘿然衆皆驚駭一日忽于市相別攜酒一壺至郡守宅前據地而飲觀者千餘人酒盡懷中出頌一首欲化去衆皆引聲大呼云不可於此遂歸妙音趺坐而化頌曰咄咄平生顛蹶欲問臨行爐中大雪真相至今存焉

東臯雜錄云蓬州道士賈善翔字鴻舉能劇談善琴嗜酒士大夫喜與之游東坡嘗過之戲書問曰身如芭蕉心如蓮花百節疎通萬竅玲瓏來時一去時八萬四千未云鴻舉下語賈答曰老道士這裡沒許多般數張天覺跋其後云去時八萬四千不知落在那邊若不斬頭覓話誰知措大參禪

東臯雜錄云元豐中高麗遣一僧入貢頗辯慧赴筵設葷酒自如命楊次公接伴一日出令曰要兩古人

姓名爭一物沙門曰古人有張良有鄧禹爭一  
華良曰涼華禹曰雨華次公曰古人有許由有  
晁錯爭一葫蘆由曰油葫蘆錯曰醋葫蘆

四六談塵云政和間以僧爲德士冠服如道士有一長老升堂云石霜奪得裴休笏用在今朝曹溪留下  
祖師衣已爲陳迹又一長老乞入道表云一入蠻夷之風教遂亡父母之髮膚幾同去國之人忽見指天  
之斗倘得回心而嚮道便當合掌以擎拳



# 苕溪漁隱叢話後集卷第二十八

## 回仙

回仙自作傳云。吾乃京兆人。唐末累舉進士。不第。因游華山。遇鍾離。傳授金丹大藥之方。復遇苦竹真人。方能驅使鬼神。再遇鍾離。盡獲希夷之妙旨。吾得道年五十。第一度郭上竈。第二度趙仙姑。郭性頑鈍。只與追錢延年之法。趙性通靈。隨吾左右。吾惟是風清月白。神仙聚會之時。嘗游兩浙京汴。謙郡嘗着白襯衫。角帶。左眼下有痣。如人間使者。筋頭大。世言吾賣墨。飛劍取人頭。吾聞哂之。實有三劍。一斷煩惱。二斷貪嗔。三斷色慾。是吾之劍。世有傳吾之神。不若傳吾之法。不若傳吾之行。何以故。爲人若反是。雖攜手接武。終不成道。

苕溪漁隱曰。回仙有沁園春一闋。明內丹之旨。語意深妙。惜乎世人但歌其詞。不究其理。吾故表而顯之。云。七返還丹。在人先須煉己。待時正一陽初動。中宵漏永。溫溫鉛鼎。光透簾幙。造化爭馳。虎龍交合。進火功夫。猶鬪危曲。江上看月華瑩靜。有個烏飛。當時自飲刀圭。又誰信無中養就兒。辨水源清濁。木金間隔。不因師指。此事難知道。要元微天機。深遠下手速修。猶太遲蓬萊路。仗三千行滿。獨步雲歸。

陸元光回仙錄云。吳興之東林沈東老。能釀十八仙白酒。一日有客自號回道人。長揖于門曰。知公白酒新熟。遠來相訪。願求一醉。實熙寧元年八月十九日也。公見其氣骨秀偉。茫然起迎。徐觀其碧眼有光。與之語。其聲清圓。於古今治亂。老莊浮圖氏之理。無所不通。知其非塵埃中人也。因出酒器十數於席間曰。

聞道人善飲。欲以鼎先爲壽。如何。回公曰。飲器中惟鍾鼎爲大。屈卮螺杯次之。而梨花蕉葉最小。請戒侍人。次第速斟。當爲公自小至大以飲之。笑曰。有如顧愷之食蔗。漸入佳境也。又約周而復始。常易器滿斟於前。笑曰。所謂尊中酒不空也。回公興至。卽舉杯浮白。常命東老鼓琴。回乃浩歌以和之。又嘗圍棋以相娛。止奕數子。輒拂去笑曰。祇恐碁終爛斧柯。回公自日中至暮。已飲數斗。了無醉色。是夕月微明。秋暑未退。蚊蚋尙多。侍人秉扇驅拂。偶滅一燭。回公乃命取竹枝。以餘酒噀之。插于遠壁。須叟蚊蚋盡棲壁間。而所飲之地洒然。東老欲有所叩。先托以求驅蚊之法。回公曰。且飲小術。何足道哉。聞公自能黃白之術。未嘗妄用。且篤於孝義。又多陰功。此予今日所以來尋訪。而將以發之也。東老因叩長生輕舉之術。回公曰。以四大假合之身。未可離形而頓去。惟死生去住。爲大事。死知所往。則神生于彼矣。東老攝衣起謝。有以喻之。回公曰。此古今人所謂第一最上極則處也。此去五年。復遇今日。公當化去。然公之所鍾愛者。子偕也。治命時不得見之。當此之際。公亦先期而致謹。勿動懷恐喪失公之真性。東老領而悟之。飲將達旦。則甕中所釀。止留糟粕。而無餘瀝矣。回公曰。久不游浙中。今已爲公而來。當留詩以贈。然吾不學世人用筆書。乃就擘席上榴皮。畫字題于庵壁。其色微黃。而漸加黑。故其言有回仙人題贈東老詩。西隣已富變不足。東老雖貧。樂有餘。白酒釀來。緣好客。黃金散盡。爲收書。凡三十六字。已而告別。東老啓關送之。天漸明矣。握手並行。笑約異時之集。至舍西石橋。回公先度乘風而去。莫知所適。後四年中秋之吉。東老微恙。乃熙寧之五年也。子偕又適在京師。子薦回公之言。其在今日乎。及期捐館。凡回公所言。無有不驗。

龍川雜志云予治平末泝峽還蜀泊舟仙都山下有道士以陰真君長生金丹訣石本相示予問之曰子知金丹訣邪道士曰不知也然士大夫過此必以問之庶有知之者予佳其意試問以燒煉事對曰養生有內外精氣內也非金石所能堅凝四支百骸外也非精氣所能變化欲事內必調養精氣極而後內丹成則不能死矣然隱居人間久之或托尸解而去求變化輕舉不可得也蓋四大本外物和合而成非精氣所能易也惟外丹成則可以點瓦礫化皮骨飛行無礙矣然內丹未成內無以交之則服外丹者多死譬積枯草弊絮而置火其下無不焚者予甚善其說告之曰昔人有服金丹不幸赴井而死旣而五臟皆化爲黃金者又有服玉屑死于盛夏而尸不敗壞者皆無內丹以主之也予之說信然哉後十餘年館于南京張公安道家有一道人陝人也爲公養金丹其法用紫金丹砂費數百千期年乃成公喜告予曰吾藥成可服矣予謂公何以知其藥成公曰抱朴子言藥既成以手握之如泥出指間者藥功真成也今吾藥如是以是知其成無疑矣予爲公道仙都所聞謂公曰公自知內丹成則此藥可服若猶未也姑俟之公笑曰我姑俟之

龍川略志云予兄子瞻嘗從事扶風開元寺多古畫而子瞻少好畫往往疋馬入寺循壁終日有一老僧出揖之曰小院在近能一相訪否子瞻欣然從之僧曰貧道平生好藥術有一方能以硃砂化淡金爲精金老當傳人而患無可傳者知公可傳故欲一見子瞻曰吾不好此術雖得之將不能爲僧曰此方知而不可爲公若不爲正當傳矣是時陳希亮少卿守扶風而平生溺于黃白嘗于此僧求方而僧不與子瞻曰陳卿求而不與吾不求而得何也僧曰貧道非不悅陳卿畏其得方不能不爲耳貧道昔嘗以方授人

矣。有爲之卽死者。有遭喪者。有失官者。故不敢輕以授人。卽出一卷書曰。此中皆名方。其一則化金方也。公必不肯輕作。且勿輕以授人。如陳卿謹勿傳也。子瞻許諾歸視其方。每淡金一兩。視其分數不足一分。輒以丹砂一錢益之。雜諸藥入甘鍋內煅之。鎔卽傾出。金砂俱不耗。且其色斑斑相雜。當再烹之。色勻乃止。後偶見陳卿語及此僧。遽應之曰。近得其方矣。陳卿驚曰。君何由得之。子瞻具道僧不欲輕傳人之意。不以方示之。陳固請不已。不得已與之。陳試之良驗。子瞻悔曰。某不惜此方。惜負此僧耳。公謹爲之。陳姑應曰。諾。未幾坐受隣郡公使酒。以賊敗去。子瞻疑其以金故深自悔恨。後謫居黃州。陳公子慥在黃。子瞻問曰。少卿昔時嘗爲此法否。慥曰。吾父旣失官至洛陽。無以買宅。遂大作此。然竟病指癱而歿。乃知僧言誠不妄也。後十年。余謫居筠州。有蜀僧儀介者。師事文禪師。文之所至。輒爲修造。所費不貲。而莫知錢所從來。介祕其術。問之不以告人。介與聰禪師善。密爲聰言。其方大類扶風開元寺僧所傳者。然介未嘗以一錢私自利。故能保其術而無患。若溪漁隱曰。洞微志載葉生者。與前事相類。亦以得乾銀術妄費而受禍。故回仙謂沈東老云。聞公自能黃白之術。未嘗妄用。蓋嘉之也。此真可爲貪者之戒。

若溪漁隱曰。回仙於京師景德寺僧房壁上題詩云。明月斜秋風冷。今夜故人來不來。教人立盡梧桐影。相傳此詞。自國初時卽有之。柳耆卿詞云。愁緒終難罄。人立盡梧桐碎影。用回仙語也。古今詞話乃云。耆卿作傾杯秋景一闋。忽夢一婦人云。妾非今世人。曾作前詩。數百年無人稱道。公能用之。夢覺說其事。世傳乃鬼謠也。此語怪誕無可考據。蓋不曾見回仙留題。遂妄言耳。

事此之呂翁非洞賓也。蓋洞賓嘗自序以爲呂渭之孫，仕德宗朝。今云開元則呂翁非洞賓無可疑者。若溪漁隱曰：回仙嘗有詞云：黃梁猶未熟，夢驚殘。尙用枕中記故事，可見其非呂翁也。靈怪集載南柯太守傳與枕中記事絕相類。浮世榮枯，固已如夢矣。此二事又於夢中作夢，既可笑亦可歎也。

### 神仙雜記

許彥周詩話云：唐清遠道士同沈恭子游虎丘詩曰：余本長殷周，遭罹歷秦漢。計之至唐則二千餘歲矣。顏魯公愛而刻之，且有詩曰：客有神仙者，於茲雅麗陳。蓋指爲神仙也。李衛公追和魯公刻清遠道士詩曰：道人綴清藻，前哲留篇翰。則道人指清遠前哲謂魯公也。其後皮日休、陸龜蒙輩皆和之。仙邪鬼邪，則不必問。然僕獨愛其詩中數句云：吟晚川之陰，步上仙之岸。山川共澄澈，光彩交凌亂。白雲翁欲歸青松，忽消半。嗚呼！借使非神仙，亦一才鬼也。

高道傳云：唐末有狂道士不知何許人，又晦其名氏。游成都，忽詣紫極宮，謁杜光庭先生，求寓泊之所。先生諾之，而不與之通。道士日貲藥於市，所得錢隨多少沽酒飲之。惟唱感庭秋一詞，其意感蜀之將亡。如秋庭之衰落，然人未之曉。但呼爲感庭秋。道士凡半年，人亦不知其異。一夕大醉歸，夜將闌，尙聞唱聲愈高，有訝之者隔戶窺之，見燈燭綵繡筵具器皿羅列甚盛。狂道士左右二青童應侍，時斟酒而唱。窺者具以白先生。先生乃款其戶，曰：光庭識量膚淺，不意上仙降鑒，深爲罪戾。然不揆愚昧，而匍匐門下，冀一拜光靈，以消塵障。道士曰：何辱勤奉之若是？當出奉見。乃令二童收筵具器皿及陳設，致於前，揲之，則隨手而小，如符子狀。置冠中，又將二童按之，如木偶可寸許。又置冠中，乃啓戶，光庭欣然而入，但空室而已。

山谷云新安聶師道宗微少事道士於方外發迹游名山數見異人楊行密開府於揚州宗微實輔佐之蓋爲國師三十年楊氏末解化而去弟子葬之舉棺惟衣履存焉順德七年楊溥贈問政先生方外之兄德誨爲新安太守乃于郡之東山築室以居方外號爲問政山房問政之名或得于此苕溪漁隱曰問政山去新安郡城十許里岩谷幽邃今有琳宇在焉國初黃台留題詩云千尋練帶新安水萬仞花屏問政山自少雲霞居物外不多塵土到人間壺懸仙島吞舟罷枕浸星宮咒水閑草暗碧壇思句曲松昏紫氣度函關龜成錢甲毛猶綠鶴化鱉頭更丹阮洞神仙分藥去蔡家兄弟寄書還筇杖健拄菖蒲節筍幘高簪玳瑁斑新隱漸聞侵月窟舊隣猶說枕沙灣黃精苗倒眠青鹿紅杏枝低掛白鷗海上使頻青鳥點饑中藏久白驥頑手疎俗禮慵非傲肘後靈方祕不慳寶鑑匣垂金縷帶絳囊條鏤玉連環常尋吳穴通三楚擬過流沙化百蠻容易煮銀供客用辛勤栽果與猿攀靜張棋局鋪還打默考仙經補又刪床並葛鞋寒兔伏窗橫檻几老龍跼溪童乞火朝敲竹山鬼聽琴夜撼櫂花氣薰心香馥馥澗聲聆耳響潺潺高墳自掩浮生骨短晷難凋不死顏蚤晚重建蕭堦客願隨芝蓋出塵寰余以續仙傳高道傳二書考之詩中所用事多出師道本傳

東坡云吾八歲入小學以道士張易簡爲師童子幾百人師獨稱吾與陳太初者太初眉山市井人子也予稍長學日益邃第進士制策而太初乃爲郡小吏其後予謫居黃州有眉山道士陸惟忠自蜀來云太初已尸解矣蜀人吳師道爲漢州太守太初往客焉正旦見師道持衣食錢物且告別持所得盡與市人貧者反坐于戟門下遂寂師道使卒舁往野外焚之卒罵曰何物道士使我正旦昇死人太初微笑開眼

曰不復煩汝步自載門至金雁橋下趺坐而逝焚之城中人見烟焰上渺渺焉有一陳道士也復齋漫錄云李定記宣和中太學士人飲于任氏酒肆忽有一婦人粧飾甚古衣亦穿弊飢瘠雪色而無左臂右手執拍板乃鐵爲之唱詞曰闌干曲紅牋繡簾旌花嫩不禁纖手捻被風吹去意還驚眉恨蹙山青諸公怪其辭異卽問之曰此何辭也答曰此上清蔡真人法駕道引也妾本唐人遭五季之亂左手爲賊所斷今游人間見諸公飲酒求一杯之適耳遂與一杯飲畢而去諸公送之出門杳無所見若溪漁隱曰夷堅志所記與此小異此仍少詞一半未詳孰是

復齋漫錄云周貫自言膠東人常稱木雁子善屬文游于洪州西山嗜酒不羈布衲粗全人或贈之錢則詣酒家取醉餘皆散墮不顧西山之人見貫往來者五十餘年而顏色如初至有以道術訪之則必報以惡聲使之親近不得也熙寧元年至豫章石頭市遇故人棲止張生爲具酒食而宿中夜逆旅之主人聞戶外有車馬合沓聲起而視之無有也唯貫所臥室戶正開猶奄奄然喘息就而察之貫已死矣明日告新建縣尉吳果卿往按之貫身潔如生扶而轉之腹中汨汨如浪鳴焉縣主簿劉純臣使人棺斂埋于地云張生還家其弟迎門曰周翁凌晨見過今往雙嶺矣衆乃知貫非實死者也貫所著華陽三篇坐臥不離袖人莫得見死之日純臣取而觀之純臣稱其險絕而有條理純臣以詩紀之曰八十四山作酒仙麻鞋孔斷布衫穿形骸一脫塵緣盡太極光陰不記年洪覺範冷齋夜話嘗記之互有不同

復齋漫錄云熙寧中王迪爲洪州左司理參軍一日有道人來磨鏡因俾迪自照乃自星冠羽帔縹紗見鏡中迪問其故曰此汝前身也由汝誤念墮此勉自修行勿淪苦海旣去迪具以告其妻妻然之遂棄官

與妻隱去。郡寮挽留不可。皆作詩以餞。行時新建主簿劉純臣有詩。雖非警拔。可以記其實。云：髮如抹漆左參軍。脫去青衫從隱淪。世上更無羈紲事。壺中別有自由身。躬烹玉兔山前藥。花看金鰲背上春。莫怪少年能決烈。藍田夫婦總登真。後歸姑蘇不知所終。

文昌雜錄云。知制誥李大臨。西川人。有門人背僂。不能仰視。因藥市罷。見一道士云。秀才有錢丐一二百。爲酒貲。書生曰。家貧無錢。所居有薄釀。同一醉可乎。道士欣然便往。酒半。道士問何背僂。書生曰。不幸遇此疾。無如之何。道士因出藥三十粒。云來日五更向東。以新汲水下。覺微燥。不足怪。書生如所教。旣服藥。燥甚。不可勝。展轉于榻上。亦甚悔之。然每一伸縮。漸覺舒快。比明身已直矣。蜀人重藥市。蓋常有神仙之遇焉。

復齋漫錄云。高尙處士劉臯。謂士大夫以嗜欲殺身。以財利殺子孫。以政事殺人。以學術殺天下後世。非神仙中人。不能作此言也。

鬼詩

復齋漫錄云。東坡記徐通判李絢。有子年十七八。不善作詩。忽詠落花云。流水難窮目。斜陽易斷腸。誰聞研光帽。一曲舞山香。人驚問之。若有物憑者。示是謝中舍。問其研光帽事。自云西王母宴羣仙。有舞者。戴研光帽。帽上簪花。舞山香一曲未終。花皆落去。余讀唐羯鼓錄。見汝陽王璡。明皇愛之。每隨游幸。璡常戴研絹帽子。打曲上。自摘紅槿花一朵。置於帽上。遂奏舞山香一曲。花不落墮。上大笑。此事與前極相類。見聞錄云。呂申公夷簡嘗通判蜀中。忘其郡名。廨宇中素有鬼物。號榆老姑。乃榆木精。其狀一老醜婦。常

出廚間與羣婢爲偶或時不見家人見之久亦不以爲怪公呼問之卽下階拜云妾在宅日久雖非人然不敢爲禍公亦置而不問嘗謂公他日必大貴一日忽妊娠婢戲之自云非久當產遂月餘不見忽出云已產矣請視之後園榆木西南生大贅乃是視之果然

文昌雜錄云余讀江南錄邱孟陽有賦名嘗夢一官人延入一第中具飲其傍几上有書一卷孟陽展讀謂曰斯乃吾所述賦藁何至茲乎其人曰昔公焚之時吾得之矣孟陽因就求之答曰他日若至衡山必當奉還後官至衡州茶陵令乞致仕卒於衡州今世言焚故書必毀而後燔之蓋可信也

復齋漫錄云東坡記秦少游言寶應民有嫁娶會客者酒半客一人徑赴水曰有婦人以詩招我詩云長橋直下有蘭舟破月衝烟任意游金玉滿堂何所用爭如年少去來休余讀張君房脞說進士謝朏寓居寶應曉至縣橋忽見女郎自舟中出曰某楚小波也可見訪舟中懷中出詩二首其一云畫橋直下是蘭舟捨月衝烟任意游金玉滿堂無處用蚤隨年少去來休其二云妾貌君才兩不常君今休苦更思量兒家自有清溪水飲到方知氣味長前篇與少游所言不同者七字更有二首爲異至謂寶應亦同君房著脞說在真廟時不應東坡少游忘之也

復齋漫錄云魯直記江亭鬼所題詞有淚眼不會晴之句余以此鬼剽東坡樂章秋雨晴時淚不晴之語苦溪漁隱曰雲齋廣錄載司馬槱官于錢塘夢蘇小小歌蝶戀花詞一闋其詞頗佳詞云妾在錢塘江上住花開花落不記流年度燕子啣將春色去黃昏幾度瀟瀟雨蟬鬢犀梳雲半吐檀板新聲唱徹黃金縷酒醒夢回無覓處淒涼明月生秋浦

藝苑雌黃云。談苑載金陵之陷。有盧絳者。收散卒。由宣歙長驅入福建。以圖興復李氏。至歙州。州將龔儀先已降王師。閉門不給薪水。絳擊破殺儀。將至建州。敗于松溪。麾下散亡。朝廷以節鎮招之。遂自歸。時儀兄子穎上言求復季父之仇。召穎與絳面質。曲直穎舉手版擊絳。遂按誅。絳初。絳舉事夢一白衣婦人酌酒勸之。歌菩薩蠻詞以送之。歌畢。謂絳曰。他日當相見。嶧子陂。絳私記之。及是伏法于京之西嶧子陂之地。南唐近事。及本事曲所載皆同。惟江南摺錄獨異。謂白衣婦人爲玉真姓耿氏。以嶧子陂爲孟家陂。無菩薩蠻詞。而有詩一首云。清風良月夜深時。箕帝盧郎尙恨遲。他日孟家陂上約。再來相見是佳期。二說不同。未知孰是。

苕溪漁隱曰。余觀南唐書云。盧絳少病瘡。夜夢白衣婦人。頗有姿色。歌菩薩蠻勸絳卮酒。其詞云。玉京人去秋蕭索。畫簷雀起梧桐落。欹枕悄無言。月和清夢圓。背燈惟暗泣。甚處砧聲急。眉黛小山攢。芭蕉生暮寒。歌畢。謂絳曰。子之疾食蔗卽愈。詰朝求蔗食之。果瘥。迨數夕。又夢曰。妾乃玉真也。他日相見于嶧子陂。絳仕江南。後歸朝會。龔穎上言求復季父之仇。乃命誅。絳臨刑問其受刑之地。卽嶧子陂。有白衣婦人姿貌宛如所夢。姓耿。名玉真。其夫死。與前夫之子通。當極法。與絳同斬焉。洞微志所記亦與此同。南唐書三十卷。馬令所撰。成一代之史。所記必審。當以爲正也。

許彥周詩話云。請紫姑神。大抵能作詩。然不甚過人。舊傳一士人家請之。旣降。偶書院中子弟作雨詩。因率爾請箋。頃刻書滿紙。其警句曰。簾捲滕王閣。盆翻白帝城。誠可喜也。

文昌雜錄曰。昔年陳州有女妖。自云孔大娘。每昏夜于鼓腔中與人語言。尤知未來事。時晏元獻守陳方。

製小詞一闋修改未定而孔大娘已能歌之矣亦可怪也

許彥周詩話云長安慈恩寺有數女仙夜游題詩云黃子陂頭好月明強踏華筵到曉行烟波山色翠黛橫折得荷花遠恨生化爲白鶴飛去明夜又題一首云湖水團團夜如鏡碧樹紅花相掩映北斗闌干移曉柄有似佳期常不定亦婉約可愛



# 苕溪漁隱叢話後集卷第三十九

## 長短句

南唐書云王感化善謳歌聲韻悠揚清振林木繫樂部爲歌板色元宗嘗作浣沙溪二闋手寫賜感化曰菡萏香銷翠葉殘西風愁起碧波間還與容光共憔悴不堪看細雨夢回雞塞遠小樓吹徹玉笙寒簌簌淚珠多少恨倚闌干手捲珠簾上玉鉤依前春恨鎖重樓風裏落花誰是主思悠悠青鳥不傳雲外信丁香空結雨中愁迴首綠波三峽暮接天流後主卽位感化以其詞札上之後主感動賞賜感化甚優苕溪漁隱曰元宗卽嗣主李璟嘗作此二詞古今詞話乃以爲後主作非也後主名煜

南唐書云馮延巳著樂章百餘闋其鶴冲天詞云曉月墜宿雲披銀燭錦屏幃建章鍾動玉繩低宮漏出花遲又歸國謠詞云江水碧江上何人吹玉笛扁舟遠送瀟湘客蘆花千里霜月白傷行色明朝便是關山隔見稱於世元宗樂府辭云小樓吹徹玉笙寒延已有風乍起吹皺一池春水之句皆爲警策元宗嘗戲延己曰吹皺一池春水于卿何事延己曰未如陛下小樓吹徹玉笙寒元宗悅

苕溪漁隱曰古今詩話云江南成文幼爲大理卿詞曲妙絕嘗作謁金門云風乍起吹皺一池春水中主聞之因案獄稽滯召詣之且謂曰卿職在典刑一池春水又何干于卿文幼頓首又本事曲云南唐李國主嘗責其臣曰吹皺一池春水于卿何事蓋趙公所撰謁金門辭有此一句最警策其臣卽對曰未如陛下小樓吹徹玉笙寒若本事曲所記但云趙公初無其名所傳必悞惟南唐書與古今詩話二說不同未

詳孰是。

復齋漫錄云。顏氏家訓云。別易會難。古人所重。江南餞送下泣言難。北間風俗。不屑此事。岐路言離。懽笑分首。李後主蓋用此語耳。故長短句云。別時容易見時難。

苕溪漁隱曰。舊詞高雅。非近世所及。如撲蝴蝶一詞。不知誰作。非惟藻麗可喜。其腔調亦自婉美。詞云。煙條雨葉綠遍江南岸。思歸倦客尋芳來較晚。岫邊紅日初斜。陌上飛花正滿。淒涼數聲羌管怨。春短玉人應在明月樓中。畫眉懶。蠻牋錦字多。時魚雁斷。恨隨去水東流事。與行雲共遠。羅衾舊香猶暖。苕溪漁隱曰。先君頃嘗丐祠居射鵠。作感皇恩一詞云。乞得夢中身歸棲雲水。始覺精神自家底。峭帆輕棹時與白鷗游戲。畏途都不管。風波起。光景如梭。人生浮脆。百歲何妨盡沉醉。臥龍多事。漫說三分奇計。算來爭似我長昏睡。又嘗江行。阻風作漁家傲一詞云。幾日北風江海立。千車萬馬廢聲息。短棹峭寒欺酒力。飛雨息瓊花。細細穿窗隙。我本綠蓑青箬笠。浮家泛宅。煙波逸。渚鷺沙鷗多舊識。行未得。高歌與爾相尋覓。

苕溪漁隱曰。先君嘗云。古詞有絳都春。有鰲山綵構蓬萊島之句。當云綵繩。余於前集誤以古詞爲柳詞。今正是之。

藝苑雌黃。云柳三變字景莊。一名永。字耆卿。喜作小詞。然薄於操行。當時有薦其才者。上曰。得非填詞柳三變乎。曰。然。上曰。且去填詞。由是不得志。日與獵子縱游娼館酒樓間。無復檢約。自稱云。奉聖旨填詞柳三變。嗚呼。小有才而無德。以將之。亦士君子之所宜戒也。柳之樂章。人多稱之。然大抵非羈旅窮愁之詞。

則閨門淫媟之語。若以歐陽永叔、晏叔原、蘇子瞻、黃魯直、張子野、秦少游輩較之，萬萬相遼。彼其所以傳名者，直以言多近俗，俗子易悅故也。皇祐中老人星現，永應制撰詞，意望厚恩，無何始用漸字，終篇有太液波翻之語。其間宸游鳳輦何處，與仁廟挽詞閑合，遂致忤旨。士大夫惜之，余謂柳作此詞，借使不忤旨，亦無佳處。如嫩菊黃深，拒霜紅淺，竹籬茅舍間，何處無此景物。方之李謫仙、夏英公等應制辭，殆不啻天冠地履也。世傳永嘗作輪臺子蠻行詞，頗自以爲得意。其後張子野見之，云既言匆匆策馬登途，滿目淡煙衰草，則已辨色矣。而後又言楚天闊，望中未曉何也。柳何語意顛倒如是。

東坡云：吾昔自杭移高密，與楊元素同舟，而陳令舉張子野皆從余過。李公擇於湖，遂與劉孝叔俱至松江。夜半月出，置酒垂虹亭上。子野年八十五，以歌詞聞於天下，作定風波令。其略云：見說賢人聚吳分試問，也應傍有老人星。坐客懽甚，有醉倒者。此樂未嘗忘也。今七年耳。子野孝叔令舉皆爲異物，而松江橋亭今歲七月九日海風駕潮平地丈餘，蕩盡無復子遺矣。追思曩時真一夢耳。

苕溪漁隱曰：吳興郡圃今有六客亭，卽公擇、子瞻、元素、子野、令舉、孝叔時公擇守吳興也。東坡有云：余昔與張子野、劉孝叔、李公擇、陳令舉、楊元素會于吳興。時子野作六客詞，其卒章云：盡道賢人聚吳分。試問也應旁有老人星。凡十五年再過吳，而五人者皆已亡之矣。時張仲謀與曹子方、劉景文、蘇伯固、張秉道爲坐客。仲謀請作後六客詞云：月滿苕溪照夜堂。五星一老，鬪光芒。十五年間真夢裏，何事長庚對月獨淒涼。綠鬢蒼顏同一醉，還是六人吟笑水雲鄉。賓主談鋒誰得似，看取曹劉今對兩蘇張。

復齋漫錄云：翰林學士聶冠卿嘗于李良定公席上賦多麗詞云：想人生美景良辰堪惜，問其間賞心樂

事就中難是并得。況東城鳳臺。沁苑泛晴波。淺照金碧。露洗華桐。煙霏絲柳。綠陰搖曳。蕩春一色。畫堂迥玉簪瓊珮。高會盡詞客。清歡久。重燃絳蠟。別就瑤席。有翩若驚鴻體態。暮爲行雨標格。逞朱唇緩歌妖魔似聽流鶯亂花隔。慢舞繁回。嬌鬟低顰。腰肢纖細。困無力。忍分散彩雲歸後。何處更尋覓。休辭醉明月。好花莫漫輕擲。蔡君謨時知泉州。寄良定公書云。新傳多麗辭。述宴游之娛。使病夫舉首增歎耳。又近者有客至自京師。言諸公春日多會于元伯園池。因念昔游。輒形篇詠。綠渠春水。走潺湲。畫閣峰巒。映碧鮮。酒令已行。金盞側。樂聲初認。翠裙圓。清游勝事。傳都下。多麗新詞。到海邊。曾是尊前沉醉客。天涯回首。重依然。苕溪漁隱曰。冠卿詞有露洗華桐。煙霏絲柳之句。此正是仲春天氣。下句乃云綠陰搖曳。蕩春一色。其時未有綠陰真語病也。

古今詞話云。東坡在黃州。中秋夜對月獨酌。作西江月詞曰。世事一場大夢。人生幾度新涼。夜來風葉已鳴廊。看取眉頭鬢上。酒賤常愁客少。月明多被雲妨。中秋誰與共孤光。把盞淒涼北望。坡以讒言謫居黃州。鬱鬱不得志。凡賦詩綴詞。必寫其所懷。然一日不負朝廷。其懷君之心。末句可見矣。苕溪漁隱曰。聚蘭集載此詞。注曰。寄子由。故後句云。中秋誰與共孤光。把酒淒涼北望。則兄弟之情。見于句意之間矣。疑是在錢塘作。時子由爲睢陽幕客。若詞話所云。則非也。

苕溪漁隱曰。中秋詞自東坡水調歌頭一出。餘詞盡廢。然其後亦豈無佳詞。如晁次膺綠頭鴨一詞。殊清婉。但樽俎間歌喉。以其篇長。憚唱。故湮沒無聞焉。其詞云。晚雲收淡。天一片琉璃爛銀盤。來從海底皓色千里澄輝。瑩無塵素。娥澹佇淨。可數丹桂參差。玉露初零。金風未凜。一年無似此佳時。回坐久疎星時度。

烏鵲正南飛。瑤臺冷。欄干凭暖。欲下遲遲。念佳人音塵隔。後對此應解相思。最關情漏聲正永。暗斷腸花影潛移。料得來宵清光未減。陰晴天氣又爭知。共凝戀如今別後。還是隔年期。人縱健。清樽素月長。願相隨。

苕溪漁隱曰。凡作詩詞。要當如常山之蛇。救首救尾。不可偏也。如晁無咎作中秋洞仙歌辭。其首云。青煙幕處碧海飛金鏡。永夜閑階臥桂影。固已佳矣。其後云。待都將許多明付與金樽。投曉共流霞傾盡。更攜取胡床上南樓看玉。做人間素秋千頃。若此可謂善救首尾者也。至朱希真作中秋念奴嬌。則不知出此其首云。插天翠柳被何人。推上一輪明月照我藤床涼似水。飛入瑤臺銀闕亦已佳矣。其後云。洗盡凡心。滿身清涼冷浸蕭蕭髮。明朝塵世記取休向人說。此兩句全無意味。收拾得不佳。遂并全篇氣索然矣。苕溪漁隱曰。曹元寵本善作詞。特以紅窗迥戲詞盛行于世。遂掩其名。如望月婆羅門詞。亦豈不佳。詞云。漲雲暮捲漏聲不到小簾櫳。銀河淡掃澄空皓月當軒高掛。秋入廣寒宮正金波不動桂影朦朧。佳人未逢。歎此夕與誰同。望遠傷懷。對景霜滿愁紅。南樓何處想人在長笛一聲中。凝淚眼泣盡西風。此詞病在霜滿愁紅之句。時太早耳。曾端伯編雅詞。乃以此詞爲楊如晦作非也。侍兒小名錄云。錢思公謫漢東日。撰玉樓春詞曰。城上風光鶯語亂。城下煙波春拍岸。綠楊芳草幾時休。淚眼愁腸先已斷。情懷變成衰晚。鸞鏡朱顏驚暗換。往年多病厭芳樽。今日芳樽惟恐淺。每酒闌歌之。則泣下。後閣有白髮姬。乃鄧王歌鬟。驚鴻也。遽言先王將薨。預戒挽鐸中歌木蘭花引繡爲送。今相公亦將亡乎。果薨于隨州。鄧王舊曲亦嘗有帝鄉煙雨鎖春愁。故國山川空淚眼之句。

苕溪漁隱曰東坡別參寥長短句云有情風萬里卷潮來無情送潮歸問錢塘江上西興浦口幾度斜暉不用思量今古俛仰昔人非誰似東坡老白首忘機記取西湖西畔正暮山好處空翠煙霏算詩人相得如我與君稀約他年東還海道願謝公雅志莫相違西州路不應回首爲我沾衣晉書謝安雖受朝寄然東山之志始末不渝形于顏色及鎮新城盡室而行造北海之裝欲須經略粗定自海這還東雅志未就遂遇疾篤還都尋薨羊曇爲安所愛重安薨後懷樂彌年行不由西州路嘗因大醉不覺至州門左右白曰此西州門曇悲感以馬策扣扉誦曹子建詩曰生存華屋處零落歸山丘因慟哭而去東坡用此故事若世俗之論必以爲識矣然其詞石刻後東坡自題云元祐六年三月六日余以東坡先生年譜考之元祐四年知杭六年召爲翰林學士承承旨則長短句蓋此時作也自後復守潁徙揚入長禮曹出帥定武至紹聖元年方南遷嶺表建中靖國元年北歸至常乃薨凡十一載則世俗成識之論安可信邪

苕溪漁隱曰唐初歌辭多是五言詩或七言詩初無長短句自中葉以後至五代漸變成長短句及本朝則盡爲此體今所存止瑞鷗鵝小秦王二闋是七言八句詩并七言絕句詩而已瑞鷗鵝猶依字易歌若小秦王必須雜以虛聲乃可歌耳其詞云碧山影裏小紅旗儂是江南踏浪兒拍手欲嘲山簡醉齊聲爭唱浪婆詞西興渡口帆初落漁浦山頭日未欹儂送潮回歌底曲樽前還唱使君詩此瑞鷗鵝也濟南春好雪初晴行到龍山馬足輕使君莫忘霅溪女時作陽關腸斷聲此小秦王也皆東坡所作

苕溪漁隱曰古今詞話以古人好詞世所共知者易甲爲乙稱其所作仍隨其詞牽合爲說殊無根蒂皆不足信也如秦少游千秋歲水邊沙外城郭春寒退末云春去也飛紅萬點愁如海者山谷嘗歎其句意

之善欲和之而以海字難押。陳無己言此詞用李後主問君那有幾多愁恰似一江春水向東流但以江爲海耳。洪覺範嘗和此詞題崔徽真子云多少事都隨恨遠連雲海。晁無咎亦如此詞弔少游云重感慨驚濤自卷珠沉海觀諸公所云則此詞少游作明甚乃以爲任世德所作又八六子倚危亭恨如芳草妻妾劃盡還生者浣溪沙脚上鞋兒四寸羅者二詞皆見淮海集乃以八六子爲賀方回作以浣溪沙爲涪翁作晁無咎鹽角兒開時似雪謝時似雪花中奇絕者爲晁次膺作汪彥章點絳脣新月娟娟夜寒江靜山嘲斗者爲蘇叔黨作皆非也。

若溪漁隱曰東坡云龍丘子自洛之蜀載二侍女戎裝駿馬至溪山佳處輒留數日見者以爲異人後十年築室黃岡之北號靜菴居士作臨江仙贈之云細馬遠馱雙侍女青巾玉帶紅靴溪山好處便爲家誰知巴峽路卻是洛城花面旋落英飛玉蓋人間春日初斜十年不見紫雲車龍邱新洞府鉛鼎養丹砂龍邱子卽陳季常也秦太虛寄之以詩亦云侍童雙瓊玉鬢髮光可照駿馬錦障泥相隨窮海嶠暮年更折節學佛得心要鬻馬放阿樊幅巾對沉燎西清詩話云季常自以爲飽禪學妻柳頗悍忌季常畏之故東坡因詩戲之有忽聞河東獅子吼拄杖落手心茫然之句觀此則知季常載二侍女以遠游及暮年甘於枯寂蓋有所制而然亦可憫笑也。

復齋漫錄云鄒志全徙昭陳瑩中貶廉間以長短句相諧樂有個胡兒模樣別滿頸領髮髭生得渾如漆見說近來頭也白髭鬚那得長黑逸忘一句黑簪子鑷來須有千堆雪莫向細君容易說恐他嫌你將伊摘此瑩中語謂志全之長髭也有箇頭陀修苦行頭上頭髮繆繆身披一副鱗裙衫緊纏雙腳苦苦要游南聞

說度牒朝夕到，并除領下髭鬚鉢中無粥住無菴。塵登伽處只恐卻重參。此志全語謂瑩中之多慾也。廣陵馬推官往來二公間亦嘗以詩詞贈之。有才何事老青衫。十載低徊北斗南。肯伴雪髯千日醉。此心真與古人參。今見故人今幾年。年來風物尙依然。遙知閑望登臨處。極目江山萬里天。志全完語也。一樽薄酒滿酌勸君君舉手。不是親朋誰肯相從寂寞濱。人生如夢夢裏惺惺何處用。蓋到休辭醉後全勝未醉時。瑩中語也。初自志全元符間貶新州。徽宗卽位以爲中書舍人。乃未幾謫零陵別駕。龍水安置。未幾徙昭焉。

復齋漫錄云。政和中一中貴人使越州回。得詞于古碑陰。無名無譜。不知何人作也。錄以進御。命大晟府填腔。因詞中語賜名魚遊春水。云秦樓東風裏。燕子還來尋舊壘。餘寒初褪。紅日薄侵羅綺。嫩草初抽碧玉簪。細柳輕牽黃金縷。鶯囀上林魚遊春水。幾曲闌干遍倚。又是一番新桃李。佳人應念歸期。梅粧淚洗鳳簫聲絕。沉孤雁。日斷清波無雙鯉。雲山萬重寸心千里。古今詞話云。東都防河卒于汴河上。掘地得石刻有詞一闋。不題其目。臣僚進上。上喜其藻思絢麗。欲命其名。遂摭詞中四字名曰魚遊春水。令教坊倚聲歌之。詞凡九十四字。而風花鶯燕動植物之物曲盡之。此唐人語也。後之狀物寫情不及之矣。二說不同。未詳孰是。

復齋漫錄云。王逐客送鮑浩然之浙東長短句。水是眼波橫。山是眉峯聚。欲問行人去那邊。眉眼盈盈處。纔始送春歸。又送君歸去。若到江南趕上春。千萬和春住。韓子蒼在海陵送葛亞卿。用其意以爲詩。斷章云。明日一盃愁送春。後日一盞愁送君。君應萬里隨春去。若到桃源記歸路。舊溪漁隱曰。山谷詞云。春歸

何處寂寞無行路。若有人知春去處。喚取歸來同住。王逐客云。若到江南趕上春。千萬和春住。體山谷語也。菩溪漁隱曰。東坡言如夢令曲名。本唐莊宗製。一名憶仙姿。嫌其不雅。改云如夢。莊宗作此詞。卒章云。如夢如夢。和淚出門相送。取以爲之名。古今詞話云。後唐莊宗修內苑。掘得斷碑。中有字三十二。曰宴桃源深洞一曲舞鸞歌鳳。長記花別時。殘月落花煙重。如夢如夢。和淚出門相送。莊宗使樂工入律歌之。名曰古記。但詞話所記多是臆說。初無所據。故不可信。當以坡言爲正。

復齋漫錄云。鄧肅謂余言。宣和五年初復九州。天下共慶。而識者憂之也。都門盛唱小詞曰。喜則喜。得入手。愁則愁。不長久。忻則忻。我兩個廝守。怕則怕。人來破鬪。雖三尺之童皆歌之。不知何謂也。七年九州復陷。豈非不長久邪。郭藥師契丹之帥也。我用以守疆。啓敵國禍者。郭耳。非破鬪之驗邪。

菩溪漁隱曰。魯直書荆公集句菩薩蠻詞碑。本云數間茅屋閑臨水。窄衫短帽垂楊裏。花是去年紅。吹開一夜風。娟娟新月偃。午醉醒來晚。何許最關情。黃鸝三兩聲。因閱臨川集。乃云今日是何朝。看余度石橋。笠相隨到處綠蓑衣。斜風細雨不須歸。

夷白堂小集云。山谷道人向爲余言。張志和漁父詞雅有遠韻。志和善丹青。必有形于圖畫者。而世莫之傳也。嘗以其詞增損爲浣溪沙。誦之有矜色。予以告大年云。我不可不成此一段奇事。久之乃以煙波圖見歸。其致思深處。不減昔人。詞云。西塞山邊白鷺飛。散花洲外片帆微。桃花流水鱖魚肥。自庇一身青箬笠。相隨到處綠蓑衣。斜風細雨不須歸。

菩溪漁隱曰。張仲宗有漁家傲一詞云。釣笠披雲青嶂繞。綠蓑雨細春江渺。白鳥飛來風滿棹。收綸了。漁

童拍手樵青笑。明月太虛同一照。浮家泛宅忘昏曉。醉眼冷看城市鬧。煙波老誰能認得。閑煩惱。余往歲在錢塘與仲宗從游甚久。仲宗手寫此詞相示云舊所作也。其詞第二句元是擲頭雨細春江渺。余謂仲宗曰擲頭雖是船名。今以雨襯之。語晦而病。因爲改作綠蓑雨細。仲宗笑以爲然。

古今詞話云蘇子瞻守錢塘有官妓秀蘭天性點慧。善于應對。湖中有宴會。羣妓畢至。惟秀蘭不來。遣人督之。須臾方至。子瞻問其故。具以髮結沐浴。不覺困睡。忽有人叩門聲急。起而問之。乃樂營將催督之。非敢怠忽。謹以實告。子瞻亦恕之。坐中倅車屬意于蘭。見其晚來。恚恨未已。責之曰。必有他事。以此晚至。秀蘭力辯不能止。倅之怒。是時榴花盛開。秀蘭以一枝藉手告倅。其怒愈甚。秀蘭收淚無言。子瞻作賀新涼以解之。其怒始息。其詞曰。乳燕非華屋。悄無人。桐陰轉午晚涼新浴。手弄生綃白團扇。扇手一時似玉漸困倚孤眠。清熟門外誰來推繡戶。枉教人夢斷瑤臺曲。又卻是風敲竹。石榴半吐紅巾蹙。待浮花浪蘚都盡。伴君幽獨濃豔一枝細看取。芳心千重似束。又恐被西風驚綠。若待得君來。向此花前對酒不忍觸。共粉淚兩兩簌。子瞻之作。皆目前事。蓋取其沐浴新涼曲名賀新涼也。後人不知之。誤爲賀新郎。蓋不得子瞻之意也。子瞻真所謂風流太守也。豈可與俗吏同日語哉。苕溪漁隱曰。野哉楊湜之言。眞可入笑林。東坡此詞冠絕古今。托意高遠。寧爲一娼而發邪。簾外誰來推繡戶。枉教人夢斷瑤臺曲。又卻是風敲竹。用古詩捲簾風動竹。疑是故人來之意。今乃云忽有人叩門聲急。起而問之。乃樂營將催督。此可笑者一也。石榴半吐紅巾蹙。待浮花浪蘚都盡。伴君幽獨濃豔一枝細看取。芳心千重似束。蓋初夏之時。千花事退。榴花獨芳。因以中寫幽閨之情。今乃云是時榴花盛開。秀蘭以一枝藉手告倅。其怒愈甚。此可笑者二也。

此詞腔調寄賀新郎，乃古曲名也。今乃云取其沫洛新涼曲名賀新涼，後人不知之誤爲賀新郎，此可笑者三也。詞話中可笑者甚衆，姑舉其尤者。第東坡此詞深爲不幸，橫遭點污，吾不可無一言雪其恥。宋子京云：江左有文拙而好刻石者，謂之詒嗤。符今楊湜之言俚甚，而鎔板行世，殆類是也。

上庠錄云：政和元年，尚書蔡薿爲知貢舉，尤嚴挾書。是時有街市詞曰：侍香金童方盛行，舉人因其詞，加改十五字，作懷挾詞云：喜葉之地，手把懷兒摸。甚恰恨出題廝撞着內臣，過得不住腳。忙裏只是看得斑駁駭，這一身冷汗都如雲霧薄。比似年時頭效惡，待檢又還猛想度。只恐根底有人尋着。



# 茗溪漁隱叢話後集卷第四十

## 麗人雜記

韓子蒼昭君圖敍云漢書竟寧元年呼韓邪來朝言願壻漢氏元帝以後宮良家子王昭君字嬪配之生一子株累立復妻之生二女至范曄書始言入宮久不見御積怨因掖庭令請行單于臨辭大會昭君豐容靚飾顧影徘徊竦動左右帝驚悔欲復留而重失信夷狄然曄不言呼韓邪願婿而言四五宮女又言字昭君生二子與前書皆不合其言不願妻其子而詔使從胡俗此是烏孫公主非昭君也西京雜記又言元帝使畫工圖宮人宮人皆賂畫工而昭君獨不賂乃惡圖之旣行遂按誅毛延壽琴操又言本齊國王穰女端正閑麗未嘗窺看門戶穰以其有異人求之不與年十七進之帝以地遠不幸欲賜單于美人嬪對使者越席請往後不願妻其子吞藥而卒蓋其事雜出無所考正自信史尙不同況傳記乎要之琴操最恆語矣按昭君南郡人今秭歸縣有昭君村村人生女必灼艾灸其面慮以色選故也昭君卒葬匈奴謂之青塚晉以文王諱昭故號明妃云復齋漫錄云韓子蒼題昭君圖詩寄語雙鬟負薪女灸面謹勿輕離家余考唐逸士傳云昭君村至今生女必灸其面白樂天詩至今村女面燒灼成瘢痕乃知灸面之事樂天已先道之矣茗溪漁隱曰古今詞人作明妃辭曲多矣意皆一律惟呂居仁獨不蹈襲其詩云人生在相合不論胡與秦但取眼前好莫言長苦辛君看輕薄兒何殊胡地人

藝苑雌黃云石季倫王明君詞云延我于穹廬加我闕氏名闕氏單于妻也上烏前下章移切前漢匈奴

傳曰冒頓後有愛闕氏生少子顏注闕氏匈奴皇后號劉貢父云匈奴單于號其妻爲闕氏耳顏便以皇后解之大俚俗也西河舊事云失我祁連嶺使我六畜不蕃息失我焉支山使我婦女無顏色蓋北方有焉支山山多作紅藍北人採其花染緋取其英鮮者作胭脂婦人粧時用作頰色殊鮮明可愛匈奴名妻闕氏言可愛如胭脂也錢昭度作王昭君詩云闕氏纔聞易妾名歸期長似候河清則誤讀氏字爲姓氏之氏矣

太平廣記云綠珠井在白州雙角山下昔梁氏之女有容貌石季倫爲交趾採珠使以真珠三斛買之梁氏之居舊井存焉耆老云汲飲此井者誕女必多美里閭以美色無益于時遂以巨石鎮之苕溪漁隱曰山谷詩云欲買娉婷供煮茗我無一斛明珠用此事也

復齋漫錄云古今詩人詠婦人者多以歌舞爲稱梁元帝妓應令詩云歌清隨澗響舞影向池生劉孝綽看妓詩云燕姬臻妙舞鄭女愛清歌北齊蕭放冬夜對妓詩云歌還團扇後舞出妓行前宏執恭觀妓詩云合舞俱回雪分歌共落塵陳陰鏗侯司空宅詠妓詩云鶯啼歌扇後花落舞衫前陳劉刪亦云山邊歌落日池上舞前溪庾信趙王看妓詩綠珠歌扇薄飛燕舞衫長江總看妓詩云並歌時轉黛息舞暫分香隋盧思道夜聞鄰妓詩怨歌聲易斷妙舞態難雙陳元璪春園聽妓詩云紅樹搖歌扇綠珠飄舞衣釋法宣觀妓詩云舞袖風前舉歌聲扇後嬌王勣詠妓詩云早時歌扇薄今日舞衫長劉希夷春日閨人詩云池月憐歌扇山雲愛舞衣以歌對舞者七以歌扇對舞衣者亦七雖相緣以起然詳味之自有工拙也杜子美取以爲艷曲云清江歌扇底曠野舞衣前

許彥周詩話云。南齊楊侃性豪侈。舞人張靜婉腰圍一尺六寸。能掌上舞。唐人作楊柳枝詞曰。認得楊家靜婉腰。後人卻除家字。只使楊靜婉誤矣。李太白云。子夜吳歌動君心。李義山云。鶯能子夜歌。晉有子夜女善歌。非當時可及也。

苕溪漁隱曰。唐逸史言有李生者。其舅姓盧。有道術。邀詣其居。曰。求得一妓。善箜篌。令侍飲。箜篌上有朱字。曰雲中辨江樹。天際識歸舟。後娶陸長源女。乃所見于盧家者。果善箜篌。朱字宛然。李生具說舊事。女曰。往嘗夢爲仙官所追。如生所言。余觀吳兢樂府解題云。箜篌者。漢武帝滅南越。祠太一后土。令樂人侯暉。依琴造坎。言坎坎節應也。俟工人之姓。後語訛坎爲立也。又段安節樂府雜錄云。箜篌乃鄭衛之音。權輿也。以其亡國之聲。故號空國之侯。亦曰坎侯。吳兢所言有據。而段安節出于臆說。則箜篌之始。當以漢武爲是。而空國爲非也。樂府有箜篌引云。霍里子高。晨起刺船。有一白首狂夫。被髮攜壺。亂流而渡。其妻止之不及。遂溺死。於是其妻援箜篌而鼓之。作歌曰。公無渡河。公竟渡河。公墮而死。當奈何。聲甚悽愴。曲終。亦投河而死。子高還以其聲語麗玉。麗玉傷之。引箜篌寫其聲。聞者莫不墮淚飲泣。麗玉以其聲傳鄰女麗容。名曰箜篌引。

侍兒小名錄載璇璣圖敍云。前秦安南將軍竇滔。有寵姬趙陽臺。歌舞之妙。無出其右。滔置之別所。妻蘇知之。求而獲焉。苦加撻辱。滔深恨之。陽臺又專伺蘇之短。讒毀交至。滔益忿。蘇氏年二十一。滔鎮襄陽。與陽臺之任。絕蘇氏之音。問蘇悔恨自傷。因織錦迴文。題詩二百餘首。計八百餘字。縱橫反覆。皆爲文章。名曰璇璣圖。遺蒼頭賈至襄陽。滔覽錦字。感其妙絕。因送陽臺之關中。而具車從迎蘇氏。恩好愈重。

苕溪漁隱曰。王初寮有點絳脣一詞。送韓濟之歸襄陽云。峴首亭空。勸君休墮羊碑淚。宦游如寄。且伴山翁醉。說與鮫人莫解江臯珮。將歸思量紅縈翠細織。迴文字。初寮用前事。以其漢上故事。然于送人之詞似難用也。東觀餘論云。蘇蕙織錦迴文詩所傳舊矣。故少常沈公復傳其畫。由是若蘭之才益著。然其詩迴旋書之。讀者惟曉外邊七言。至其中方。則漫不可考矣。若沈公之博古。亦謂辭句脫略。讀不成文。不知此詩織成本五色相宣。因以別三四五七言之異。後人流傳不復施采。故迷其句讀。非辭句之脫略也。政和初。余在洛陽。於王晉玉許得唐程士南效此詩。并申誠所釋。而後曉然。是詩初不舛脫。蓋沈公未嘗見此本耳。然申誠所釋。但依士南之設色。其七言數火。其色反黃。四言數金。其色反綠。於五行爲弗類。意蘇氏詩圖之色。爲不爾。今因冠詩于畫。遂別而正之。三四五七言之詩。各隨其行。而爲之色。觀者見其色。則詩之言數可知已。至于士南之文。既有釋者。則賦采自從其舊。而并錄于弁首云。

苕溪漁隱曰。東坡後集有題織錦圖上回文三首。其一云。春晚落花餘碧草。夜涼低月半枯桐。人隨遠雁邊城暮雨。映疎簾繡閣空。其二云。紅手素絲千字錦。故人新曲九迴腸。風吹絮雪愁縈骨。淚洒縑書恨見郎。其三云。羞看一首回文錦。錦似文君別恨深。頭白自吟悲賦客。斷絃琴淮海集載東坡跋云。余少時見一江南本。其後有人題詩十餘首。皆奇絕。今記其三首。然則此詩非東坡所作也。少游又云。子瞻記江南所題詩本不全。嘗見之。記其五絕。今以補予瞻之遺。卽叢話前集所載回文詩五首是也。世以爲少游所作。亦非也。

許彥周詩話云。唐高宗宴羣臣。嘗雙頭牡丹詩。上官昭容一聯云。勢如連璧友。情若喚蘭人。計之必一英

奇女子也。

紺素雜記云周世宗時陶尙書穀奉使江南韓熙載遣家妓以奉盥匜及旦有書謝略云巫山之麗質初臨霞侵鳥道洛浦之妖姿自至月滿鴻溝舉不能領會其辭熙載因召家妓訊之云是夕忽當浣濯焉王平甫云熙寧間奉詔定蜀楚秦氏三家所獻書得一弊紙所書花蘿夫人詩共三十二首乃夫人親筆而辭甚奇與王建宮詞無異自唐至今誦者不絕口而此獨遺棄不見取前受詔定三家書者又斥去之甚可惜也謹令繕寫入三館而歸口誦數篇于丞相安石明日中書語及之而王珪馮京願傳其本於是盛行于世夫人僞蜀孟昶侍人事具國史苕溪漁隱曰余閱此詞如龍池九曲遠相通楊柳絲牽兩岸風長似江南好風景畫船來往碧波中黎園弟子簇池頭小樂攜來候宴游試炙銀笙先按拍海棠花下合梁州月頭支給買花錢滿殿宮人近數千遇着唱名多不語含羞走過御床前內人追逐採蓮時驚起沙鷗兩岸飛蘭棹把來齊拍水並船相鬪溼羅衣廚船進食簇時新侍座無非列近臣日午殿頭宣素臉隔花催喚打魚人皆清婉可喜花蘿又別有逸詩六十六首乃近世好事者旋加搜索續之篇次無倫語意與前詩相類者極少誠爲亂真矣聊摘其一二云羅衫玉帶最風流斜插銀篦漫理頭閑向殿前騎御馬掉鞭橫過小紅樓春日龍池小宴開岸邊亭子號流杯沉檀別作神仙女對捧金盃水上來

苕溪漁隱曰余觀古今詩話翰苑名談皆載寇萊公侍兒倩桃詩二首和章一首並同翰府名談仍益以怪辭吾所不取今但筆其詩云公自相府出鎮北門有善歌者至庭下公取金鍾獨酌令歌數闋公贈之束綵歌者未滿意倩桃自內窺之立爲詩二章呈公云一曲清歌一束綵美人猶自意嫌輕不知織女螢

窗下幾度拋梭織得成其二云夜冷衣單手屢呵幽窗軋軋度寒梭臘天日短不盈尺何似妖姬一曲歌

公和云將相功名終若何不堪急景似奔梭

人間萬事君休問且向樽前聽艷歌

東臯雜錄云王定國嶺外歸出歌者勸東坡酒坡作定風波序云王定國歌兒曰柔奴姓宇文氏眉目娟麗善應對家世在京師定國南遷歸余問柔廣南風土應是不好柔對曰此心安處便是吾鄉因爲綴此詞云常羨人間琢玉郎天教分付點酥娘自作清歌傳皓齒風起雪飛炎海變清涼萬里歸來年愈少微笑笑時猶帶嶺梅香試問嶺南應不好卻道此心安處是吾鄉

苦溪漁隱曰陸敦禮藻有侍兒名美奴善綴詞出侑樽俎每丐韻于坐客頃刻成章卜筭子云送我出東門作別長安道兩岸垂楊鎖暮烟正是秋光老一曲古陽關莫惜金樽倒君向瀟湘我向秦魚雁何時到如夢令云日暮馬嘶人去船逐清波東注後夜最高樓還肯思量人否無緒無緒生怕黃昏疎雨

復齋漫錄云劉偉明既喪愛妾而不能忘爲清平樂詞云東風依舊着意隋堤柳搓得鵝兒黃欲就天色清明廝勾去年紫陌先問今朝雨魂斷送一生憔悴知他幾箇黃昏與唐阿灰之詞有間矣

苦溪漁隱曰山谷戲聞善遣侍兒來促詩云日遣侍兒來報嘉草鞋十里踏堤沙鳩盤茶樣施丹粉只欠一枝葛苣花其醜陋可想而知山谷亦善戲也

詩說雋永云今代婦人能詩者前有曾夫人魏後有易安李李在趙氏時建炎初從祕閣守建康作詩云南來尙怯吳江冷北狩應悲易水寒又云南渡衣冠少王導北來消息欠劉琨

四六談麈云祭文唐人多用四六韓退之亦然故李易安祭趙湖州文云白日正中歎龐翁之機捷堅城

自墮憐杞婦之悲深，婦人四六之工者。

若溪漁隱曰：江寧章文虎其妻劉氏名彤，文美其字也。工詩詞，嘗有詞寄文虎云：千里長安名利客，輕離輕散尋常難。禁三月好風光，滿堵芳草綠，一片杏花香。記得年時臨上馬，看人眼淚汪汪。如今不忍更思量，恨無千日酒。空斷九迴腸。又云：向日寄去詩曲，非敢爲工。蓋欲道衷腸萬一耳。何不掩惡，輒示他人？適足取笑文虎也。本不復作，然意有所感，不能自己。小草二章，章四句，奉寄其一云：碧紗窗外一聲蟬，牽斷愁腸懶晝眠。千里才郎歸未得，無言空撥玉爐烟。其二云：畫扇停揮白日長，清風細細襲羅裳。女童來報新鴛熟，安得良人共一觴。東臯雜錄云：文潞公守洛，富鄭公致政，司馬溫公宮祠，范蜀公自許下來，同過郡會。出四玉盃勸酒，官妓不謹，碎其一。潞公將治之，溫公請書牘尾云：玉爵弗揮，典禮雖聞於往記；彩雲易散，過差可恕於斯人。潞公乃笑而釋之。

東臯雜錄云：東坡自錢塘被召，過京口林子中作守郡，有會坐中營妓出牒。鄭容求落籍，高瑩求從良。子中命呈東坡，坡索筆爲減字木蘭花書牒後云：鄭莊好客，容我樓前先墮幘。落筆生風，籍籍聲名不負公。高山白早，瑩骨球肌那解老。從此南徐良夜，清風月滿湖。暗用此八字于句端也。若溪漁隱曰：聚蘭集載此詞，乃東坡贈潤守許仲塗，且以鄭容落籍，高瑩從良爲句首，非林子中也。

復齋漫錄云：姑蘇官妓姓蘇，名瓊，行第九。蔡元長道過蘇州，太守召飲。元長聞瓊之能詞，因命卽席爲之。乞韻，以九字詞云：韓愈文章蓋世，謝安情性風流。良辰美景在西樓，敢勸一卮芳酒。記得南宮高第弟兄爭占鰲頭，金爐玉殿瑞烟浮。高占甲科第九，蓋元長奏名第九也。

詩說雋永云夏均文嘗言詩之比類直要相停嘗與客泛舟載肥妓而飲濁酒其詩曰蟻浮金椀濁妓壓畫船低

苕溪漁隱曰廣漢營妓小名僧兒秀外慧中善填詞有姓戴者忘其名兩作漢守寵之旣而得請玉局之祠以歸僧兒作滿庭芳見意云團菊苞金叢蘭減翠畫成秋暮風烟使君歸去千里倍潛然兩度朱幡雁水全勝得陶侃當年如何見一時盛事都在送行篇愁煩梳洗懶尋思陪宴七月湖邊有多少風流往事繁牽聞道霓旌羽駕看看是玉局神仙應相許衝雲破霧一到洞中天

許彥周詩話云作詩押韻是一巧中秋夜月詩押尖字數首之後一婦人云蚌胎光透殼犀角暈盈尖又記人作除夕詩押尼字衆人竟和無成詩者僕時不曾賦後因讀藏經呼喜鵠爲芻尼乃知讀書不厭多

